

緇門警訓

鐵雲回敬題

重刊緇門警訓序

一性圓明人人具足。瞥然妄念遽爾輪迴。夫哀曠濟
拔滯溺之沈流。方便多門。俾修爲以復厥性。然必志
至焉。氣次焉。弗能以志帥氣者。往往陷於過差之地
而不反。由是而有具大根器。乘本願輪。滅卻正法眼
藏者出。而爲惡辣鉗鎚。嗔拳熱喝。若迅雷疾霆之弗
及掩耳。以烹鍊之。以鈞陶之。以掀翻而擴徹之。以至
或爲法語。爲小參。爲示眾。爲警策。爲訓誡。爲箴銘。以
激厲之。以鞭辟之。以獎拔之。以化導而誘引之。噫宏
法願重愍物情深。緇門警訓一書之所以會萃成編。

者。豈徒然哉。乃若大明麗天。等受厥照。膜翳在眼。妄生疑端。則又錯綜

金輪世主之公論。先哲儒宗之偈讚。於其中焉。或者以爲直指單傳。掃空文字。有所立言悖違宗旨。必告之曰。神機活脫。石火電光。殺活縱擒。不涉功用。斯惟直接上根。中下之流。不堪覷著。眷彼襍花四法界內。終之以事事無礙。明其不捨一法。而無適不可者。豈殆所謂理悟則一事修無窮。而顯權宜機應者之準繩也歟。嘉禾衲禪人刊行是書。將使人人因言以見事。因事以見理。因理以見心。因心以見性。而復厥本。

有自然之天。與夫因指以見月。因月以忘指。因忘以忘月。而忘厥所忘之忘者。同出而異名。此又事理互融。空有絕待。心佛眾生三無差別者之剩語也。尙何警訓之有哉。尙何警訓之有哉。

成化六年歲次庚寅春三月朔武林清平山空谷沙門景隆序

重刊緇門警訓序

緇門警訓目錄

卷第一

潞山大圓禪師警策 明教嵩禪師尊僧篇

。孤山圓法師阿彌陀經序

32頁

示學徒

勉學上

并序 38頁

勉學下

姑蘇景德寺雲法師務學十門

并序

上封佛心才禪師坐禪儀

長蘆慈覺頤禪師坐禪儀

勸參禪文

。自警文

卷第二

龍門佛眼遠禪師坐禪銘

三自省察

鵝湖大義禪師坐禪銘

廬山東林混融禪師示眾

藍谷信法師自鏡錄序

釋難文

梁高僧偈法主遺誠小師

右街寧僧錄勉通外學

晉支遁禪師座右銘

周京師大中興寺道安法師遺誠九章

。大唐慈恩法師出家箴

南嶽法輪寺省行堂記

周渭濱沙門亡名法師息心銘

洞山和尚規誠

慈雲式懺主書紳

願文

。圭峰密禪師座右銘

白楊順禪師示眾

。永明智覺壽禪師垂誠

八湓聖解脫門

大智照律師比丘正名

捨緣銘

座右銘

規繩後跋

卷第三

撫州永安禪院僧堂記

禪月大師大慧龜鑑 右街寧僧錄三教總論

傳禪觀法

洪州寶峰禪院選佛堂記丞相張商英撰

三祖鏡智禪師信心銘

戒定慧三學

釋法四依

戒唯佛制不通餘人 撮略諸文以歎戒法

佛在世時徧宏戒法 示僧尼戒相廣略

度尼教意

尼八敬法

出家超世

。沙彌五德

三衣興意

引示袈裟功能

大教永斷繒綿皮物

舉現事以斥妄行

示衣財體如非

示敬護三衣鉢具法

示開制本緣

鉢制意

坐具教意

卷第四

漉囊教意

引大教說淨以斥倚濫

八財不淨長貪壞道

勸廣開懷利隨道擁

辯燒身指大小相違

律制襍學以妨正業

解行無實反輕戒律

三寶住持全由戒法

明理三寶功高歸之益大

住持三寶

化相三寶

仁宗皇帝讚三寶文

大慧禪師看經回向文

懶庵樞和尚語

六

四句偈

示比丘忖已德行受食

示比丘慎勿放逸

菩薩三事無厭

戒定慧

○誠觀檀越四事從苦緣起出生法

誠觀末法中校量心行法

誠觀破戒僧尼不修出世法

誠觀六難自慶修道法

戒賢論師祈禱觀音文

○永嘉眞覺禪師發願文

隨州大洪山遂禪師禮華嚴經文

桐江瑛法師觀心銘

卷第五

終南山宣律師賓主序

東山演禪師送徒弟行腳

漢顯宗開佛化法本內傳

中峰和尚遺誠門人。誠閑

千崑長禪師示眾

天衣懷禪師室中以淨土問學者

大智律師警自甘塗炭者

永明壽禪師戒無證悟人勿輕淨土

。慈雲式懺主三衣辯惑篇

卷第六

長蘆慈覺頤禪師龜鏡文

慈受禪師示眾箴規 笑翁和尚家訓

黃龍死心新禪師小參

褒禪山慧空禪師輪藏記

慈照聰禪師住石門查待制爲撰僧堂記

應庵華禪師荅詮長老法嗣書

怡山然禪師發願文

開善密庵謙禪師荅陳知丞書

司馬溫公解禪偈
仰山飯

白侍郎六讚偈
并序
天台圓法師自誠

卷第七

芙蓉楷禪師小參
黃蘗禪師示眾

徐學老勸童行勤學文

月窟清禪師訓童行

山谷居士黃太史發願文

雲峰悅和尚小參語 月林觀和尚體道銘

慈受深禪師小參

汾州大達無業國師上堂

法昌遇禪師小參 古鏡和尚回汾陽太守

雪竇明覺禪師壁間遺文

范蜀公送圓悟禪師行腳

保寧勇禪師示看經

。大智照律師送衣鉢與圓照本禪師書

釋門登科記序

顏侍郎荅雲行人書

陳提刑貴謙荅眞侍郎德秀書

卷第八

慈受禪師訓童行

勉僧看病

大慧禪師禮觀音文

。天台智者大師觀心誦經法

。觀心食法

大智律師三衣賦

鐵鉢賦

坐具賦

鹿囊賦

錫杖賦

蹟禪師誠洗麵文

辨才淨法師心師銘

唐禪月大師座右銘

吉州龍濟山友雲鰲和尚蛇穢說

大慧禪師荅孫知縣書

佛鑑懃和尚與佛果勤和尚書

荅投子通和尚書

卷第九

隋高祖文皇帝敕文

晉王受菩薩戒疏

婺州左溪山朗禪師召永嘉大師山居書

永嘉荅書

天台圓法師懺悔文

發願文

荆溪大師誦經普回向文

芭蕉泉禪師示眾

龍門佛眼禪師十可行十頌

并序

示禪人心要

誠問話

大隋神照真禪師上堂二

雲峰悅和尚室中舉古

金陵保寧勇禪師示眾

○古德渴熱行

覺範洪禪師送僧乞食序

爲僧不預於十科事佛徒消於百載

或庵體禪師上堂 示眾

小參

結座

眞淨文禪師頌

靈芝照律師頌

古德垂誠

勉看經

勉應緣

○勉住持

洞山和尚自誠

雪峰存禪師入閩

宏智禪師示眾

省病僧

大慧禪師示徒

龐居士頌

自保銘

上竺佛光照法師示小師

圭峰禪師示學徒委曲

○登廁規式

174

○大智律師入廁垂訓

179

卷第十

讚佛傳法偈

禪林妙記前序

石屋珙禪師送慶侍者回里省師

結制小參

上堂

商太宰問孔子聖人

鐘山鐵牛印禪師示童行法晦

撫州永安禪院新建法堂記無盡居士撰

宋文帝集朝宰論佛教

後漢書郊祀志

杭州淨慈寺守一法真禪師掃地回向文

隨州大洪山靈峰寺十方禪院記

唐修雅法師聽誦法華經歌

梁皇捨道事佛詔

緇門警訓目錄終

緇門警訓卷第一

瀉山大圓禪師警策

夫業繫受身。未免形累。稟父母之遺體。假眾緣而共成。雖乃四大扶持。常相違背。無常老病。不與人期。朝存夕亡。剎邨異世。譬如春霜曉露。倏忽卽無。岸樹井藤。豈能長久。念念迅速。一剎邨間轉息。卽是來生。何乃晏然空過。父母不供甘旨。六親固以棄離。不能安國治邦。家業頓捐。繼嗣緇離。鄉黨鬚髮稟師。內勤尅念之功。外宏不諍之德。迴脫塵世。冀期出離。何乃纔登戒品。便言我是比丘。檀越所須喫用。常住不解忖。

思來處。謂言法爾合供。喫了聚頭喧喧。但說人間雜話。然則一期趁樂。不知樂是苦因。曩劫狗塵未嘗返省。時光淹沒。歲月蹉跎。受用殷繁。施利濃厚。動經年載。不擬棄離。積聚滋多。保持幻質。導師有敕戒勗。比上進道嚴身三常不足。人多於此耽味不休。日往月來。颯然白首。後學未聞旨趣。應須博問先知。將謂出家。貴求衣食。佛先制律。啓創發蒙。軌則威儀。淨如冰雪。止持作犯。束斂初心。微細條章。革諸猥弊。毗尼法席。曾未叨陪。了義上乘。豈能甄別。可惜一生空過。後悔難追。教理未嘗措懷。玄道無因契悟。及至年高。臆

長空腹高心。不肯親附良朋。惟知倨傲。不度未諳法律。戢
斂全無。或大語高聲出言無度。不敬上中下座。婆羅
門聚會無殊。碗鉢作聲食畢先起。去就乖角。僧體全
無。起坐忪諸動他心念。不存些些軌則。小小威儀。將
何束斂。後昆新學無因倣倣。纔相覺察。便言我是山
僧。未聞佛教行持。一向情存粗糙。如斯之見。蓋爲初
心慵惰。不度饕餮因循。荏苒人間。遂成疎野。不覺躑躅老
朽。不度觸事面牆。後學咨詢。無言接引。縱有談說。不涉典
章。或被輕言。便責後生無禮。瞋心忿起。言語談人。一
朝臥疾在牀。眾苦縈纏。逼迫曉夕。思忖心裏。恟惶前

路茫茫未知何往。從茲始知悔過。臨渴掘井。奚爲。自恨早不預修。年晚多諸過咎。臨行揮霍。怕怖慙惶。穀穿雀飛。識心隨業。如人負債。强者先牽。心緒多端。重處偏墜。無常殺鬼。念念不停。命不可延。時不可待。人天三有。應未免之。如是受身。非論劫數。感傷歎訝。哀哉切心。豈可緘言。遞相警策。所恨同生。像季ホ去聖時遙。佛法生疎。人多懈怠。略伸管見。以曉後來。若不蠲矜。誠難輪道。

夫出家者。發足超方。心形異俗。紹隆聖種。震懾魔軍。用報四恩。拔濟三有。若不如此。濫廁僧倫。言行荒疎。

虛霑信施。昔年行處寸步不移。恍惚一生將何憑恃。
況乃堂堂僧相。容貌可觀。皆是宿植善根。感斯異報。
便擬端然拱手。不貴寸陰。事業不勤。功果無因。克就
豈可一生空過。抑亦來業無裨。辭親決志。披緇意欲
等超何所。曉夕思忖。豈可遷延過時。心期佛法。棟梁
用作後來龜鏡。常以如此。未能少分相應。出言須涉
於典章。談說乃傍於稽古。形儀挺特。意氣高閑。遠行
要假良朋。數數清於耳目。住止必須擇伴。時時聞於
未聞。故云。生我者父母。成我者朋友。親附善者如霧
露中行。雖不濕衣。時時有潤。狎習惡者長惡知見。曉

夕造惡。卽目交報。歿後沈淪。一失人身。萬劫不復。忠言逆耳。豈不銘心者哉。便能澡心育德。晦迹韜名。蘊素精神。喧囂止絕。若欲參禪學道。頓超方便之門。心契玄津。研幾精妙。決擇深奧。啓悟真源。博問先知。親近善友。此宗難得其妙。切須子細用心。可中頓悟正因。便是出塵階漸。此則破三界二十五有。內外諸法。盡知不實。從心變起。悉是假名。不用將心湊泊。但情不附物。物豈礙人。任他法性周流。莫斷莫續。聞聲見色。蓋是尋常。遮邊那邊。應用不闕。如是行止。實不枉披法服。亦乃酬報四恩。拔濟三有。生生若能不退。佛

階決定可期。往來三界之賓。出沒爲他作則。此之一
學最妙最玄。但辦肯心。必不相賺。若有中流之士。未
能頓超。且於教法畱心。溫尋貝葉。精搜義理。傳唱敷
揚。接引後來。報佛恩德。時光亦不虛棄。必須以此扶
持。住止威儀。便是僧中法器。豈不見倚松之葛。上聳
千尋。附託勝因。方能廣益。懇修齋戒。莫謾虧踰。世
生生殊妙因果。不可等閑過日。兀兀度時。可惜光陰。
不求升進。徒消十方信施。亦乃孤負四恩。積累轉深。
心塵易壅。觸途成滯。人所輕欺。古云。彼旣丈夫。我亦
爾。不應自輕而退屈。若不如此。徒在緇門。荏苒一生。

殊無所益。伏望興決烈之志。開特達之懷。舉措看他上流。莫擅隨於庸鄙。今生便須決斷。想料不由別人。息意忘緣。不與諸塵作對。心空境寂。只爲久滯不通。熟覽斯文。時時警策。強作主宰。莫徇人情。業果所牽。誠難逃避。聲和嚮順。形直影端。因果歷然。豈無憂懼。故經云。假使百千劫。所作業不亡。因緣會遇時。果報還自受。故知三界刑罰。縈絆殺人。弩力勤修。莫空過日。深知過患。方乃相勸行持。願百劫千生。處處同爲法侶。乃爲銘曰。

幻身夢宅。空中物色。前際無窮。後際寧剋。出此沒彼。

升沈疲極。未免三輪。何時休息。貪戀世間。陰緣成質。
從生至老。一無所得。根本無明。因茲被惑。光陰可惜。
刹那不測。今生空過。來世窒塞。從迷至迷。皆因六賊。
六道往還。三界匍匐。冬力早訪明師。親近高德。決擇身心。
去其荆棘。世自浮虛。眾緣豈逼。研窮法理。以悟爲則。
心境俱捐。莫記莫憶。六根怡然。行住寂默。一心不生。
萬法俱息。

明教嵩禪師尊僧篇

教必尊僧。何謂也。僧也者。以佛爲性。以如來爲家。以
法爲身。以慧爲命。以禪悅爲食。故不恃俗氏。不營世

家不修形骸。不貪生。不懼死。不滯乎五味。其防身有戒。攝心有定。辨明有慧。語其戒也。潔清三惑。而畢身不污。語其定也。恬思慮。正神明。而終日不亂。語其慧也。崇德辨惑。而必然。以此修之。之謂因。以此成之。之謂果。其於物也。有慈有悲。有大誓有大惠。慈也者。常欲安萬物。悲也者。常欲拯眾苦。誓也者。誓與天下見真諦。惠也者。惠羣生。以正法。神而通之。天地不能揜。密而行之。鬼神不能測。其演法也。辨說不滯。其護法也。奮不顧身。能忍人之不可忍。能行人之不能行。其正命也。丐食而食。而不爲恥。其寡欲也。糞衣綴鉢。而

不爲貧。其無爭也。可辱而不可輕。其無怨也。可同而不可損。以實相待物。以至慈修己。故其於天下也。能必和能普敬。其語無妄。故其爲信也。至其法無我。故其爲讓也。誠有威可警。有儀可則。天人望而儼然。能福於世。能導於俗。其忘形也。委禽獸而不慘。其讀誦也。冒寒暑而不廢。以法而出也。遊人間徧聚落。視名若谷響。視利若遊塵。視物色若陽豔。煦嫗貧病瓦合輿僂。而不爲卑。以道而處也。雖深山窮谷。草其衣木其食。晏然自得。不可以利誘。不可以勢屈。謝天子諸侯而不爲高。其獨立也。以道自勝。雖形影相吊。而不

爲孤。其羣居也。以法爲屬。會四海之人而不爲混。其可學也。雖三藏十二部。百家異道之書。無不知也。他方殊俗之言。無不通也。祖述其法。則有文有章也。行其中道。則不空不有也。其絕學也。離念清淨純真。一如不復有所分別也。僧乎其爲人至。其爲心溥。其爲德備。其爲道大。其爲賢非世之所爲賢也。其爲聖非世之所謂聖也。出世殊勝之賢聖也。僧也如此。可不尊乎。

阿彌陀經疏序

孤山法師智圓

夫心性之爲體也。明乎靜乎。一而已矣。無凡聖焉。無

依正焉。無延促焉。無淨穢焉。及其感物。隨緣而變。則爲六凡焉。爲四聖焉。有依焉。有正焉。依正既作。則身壽有延促矣。國土有淨穢矣。吾佛大聖人。得明靜之一者也。乃假道於慈。託宿於悲。將欲毆羣迷。使復其本。於是乎無身而示身。無土而示土。延其壽。淨其土。俾其忻。促其壽。穢其土。俾其厭。既忻且厭。則漸誘之策行矣。是故釋迦現有量而取穢土。非欲其厭邪。彌陀現無量而取淨土。非欲其忻乎。此則折之。彼則攝之。使其復本而達性耳。故淨名曰。隨所調伏眾生而取佛土者。其是之謂乎。雖寶樓金池。爲悅目之翫。而

非惑蕩之色。而能達唯心無境矣。雖風樹鳥聲。有入耳之娛。而非諠濫之音。而能念三寶有歸矣。夫如是則復乎明靜之體者。如轉掌耳。經云。眾生生者。皆是阿鞞跋致是也。大矣哉。聖人之善權也。如此是故羣經森列。而偏讚淨方。其有旨哉。佛說阿彌陀經者。其偏讚之謂歟。吾愛其辭簡而理明。其文約而事備。足可以誘弱喪而擊童蒙焉。於是約龍樹之宗。準智者之說。依經辯理。爲之義疏。若極深研幾。則吾豈敢庶乎有助於眞風。爲益於後昆爾。

示學徒

於戲大法下衰。去聖逾遠。披緇雖眾。謀道尤稀。競聲利爲己能。視流通爲兒戲。遂使法門罕闢。教網將頽。實賴後昆。克荷斯道。汝曹虛心請法。潔己依師。近期於立身揚名。遠冀於革凡成聖。發揮像法。捨子而誰。故須修身踐言。慎終如始。勤爾學問。謹爾行藏。避惡友如避虎狼。事良朋如事父母。奉師盡禮。爲法亡軀。有善毋自矜。起過務速改。守仁義而確乎不拔。處貧賤則樂以忘憂。自然與禍斯違。與福斯會。豈假相形問命。諂求榮達之期。擇日選時。苟免否屯之運。此豈沙門之遠識。實惟俗子之妄情。宜乎見賢思齊。當仁

不讓慕雪山之求法。學善財之尋師。名利不足動於懷。死生不足憂其慮。倘功成而事遂。必自邇而陟遐。不沽名而名自揚。不召眾而眾自至。智足以照惑。慈足以攝人。窮則獨善其身。達則兼善天下。使真風息而再振。慧炬滅而復明。可謂大丈夫焉。可謂如來使矣。豈得身棲講肆。跡混常徒。在穢惡則無所間然。於行解則不見可畏。以至積習成性。自滅其身。始教慕彼上賢。終見淪於下惡。如斯之輩。誠可悲哉。詩云。靡不有初。鮮克有終。斯之謂矣。中人以上。可不誠歟。抑又戒慧分宗。大小異學。悉自佛心而派出。意存法界。

以同歸。既而未曉大猷。於是各權所據。習經論則以
戒學爲棄物。宗律部則以經論爲憑虛。習大法者則
滅沒小乘。聽小乘者則輕毀大法。但見人師偏讚。遂
執之而互相是非。豈知佛意常融。苟達之而不見彼
此。應當互相成濟。其熟機緣。其猶萬派朝宗。無非到
海。百官蒞事。咸曰勤王。明業未見護一派而擬塞眾流。守
一官而欲廢庶績。明業原夫法王之垂化也。統攝羣品。各
有司存。小律比禮刑之權。大乘類鈞衡之任。營福如
司於漕輓。製撰若掌於王言。在國家之百吏咸修。類
我教之羣宗競演。果明此旨。豈執異端。當須量已才。

能隨力演布。性敏則兼學爲善。識淺則顓門是宜。若然者。雖各播風猷。而共成慈濟。同歸和合之海。共坐解脫之牀。夫如是。則真迷途之指南。教門之木鐸也。居乎師位。諒無慚德。趣乎佛果。決定不疑。汝無矜伐小小見知。樹立大大我慢。輕侮先覺。縈惑後生。雖云聽尋未補過咎。言或有中。汝曹思之。

勉學上 并序

中人之性。知務學。而或墮於學。乃作勉學。

嗚呼。學不可須臾怠。道不可須臾離。道由學而明。學可怠乎。聖賢之域。由道而至。道可離乎。肆凡民之學。

不怠。可以至於賢。賢人之學不怠。可以至於聖。冉求之學。可以至於顏淵。而不逮具體者。中心怠耳。故曰。非不說子之道。力不足也。子曰。患力不足者。中道廢。今汝畫顏淵之學。可以至於夫子。而不齊於聖師者。短命死耳。如不死。安知其不如仲尼哉。以其學之不怠也。故曰。有顏氏子好學。不幸短命死矣。今也則亡。或問聖人學耶。曰。是何言歟。是何言歟。凡民與賢。猶知學。豈聖人怠於學耶。夫天之剛也。而能學柔於地。故不干涉四時焉。地之柔也。而能學剛於天。故能出金石焉。陽之發生也。而亦學肅殺進殺於陰。故靡草死焉。陰

野萊

之肅殺也。而亦學發生於陽。故薺麥生焉。夫爲天乎。
地乎。陽乎。陰乎。交相學而不怠。所以成萬物。天不學。
柔。則無以覆。地不學剛。則無以載。陽不學陰。則無以。
啓。陰不學陽。則無以閉。聖人無他也。則天地陰陽而。
行者。四者學不怠。聖人惡乎怠。或者避席曰。子之孤。
陋也。幸子發其蒙。願聞聖人之學。中庸子曰。復坐。吾。
語汝。書不云乎。惟狂克念作聖。惟聖罔念作狂。是故。
聖人造次顛沛。未嘗不念正道而學之也。夫子大聖。
人也。拔乎其萃。聚出乎其類。自生民以來。未有如夫子。
者。入太廟每事問。則是學於廟人也。三人行擇其善。

者而從之。則是學於偕行也。入周則問禮於老子。則是學於柱史也。多持豈仲尼之聖。不若廟行人。柱史耶。蓋聖人懼夫不念正道而學之。則至於狂也矣。故曰。必有如丘之忠信焉。不如丘之好學也。曰。聖人生而知之。何必學爲。曰。知而學聖人也。學而知常人也。雖聖人常人。莫有不由於學焉。孔子曰。君子不可不學。子路曰。南山有竹。不柔自直。斬而用之。達乎犀革。以此言之。何學之有。孔子曰。秬而羽之。多持鏃而礪之。其入之不亦深乎。子路再拜曰。敬受教矣。噫。聖人之學。無乃秬羽鏃礪。使深入乎。豈生而知之者。兀然不學耶。

勉學下

夫聖且賢。必務於學。聖賢以下。安有不學而成。人哉。學猶飲食衣服也。人有聖乎。賢乎。眾庶乎。雖三者異。而饑索食。渴索飲。寒索衣。則不異矣。學也。豈得異乎。惟禽獸土木。不必學也。嗚呼。愚夫嗜飲食而不怠。冒貨利而不休。及就於學。朝學而夕怠者有矣。夫有春學而冬怠者有矣。夫苟如嗜飲食。冒貨利之不知怠者。何患於不爲博聞乎。不爲君子乎。曰。世有至愚者。不辯菽麥之異。不知寒暑之變。豈令學耶。豈可教耶。曰。至愚由不教也。由不學也。苟師教之不倦。彼心之

不怠者。聖域可躋而陞乎。何憂菽麥之不辯乎。且愚者渴而知飲。饑而知食。寒而知衣。旣知斯三者。則與草木殊矣。惡乎不可學也。不可教也。人之至愚。豈不能日記一言耶。積日至月。則記三十言矣。積月至年。則記三百六十言矣。積之數年而不怠者。亦幾於博聞乎。又日取一小善而學行之。積日至月。則身有三十善矣。積月至年。則身有三百六十善矣。積之數年而不怠者。不亦幾於君子乎。爲愚爲小人而不變者。由不學耳。中庸子喟然歎曰。吾嘗見恥智之不逮才之不敏。而輟於學者。未見恥飲食不如他人之多而

輟飲食者。輟飲食則殞其命。何必恥於不多耶。輟學問。則同夫禽獸土木。何必恥才智之不如他人耶。苟恥才智不如。則不學。則亦應恥飲食不如他人。則廢飲食。以是觀之。豈不大誤乎。吾亦至愚也。每揣才與智不逮他人者遠矣。由知飲食之不可輟。而不敢怠於學也。行年四十有四矣。雖病且困。而手未嘗釋卷。所以懼同於土木禽獸耳。非敢求臻聖域也。亦非求乎聞達也。雖或彷徨戶庭。平夷猶原野。移平以暫頤養目觀。心思亦未嘗敢廢於學也。由是登山則思學其高。臨水則思學其清。坐石則思學其堅。看松則思學其貞。正

對月則思學其明。萬境森列各有所長。吾悉得師而學之。萬境無言而尙可學。人之能言。雖萬惡必有一善也。師一善以學之。其誰曰不然乎。中庸子曰。世有求之而或不得者也。世有求之而必得者也。求之而或不得者利也。求之而必得者道也。小人之於利也。雖或萬求而萬不得。而求之彌勇。君子之於道也。求之必得。而望塗懷怯。恐怯自念力不足者。此求利小人之罪耳。仲尼曰。仁遠乎哉。我欲仁斯仁至矣。言求之而必得也。

姑蘇景德寺雲法師務學十門 并序

玉不琢不成器。人不學不知道。余十有五而志於學。
荏苒光景。展轉倏忽老至。歲月既深。時龐知其趣。翻歎疇昔。
殊失斯旨。限迫桑榆。日將沒學不可逮。因述十門垂裕。杜立後昆。
俾務學以成功。助宏教而復顯云爾。

不修學無以成

涅槃經云。凡有心者。皆當得成阿耨多羅三藐三菩
提。何以故。蓋爲一切眾生皆有佛性。此性虛通靈明
常寂。若謂之有無狀無名。若謂之無聖以之靈羣生
無始不覺自迷。煩惱覆蔽遺此本明。能生諸緣枉入
六趣。由是大覺憫物迷盲。設戒定慧三學之法。其道

恢宏示從真以起妄。軌範羣品令息妄以歸真。若能信受佛語。隨順師學。乃駕苦海之迅航。則登聖道之梯。誰能出不由戶。何莫由斯道焉。

不折我無以學

說文云。我。施身自謂也。華嚴云。凡夫無智。執著於我。法華云。我慢自矜高。諂曲心不實。由執我見。憍慢貢高。不愧無智。妄自尊大。見善不從。罔受教誨。於賢不親。去道甚遠。欲求法者。當折我心。恭默思道。屈節卑禮。以敬事長。尊師重道。見賢思齊。鳩摩羅什初學小教。頂禮盤頭達多。此下敬上。謂之賢尊。盤頭達多。晚

求大法。復禮鳩摩羅什。此上敬下。謂之尊賢。故周易曰。謙。德之柄也。書云。汝惟不矜。自賢曰矜。天下莫與汝爭能。汝惟不伐。天下莫與汝爭功。晏子曰。夫爵益高者。意益下。官益大者。心益小。祿益厚者。施益博。子夏曰。敬而無失。恭而有禮。四海之內。皆兄弟也。

不擇師無以法

鳥之將息。必擇其林。人之求學。當選於師。師乃人之模範。模不模範。不範。古今多矣。爲模範者。世唯二焉。上則智慧博達。行業堅貞。猶密室燈光。徹窗隙。次乃解雖洞曉。行亦藏瑕。如犯罪人持燈照道。斯二高座。

皆蘊師法。其如寡德適時名而不高。望風依附。畢世

本務正業

荒唐。東晉安師十二出家。貌黑形陋。師輕視之。驅役

田舍。執勞三年。方求師教。授辨意經。執卷入田。因息

就覽。暮歸還師。經已闍誦。師方驚歎。乃爲髻髮。至受

具戒。恣其游學。投佛圖澄。見以奇之。異哉小童。真世

良驥。不遇青眼。困駕鹽車。自非伯樂。奚彰千里之駿。

故出家者。慎宜詳擇。察有匠成之能。方具資稟之禮。

故南山云。真誠出家者。怖四怨之多苦。厭三界之無

常。辭六親之至愛。捨五欲之深著。能如是者。名真出

家。則可紹隆三寶。度脫四生。利益甚深。功德無量。比

眞教凌遲。慧風掩扇。俗懷侮慢。道出非法。並由師無率誘之心。資缺奉行之志。二彼相捨。妄流鄙境。欲令道光焉可得乎。

不習誦無以記

記諸善言。諷而誦之。迦葉阿難。具足住持八萬法藏。西域東夏高德出家。幼年始習。皆學誦持。竺佛圖澄能誦佛經數百萬言。佛陀跋陀。此云覺賢。同學數人。習誦爲業。餘人一月工誦。覺賢一日能記。其師歎曰。一日之學。敵三十夫。然人至愚。豈不日記一言。以日繫月。以月繫年。積工必廣。累課亦深。其道自微而生。

何患無所立矣。

不工書無以傳

書者如也。敘事如人之意。防現生之忘失。須繕寫而編錄。欲後代以流傳。宜躬書以成集。則使教風不墜。道久彌芳。故釋氏經律結集。貝多。孔子詩書刪定。竹簡。若不工書。事難成就。翻思智者無礙之辯。但益時機。自非章安秉筆之力。豈畱今日。故麴賓高德盤頭達多。從旦至中。手寫千偈。從中至暮。口誦千偈。但當遵佛能寫名字。慎勿倣世精草隸焉。

不學詩無以言

言善則千里之外應之。言不善則千里之外違之。詩

陳袞穀貶語順聲律。國風敦厚雅頌溫柔。才華氣清詞

富彬蔚。久習則語論自秀。纔誦乃含吐不俗。彼稱四

海習鑿齒。此對彌天釋道安。陳畱阮瞻時忽嘲曰。大

晉龍興天下爲家。沙門何不全髮膚去袈裟。釋梵服

被綾紗。孝龍對曰。抱一以逍遙。唯寂以致誠。剪髮毀

容改服變形。彼謂我辱我棄彼榮。故無心於貴而愈

貴。無心於足而愈足。此乃氣蘊蘭芳。言吐風采。雖不

近乎聾俗。而可接於清才。佛法旣委王臣。宏道須習

文翰。支遁投書北闕。道林方逸東山。自非高才。豈感

君主宜省狂簡之言。徒虛語耳。

非博覽無以據

高僧傳云。非博則語無所據。當知今古之興亡。須識華梵之名義。游三藏之教海。玩六經之詞林。言不妄談。語有典據。故習鑿齒讚安師曰。理懷簡衷。多所博涉。內外羣書。略皆徧覩。陰陽算數。悉亦能通。佛經妙義。故所游刃。真宗皇帝詔李侍讀飲。仲容起固辭曰。告官家徹臣器。上問何故。謂天子爲官家。對曰。臣嘗記蔣濟萬機論言。三皇官天下。五帝家天下。兼三五之德。故曰官家。上喜曰。真所謂君臣千載一遇。此由

學問藏身。多識前言。無所累矣。

不厭事無以識

子曰。吾非聖人經事久矣。洎入太廟。每事問者。儆戒無虞。罔失法度。羅漢雖聖。赤鹽不知。方朔雖賢。劫灰罔辯。多見而識之。未見而昧矣。李後主得畫牛一軸。晝則出於欄外。夜乃歸於欄中。持貢闕下。太宗張後苑以示羣臣。俱無知者。惟僧錄贊寧曰。南倭海水或減。則灘磧微露。倭人拾方諸蚌。腊中有餘淚數滴者。得之和色著物。則晝隱而夜顯。沃焦山時或風燒。飄擊。忽有石落海岸。得之滴水摩色染物。則晝顯而夜

晦諸學士皆以爲無稽。寧曰。見張騫海外異記。後杜鎬檢三館書。自果見於六朝舊本書中。此乃博聞強識。見機而作也。

不求友無以成

生我者父母。成我者朋友。故君子以朋友講習以文。

會友。以友輔仁。佐助品藻人物。商榷同異。如切如磋。如琢

如磨。劉孝標云。組織仁義。琢磨道德。歡其愉樂。恤其

陵夷。寄通靈臺之下。落遺跡江湖之上。風雨急而不輟。

其音。雪霜零而不渝。變其色。斯乃賢達之素交。歷萬古

而一遇。東晉道安未受戒時。會沙彌僧光於逆旅。共

教昂

陳志慕神氣慷慨臨別相謂曰。若俱長大勿忘同游。
後光學通經論。隱飛龍山。安後復從之相會。所喜謂
昔誓始從。因共披文屬思。新悟尤多。安曰。先舊格義
於理多違。光曰。且當分析逍遙。何容是非先達。安曰。
宏贊理教。宜令允愜。昔法鼓競鳴。何先何後。消亮時僧道護
亦隱飛龍。乃共言曰。居靜離俗。每欲匡心大法。豈可
獨步山門。使法輪輟軫。宜各隨力所被。以報佛恩。眾
僉曰善。遂各行化。

不觀心無以通

維摩云。諸佛解脫。當依眾生心行中求。何以故。晉華

嚴云。心如工畫師。造種種五陰。一切世間中。無不從心造。如心佛亦爾。如佛眾生然。心佛及眾生。是三無差別。既爲生佛之母。亦爲依正之源。故稜嚴云。諸法所生。唯心所現。一切因果。世界微塵。因心成體。欲言心有。如筌篲聲。求不可見。欲言其無。如空篲聲。彈之亦響。不有不無。妙在其中。故般舟云。諸佛從心得解脫。心者清淨名無垢。五道鮮潔。不受色。有解此者。大道成。遵此十門。上行下儆。不倦。終之則吾佛之教。可延於後世。苟謂不然。祖道必喪。傾望後裔。覽而警焉。

上封佛心才禪師坐禪儀

夫坐禪者。端心正意。潔己虛心。疊足跏趺。收視反聽。惺惺不昧。沈掉永離。縱憶事來。盡情拋棄。向靜定處。正念諦觀。知坐是心。及返照是心。知有無中。邊內外者心也。此心虛而知寂而照。圓明了了。不墮斷常。靈覺昭昭。揀非虛妄。今見學家。力坐不悟者。病由依計。情附偏邪。迷背正因。枉隨止作。不悟之失。其在斯焉。若也斂澄一念。密契無生。智鑑廓然。心華頓發。無邊計執。直下消磨。積劫不明。一時豁現。如忘忽記。如病頓瘳。內生歡喜。心自知當作佛。卽知自心外無別佛。然後順悟增修。因修而證。證悟之源。是三無別。名爲

一解一行三昧。亦云無功用道。便能轉物不離根塵。信手拈來互分主伴。乾坤眼淨今古更陳。覲體神機自然符契。所以維摩詰曰。不起寂滅定而現諸威儀。是爲晏坐也。然當知水澄月現鏡淨光全。學道之人坐禪爲要。苟不爾者。修途輪轉汨沒四生。酸鼻痛心難以自默。也聊書大概助發真源。果不廢修卽同參契。

長蘆慈覺蹟禪師坐禪儀

學般若菩薩。先當起大悲心。發宏誓願。精修三昧。誓度眾生。不爲一身獨求解脫。爾乃放捨諸緣。休息萬事。身心一如。動靜無間。量其飲食不多不少。調其睡

眠不節不恣。欲坐禪時。於閑靜處。厚敷坐物。寬繫衣帶。令威儀齊整。然後結跏趺坐。先以右足安左脛上。左足安右脛上。或半趺坐亦可。但以左足壓右足而已。次以右手安左足上。左掌安右掌上。以兩手大拇指面相拄。徐徐舉身前向。復左右搖振。乃正身端坐。不得左傾右側。前躬後仰。令腰脊頭項骨節相拄。狀如浮屠。又不得聳身太過。令人氣急不安。要令耳與肩對。鼻與臍對。舌拄上腭。唇齒相著。目須微開。免致昏睡。若得禪定。其力最勝。古有習定高僧。坐常開目。向法雲圓通禪師。亦訶人閉目坐禪。以爲黑山鬼窟。

蓋有深旨。達者知焉。身相既定。氣息既調。然後寬放
臍腹。一切善惡都莫思量。念起卽覺。覺之卽失。久久
忘緣自成一片。此坐禪之要術也。竊爲坐禪乃安樂
法門。而人多致疾者。蓋不善用心故也。若善得此意。
則自然四大輕安。精神爽利。正念分明。法味資神。寂
然清樂。若已有發明者。可謂如龍得水。似虎靠山。若
未有發明者。亦乃因風吹火。用力不多。但辨肯心。必
不相賺。然而道高魔盛。逆順萬端。但能正念見前。一
切不能畱礙。如棱嚴經。天台止觀。圭峰修證儀。具明
魔事。預備不虞者。不可不知也。若欲出定。徐徐動身。

安詳而起。不得卒暴。出定之後。一切時中常依方便。護持定力如護嬰兒。卽定力易成矣。夫禪定一門最爲急務。若不安禪靜慮。到遮裏總須茫然。所以探珠宜靜浪。動水取應難。定水澄清。心珠自見。故圓覺經云。無礙清淨慧。皆依禪定生。法華經云。在於閑處。修攝其心。安住不動。如須彌山。是知超凡越聖。必假靜緣。坐脫立亡。須憑定力。一生取辦。尙恐蹉跎。況乃遷延。將何敵業。故古人云。若無定力。甘伏死門。掩目空歸。宛然流浪。幸諸禪友。三復斯文。自利利他。同成正覺。

勸參禪文

夫解須圓解。還他明眼宗師。修必圓修。分付叢林道伴。初心薄福。不善親依。見解偏枯。修行懶惰。或高推聖境。孤負已靈。寧知德相神通。不信凡夫悟道。或自恃天真。撥無因果。但向胸襟流出。不依地位。修行所以麤解法師。不通教眼。虛頭禪客。不貴行門。此偏枯之罪也。或則渾身破碎。滿面風埃。三千細行。全無八萬威儀。總缺。或則追陪人事。緝理門徒。身遊市井之間。心染閭閻之態。所以山野常僧。未免農夫之誚。城隍釋子。反爲儒士之羞。此懶惰之罪也。何不再離煩

惱之家。重割塵勞之網。飲清風而訪道流。探微言而
尋知己。澄神祖域。息意宗乘。靜室虛堂。斂禪衣而宴
坐。青山綠水。攜杖錫以經行。忽若心光透漏。凝滯冰
消。直下分明。豈昧三祇之極果。本來具足。何妨萬行
之因華。由是宗說兼通。若杲日麗虛空之界。心身俱
靜。如瑠璃含寶月之光。可謂蓬生麻中。不扶自直。眾
流入海。總號天池。反觀前非。方知大錯。忠言逆耳。敢
冀銘心。此世他生。同爲法侶。

自警文

神心洞照。聖默爲宗。旣啓三緘。宜遵四實。事關聖說。

理合金文。方能輔翼教乘。光揚祖道。利他自利。功不
浪施。若乃竊議朝廷政事。私評郡縣官寮。講國土之
豐凶。論風俗之美惡。以至工商細務。市井閒談。邊鄙
兵戈。中原寇賊。文章技藝。衣食貨財。自恃已長。隱他
好事。揄揚顯過。指摘微瑕。過失既乖福業。無益道心。如此
游言。並傷實德。坐消信施。仰愧龍天。罪始濫觴。禍終
滅頂。何也。眾生苦火。四面俱焚。豈可安然坐談。無義
緇門警訓卷第一終

緇門警訓卷一

二三

緇門警訓卷第二

龍門佛眼遠禪師坐禪銘

心光虛映映體絕偏圓。金波_新而動寂常禪。念起念滅不用止絕。任運_新滔滔何曾起滅。起滅寂滅現大迦葉。坐臥經行未嘗閒歇。禪何不坐坐何不禪。了得如是始號坐禪。坐者何人禪是何物。而欲坐之用佛覓佛。佛不用覓。覓之轉失。坐不我觀。禪非外術。初心鬧亂未免回換。所以多方教渠靜觀。端坐收神。初則紛紜紜久久恬淡。虛閑六門。六門稍歇。於中分別。分別纔生已成起滅。起滅轉變從自心現。還用自心反觀一徧。

一反不再圓光頂戴。靈燄騰輝。心心無礙。橫該豎入。
生死永息。一粒還丹。點金成汁。身心客塵。透漏無門。
迷悟且說逆順。休論細思。昔日冷坐尋覓。雖然不別。
也大狼藉。剎邨凡聖。無人能信。匝地茫茫。大須謹慎。
如其不知端坐思惟。一日築著。伏惟伏惟。

三自省察

是身壽命如駒過隙。何暇閑情。妄爲襍事。旣隆釋種。
須紹門風。諦審先宗。是何標格。

道業未辦。去聖時遙。善友師教。誠不可捨。自生勉勵。
念報佛恩。惟已自知。大心莫退。

報緣虛幻不可強爲。浮世幾何隨家豐儉。苦樂逆順道在其中。動靜寒溫自愧自悔。

鵝湖大義禪師坐禪銘

參禪學道幾般樣。要在當人能擇上。莫只忘形與死心。此箇難醫病最深。直須坐究探淵源。此道古今天下傳。正坐端然如泰山。巍巍不要守空閑。直須提起吹毛利。要剖西來第一義。直視瞠卻眼。兮剔起眉。反覆看渠渠是誰。還如捉賊須見賊。不怕賊埋深處藏。有智捉獲刹邨頃。無智經年不見影。深嗟兀坐常如死。千年萬歲只如此。若將此等當禪宗。拈花微笑喪家風。

黑山下坐死水浸。大地漫漫如何禁。若是鐵眼銅睛漢。把手心頭能自判。直須著到悟爲期。哮吼一聲獅子兒。君不見磨甑作鏡喻有由。車不行兮在打牛。又不見岩前湛水萬丈清。沈沈寂寂杳無聲。一朝魚龍來攪動。波翻浪湧真堪重。譬如靜坐不用工。何年及第悟心空。急下手兮高著眼。管取今生教了辨。若還默默恣如愚。知君未解做工夫。抖擻精神著意看。無形無影悟不難。此是十分真用意。勇猛丈夫卻須記。切莫聽道不須參。古聖孜孜爲指南。雖然舊閣閑田地。一度贏來得也未。要識坐禪不動尊。風行草偃悉

皆論。而今四海清如鏡。頭頭物物皆吾聽。長短方圓只自知。從來絲髮不曾移。若問坐禪成底事。日出東方夜落西。

廬山東林混融禪師示眾

避萬乘尊榮。受六年饑凍。不離草座。成等正覺。度無量眾。此黃面老爺出家樣子。後輩忘本。反爲口體。不務耕桑。見成利養。爲便。不奉君親。免事征役。爲安。假名服竊世緣。以鬪諍作佛事。老不知悔。死爲園菌。良可悲夫。汝輩出家。當思齊草座之前。自省園菌之下。可爾。

藍谷信法師自鏡錄序

余九歲出家於今過六十矣。至於逍遙廣廈顧步芳除。體安輕輦身居閑逸。星光未旦。十利之精饌已陳。日彩方中。三德之珍羞總萃。不知耕穫之頓弊。不識鼎飪之劬勞。長六尺之軀。全百年之命者。是誰所致乎。則我本師之願力也。余且約計五十之年。朝中飲食蓋費三百餘碩矣。寒暑衣藥蓋費二十餘萬矣。爾其高門邃宇。碧砌丹楹。軒乘僕豎之流。几案牀褥之類。所費又無涯矣。或復無明暗起邪見橫生。非法弃用。非時飲噉。所費又難量矣。此皆出自他力資成我。

用與夫汲汲之位。豈得同年而較其苦樂哉。是知大
慈之教至矣。大悲之力深矣。況十號調御。以我爲子
而覆之。八部天龍。以我爲師而奉之。皇王雖貴。不敢
以臣禮畜之。則其貴可知也。尊親雖重。不敢以子義
瞻之。則其尊可知也。若乃悠悠四俗。茫茫九土。誰家
非我之倉儲。何人非予之子弟。所以提孟入室。緘封
之膳。遽開振錫。登衢施慢之容。肅敬古人。以一食之
惠。猶能效節。一言之顧。尙或亡軀。況從頂至踵。皆如
來之養乎。從生至死。皆如來之蔭乎。向使不遇佛法。
不遇出家。方將曉夕犯霜露。晨昏勤隴畝。馳驟萬端。

逼迫千計。弊檐塵絮。或不足以蓋形。多藿茹菜食。或不能以充口。何暇盱衡廣宇。策杖閑庭。地曳履清談。披襟閑譁。避寒暑。擇甘辛。呵斥童稚。徵求捧汲。縱意馬之害羣。任情猿之矯樹也。但三障雲聳。十纏縈結。癡愛亂心。狂愚患惱。自悔自責。經瞬息而已。遷悲之恨之。歷旬朔而俄變。或復陞堂致禮。恥尊儀而雨泣。對格披文。慙聖教而垂淚。或鶉衣犬食。困辱以治之。損財去友。孤窮而苦之。竟不能屈慢山清。欲火捨麤弊之聲色。免鑊湯之深誅。豈不痛哉。豈不痛哉。所以常慘常啼。酸辛而不極。空藏地藏。救接而無方。余又反覆

求已周旋自撫。形容耳目不減於常流。識悟神清。參
差於名輩。何福而生中國。何善而預出家。何罪而戒
檢多違。何釁而剛強難化。所以縈紆日昊。仁歎中宵。
莫識救之之方。未辦革之之術。然幼蒙庭訓。早霑釋
教。頗聞長者之遺言。屢謁名僧之高論。三思之士。假
韋絃以是資。九折之賓。待箴銘而作訓。故乃詳求列
代。披閱羣篇。採同病之下流。訪迷津之野客。其有蔑
聖言。輕業累。縱逸無恥。頑疎不檢。可爲懲勸者。並集
而錄之。仍簡十科。分爲三軸。朝夕觀覽。庶裨萬一。若
乃坐成龍報。立驗虵身。牛泣登坡。馳鳴遶寺。或杖楚

交至遍體火然。或戈戟去來應時流血。或舌銷眉落。或失性發狂。或取把菜而作奴。或侵束柴而然足。寄神園木。割肉酬施主之恩。託跡園扉。變骨受謗人之罰。若不見而今見。先不知而始知。號天扣地。莫以追破膽摧肝。非所及。當此時也。父母百身而無贖。親賓四馳而不救。貨賂委積而空陳。左右撫膺而奚補。向之歡娛美樂。爲何在乎。向之朋流眷屬。爲何恃乎。嗚呼。朝爲盛德。唱息於長廊。夕爲傷子。哀慟於幽房。匪斯人之獨有。念余身兮。或當倘百年而一遇。將恥悔兮。何央。可不愴乎。可不懼乎。故編其終始。備之左右。

位勗書紳之誠。將期戰勝之功。其有名賢雅誥哲人
殊跡。道化之滂隆。時事之臧否。亦附而錄之。以寄通
識。古人云。百年影徂。千載心在。實望千載之後。知予
心之所在焉。

釋難文

希顏首座字聖徒。性剛果。通內外學。以風節自持。遊
歷罷歸。隱故廬。跡不入俗。常閉門宴坐。非行誼高潔
者。莫與友也。名公貴人累以諸剎招之。堅不荅。時有
童行名參已。欲爲僧。侍左右。顏識其非器。作釋難文。
以卻之。曰。知子莫若父。知父莫若子。若子之參已。非

爲僧器。蓋出家爲僧。豈細事乎。非求安逸也。非求溫飽也。非求蝸角利名也。爲生死也。爲眾生也。爲斷煩惱。出三界海。續佛慧命也。去聖時遙。佛法大壞。汝敢妄爲爾。寶梁經云。比丘不修比丘法。大千無唾處。通慧錄云。爲僧不預十科。事佛徒勞百載。爲之不難得乎。以是觀之。予濫廁僧倫。有詒於佛。況汝爲之邪。然出家爲僧。苟不知三乘十二分教。周公孔子之道。不明。因果不達。已性不知稼穡艱難。不念信施難消。徒飲酒食肉。破齋犯戒。行商坐賈。偷姦博奕。覬覦院舍。車蓋出入。奉養一已而已。悲夫。有六尺之身。而無智

慧佛謂之癡僧。有三寸舌而不能說法。佛謂之啞羊。
僧似僧非僧似俗非俗。佛謂之烏鼠僧。亦曰禿居士。
棲巖故曰云何賊人假我衣服。裨販如來。造種種業。
非濟世舟航也。地獄種子爾。亦通縱饒彌勒下生出得頭
來。身已陷鍊圍百刑之痛。非一朝一夕也。若今爲之
者。或百或千。至於萬計。形服而已。篤論其中何有哉。
所謂鷲翰而鳳鳴也。並從碌碌之石非玉也。蕭敷艾榮非
雪山忍草也。國家度僧本爲祈福。今反責以丁錢。示
民於僧。不然。使吾徒不足待之之至也。只如前日育
王璉。永安嵩。龍井淨。靈芝照。一狐之掖。自餘千羊之

皮何足道哉。於戲佛海穢滓。未有今日之甚也。可與智者道。難與俗人言。

師古曰。狐腋下之皮。輕柔難得。黃雉作掖。

梁高僧偈法主遺誠小師

塵世匪堅。浮生不久。我光陰似謝。汝齒髮漸高。無以世利下其身。無以虛名苟其利。莫輕仁賤義。莫嫉善妬才。莫抑遏無辜。莫沈埋有德。莫疎慵人事。莫懶墮焚修。莫耽湎睡眠。莫強知他事。莫空腹高心。莫營私利己。莫恃強欺弱。莫利己損他。無以長而慢後生。無以少而欺老宿。無以財華下視物。無以意氣高揖人。無以不善苦相親。無以善而卻憎惡。無以片能稱我。

是無以少解道他非。無以在客慢主人。無以爲主輕
旅客。無以在事失綱紀。無以徇眾破條章。無以誹謗
怪他人。無以穿鑿覓他過。好向佛法中用意多於塵
境上除情。袈裟下失卻人身。實爲苦也。捺落裏受諸
異報。可謂屈焉。況端拱無爲。安閑不役。徐行金地。高
坐華堂。足不履泥。手不彈水。身上衣而口中食。豈易
消乎。圓卻頂而方卻袍。爲何事也。其或剛柔得所。進
退含容。堪行卽行。可止卽止。無貪眼下數省時中。一
點相當萬金消得。予以千叮萬囑。苦口甘言。依余言
者。來世相逢。若不依予言者。擬向何處出頭。珍重珍

重。

右街寧僧錄勉通外學

夫學不厭博有所不知蓋闕如也。吾宗致遠以三乘法而運載焉。然或魔障相陵必須禦侮禦侮之術莫若知彼敵情。敵情者西竺則韋陀東夏則經藉矣。故祇桓寺中有四韋陀院。外道以爲宗極。又有書院大千界內所有不同文書並集其中。佛俱許讀之。爲伏外道而不許依其見也。此土古德高僧能攝伏異宗者率由博學之故。譬如夷狄之人言語不通飲食不同孰能達其志通其欲其或微解胡語立便馴馴狘和矣。

是以習鑿齒道安以詆譖而伏之宗雷之輩慧遠以詩禮而誘之權無二復禮以辨惑而柔之陸鴻漸皎然以詩式而友之此皆不施他術唯通外學耳況乎儒道二教義理玄邈釋子既精本業何妨鑽極以廣見聞勿滯於一方也

晉支遁禪師座右銘

勤之勤之至道非孜奚爲淹滯弱喪神奇茫茫三界眇眇長羈考煩勞外湊冥心內馳殉赴欽渴緬邈忘疲人生一世涓考若露垂我身非我云云誰施達人懷德知安必危寂寥清舉潔累禪池謹守明禁雅說玄規

綏心神道抗志無爲。遼朗三蔽融治六疵。空洞五陰。虛豁四支。非指喻指絕而莫離。妙覺旣陳又玄其知。婉轉平任與物推移。過此以往勿思勿議。

周京師大中興寺道安法師遺誡九章以訓門人其詞曰

敬謝諸弟子等。夫出家爲道至重至難。不可自輕。不可自易。所謂重者。荷道佩德。縈仁負義。奉持淨戒。死而有已。所謂難者。絕世離俗。永割親愛。迴情易性。不同於眾。行人所不能行。割人所不能割。忍苦受辱。捐棄軀命。謂之難者。名曰道人。道人者。導人也。行必可。

履言必可法。被服出家。動爲法則。不貪不諍。不譏不匿。學問高遠。志在玄默。是爲名稱。參位三尊。出賢入聖。滌除精魂。故得君主不望其報。父母不望其力。普天之人。莫不歸攝。捐妻減養。供奉衣食。屈身俯仰。不辭勞恨者。以其志行清潔。通於神明。慊怕虛白。可奇可貴。自獲荒流。道法遂替。新學之人。未體法則。著邪棄正。忘其眞實。以小黠爲智。以小恭爲足。飽食終日。無所用心。退自推觀。良亦可悲。計今出家。或有年歲。經業未通。文字不決。徒喪一世。無所成名。如此之事。可不深思。無常之限。非旦卽夕。三塗苦痛。無強無弱。

師徒義深。故以申示。有情之流。可爲永誠。

其一曰

卿已出家。永違所生。鬚髮毀容。法服加行。辭親之日。上下涕零。剖愛榮道。意凌太清。當遵此志。經道修明。如何無心。故存色聲。悠悠竟日。經業不成。德行日損。穢積遂盈。師友慚恥。凡俗所輕。如是出家。徒自辱名。今故誨勵。宜當專精。

其二曰

卿已出家。棄俗辭君。應自誨勵。志果青雲。財色不顧。與世不羣。金玉不貴。惟道爲珍。約已守節。甘苦樂貧。

進德自度又能度人。如何改操趨走風塵。坐不暖席。馳驚東西。劇如徭役。縣官所牽。經道不通。戒德不全。朋友蚩弄。同學棄捐。如是出家徒喪天年。今故誨勵。宜各自憐。

其三曰

卿已出家。永辭宗族。無親無疎。清淨無欲。吉則不歡。凶則不感。超然縱容。豁然離俗。志存玄妙。軌眞守樸。得度廣濟。普蒙福祿。如何無心。仍著染觸。空諍長短。銖兩升斛。與世諍利。何異僮僕。經道不明。德行不足。如是出家徒自毀辱。今故誨示。宜自洗浴。

其四曰

卿已出家號曰道人。父母不敬。君帝不臣。普天同奉。事之如神。稽首致敬。不計富貧。尙其清修。自利利人。減割之重。一米七斤。如何怠慢。不能報恩。倚縱遊逸。身意虛煩。無戒食施。死入太山。燒鍊爲食。融銅灌咽。如斯之痛。法句所陳。今故誨約。宜改自親。

其五曰

卿已出家。號曰息心。穢襪不著。惟道是欽。志參清淨。如玉如冰。當修經戒。以濟精神。眾生蒙祐。并度所親。如何無心。隨俗浮沈。縱其四大。恣其五根。道德遂淺。

世事更深。如是出家與世同塵。今故戒約。幸自開神。
其六曰

卿已出家。捐世形軀。當務竭情。泥洹合符。如何擾動。
不樂閑居。經道損耗。世事有餘。清白不履。反入泥塗。
過影之命。或在須臾。地獄之痛。難可具書。今故戒勵。
宜崇典謨。

其七曰

卿已出家。不可自寬。形雖鄙陋。使行可觀。衣服雖麤。
坐起令端。飲食雖疎。出言可飡。夏則忍熱。冬則忍寒。
能自守節。不飲盜泉。不肖之供。足不妄前。久處私室。

如臨至尊。學雖不多。可齊上賢。如是出家。足報二親。宗族知識。一切蒙恩。今故誠汝。宜各自敦。

其八曰

卿已出家。性有昏明。學無多少。要在修精。上士坐禪。中士誦經。下士堪能。塔寺經營。豈可終日。一無所成。立身無聞。可謂徒生。今故誨汝。宜自端情。

其九曰

卿已出家。永違二親。道法革性。俗服離身。辭親之日。乍悲乍欣。邈爾絕俗。超出埃塵。當修經道。制已履真。如何無心。更染俗因。經道已薄。行無毛分。言非可貴。

德非可珍。師友致累。恚恨日殷。如是出家。損法辱身。思之念之。好自將身。

大唐慈恩法師出家箴

捨家出家。何所以。稽首空王。求出離。三師七證。定初機。鬚髮染衣。發宏誓。去貪瞋除鄙悋。十二時中常謹慎。鍊磨眞性。若虛空。自然戰退魔軍陣。勤學習尋師匠。說與同人。堪倚仗。莫教心地亂如麻。百歲光陰等閑喪。踵前賢。敦先聖。盡假聞思。修得證。行住坐臥。要精專。念念無差。始相應。佛眞經十二部。縱橫指示菩提路。不習不聽。不依行。問君何日心開悟。速須究似。

頭然。莫待明年與後年。一息不來卽後世。誰人保得此身堅。不蠶衣不田食。織女耕夫汗血力。爲成道業。施將來。道業未成爭消得。哀哀父哀哀母。嚙苦吐甘。大辛苦。就濕回乾。養育成。要襲門風繼先祖。一旦辭親求髡落。八十九十無依託。若不超凡越聖流。向此因循全大錯。福田衣降龍鉢。受用一生求解脫。若因小利繫心懷。彼岸涅槃爭得達。善男子汝須知。遭逢難得似今時。旣遇出家披縷褐。猶如浮木值盲龜。大丈夫須猛利。緊束身心莫容易。倘能行願力相扶。決定龍華親授記。

南嶽法輪寺省行堂記超然居士趙令矜撰

嘗謂諸苦之中。病苦爲深。作福之中。省病爲最。是故古人以有病爲善知識。曉人以看病爲福田。所以叢林爲老病之設。今叢林聚眾。凡有病使歸省行堂。不准修省。改行以退病。亦欲人散夜靜。孤燈獨照之際。究索大事。豈徒然哉。旣命知堂以司藥餌。又戒常住以足供須。此先佛之規制。近世不然。堂名延壽。鄙俚不經。病者不自省咎。補躬乖方。湯藥妄投。返成沈痼。至有酷疾。不參堂以務疎逸者。大失建堂命名之意也。知堂名存實廢。或同路人。常住惡於日用。殊不存。

撫。又復失優。波待老病之意也。由是病人呻吟痛楚。日益增極。過在彼此。非如來咎。縱有親故。問病率皆鄉曲故舊。心既不普。事忽有差。今法輪病所。免然一新。蓋有本分人是事。色色成辦。無可論者。惟有病人宜如何哉。省躬念罪。世之有識者。皆能達此。衲僧分上。直截機緣。當於頭痛額熱之時。薦取掉動底。於聲冤叫苦之際。領略徹困心密密究思。是誰受病人。既不見病從何來。人病雙亡。復是何物。直饒見得分明。正好爲他將息。

周渭濱沙門亡名法師息心銘

法界有如意寶人焉。久緘其身。銘其膺曰。古之攝心人也。誠之哉。誠之哉。無多慮。無多知。多知多事。不如息意。多慮多失。不如守一。慮多志散。知多心亂。心亂生惱。志散妨道。勿謂何傷。其苦悠長。勿言何畏。其禍鼎沸。滴水不停。四海將盈。纖塵不拂。五嶽將成。防未在本。雖小不輕。關爾七竅。閉爾六情。莫窺於色。莫聽於聲。聞聲者聾。見色者盲。一文一藝。空中小蚋。一伎一能。日下孤燈。英賢才藝。是爲愚蔽。捨弃淳樸。耽溺淫麗。識馬易奔。心猿難制。神旣勞役。形必損斃。邪徑終迷。修途永泥。英賢才能。是曰昏懵。滂拙羨巧。其德

不宏名厚行薄其高速崩塗舒汗卷收其用不恆內懷
僑伐外致怨憎或談於口或書於手要人令譽亦孔
之醜凡謂之吉聖謂之咎賞玩暫時悲憂長久畏影
畏迹逾走逾劇端坐樹陰迹滅影沈厭生患老隨思
隨造心想若滅生死長絕不死不生無相無名一道
虛寂萬物齊平何勝何劣何重何輕何貴何賤何辱
何榮澄天愧淨收皦日慚明安夫岱嶽固彼金城敬貽
賢哲斯道利貞

洞山和尚規誡

夫沙門釋子高上爲宗旣絕攀緣宜從淡薄割父母

之恩愛。捨君臣之禮儀。髣髴染衣持巾。捧鉢履出塵之徑路。登入聖之階梯。潔白如霜。清淨若雪。龍神欽敬。鬼魅歸降。專心用意。報佛深恩。父母生身。方霑利益。豈許結託。門徒追隨。朋友事持筆硯。馳騁文章。區區名利。役役趨塵。不思戒律。破卻威儀。取一生之容易。爲萬劫之艱辛。若敦如斯。徒稱釋子。

慈雲式懺主書紳

知白汝知日之所爲。害善之法。偏宜遠之。損惡之道。益其用之。口無自伐。心無自欺。勿抱內蠹。勿揚外儀。欲人之譽。畜己之私。殺義之始。陷禍之基。自恃其德。

必有餘譏。自矜其達。必有餘非。眷屬集樹。汝宜遠之。
利養毛蠅。汝宜畏之。釋而思之。懲惡之餘。何則是宜。
清香一炷。紅蓮數枝。口勿輟誦。意勿他思。安禪禮像。
其則勿虧。量衣節食。其志勿移。造世文筆。如佛戒之。
說人長短。如法慎之。縱對賓侶。口勿多辭。頻驚光影。
坐勿消時。芭蕉虛質。非汝久期。蓮華淨土。是汝真歸。
俾夜作晝。勤而行之。

願文

願我此身。安隱修道。離諸緣障。正法無難。國土豐樂。
常居林野。樂獨寂靜。衲衣菜食。隨分知足。常畏信施。

如禦強敵。常離眷屬。如遠大怨。常保禪慧。如護珍寶。常棄諸惡。如去弊疾。法衣錫杖。禦魔甲兵。繩牀香灌。資道調具。捨此之外。更無所貪。習俗生常。願莫相近。嗜欲名利。永非我徒。毀讚虛嚮。猶風過耳。安忍違從。志全道業。

圭峰密禪師座右銘

寅起可辦事。省語終寡尤。身安勤戒定。事簡疎交游。他非不足辨。已過當自修。百歲既有限。世事何時休。落髮墮僧數。應須侔上流。胡爲逐世變。志慮尙囂浮。四恩重山嶽。緇銖未能酬。蚩蚩居大廈。汲汲將焉求。

死生在呼吸。起滅若浮漚。無令方服下。番作阿鼻由。

白楊順禪師示眾

染緣易就。道業難成。不了目前萬緣差別。只見境風浩浩。彫殘功德之林。心火炎炎。燒盡菩提之種。道念若同情念。成佛多時。爲眾如爲己身。彼此事辦。不見他非我是。自然上敬下恭。佛法時時現前。煩惱塵塵解脫。

永明智覺壽禪師垂誡

學道之門。別無奇特。只要洗滌根塵。下無量劫來業識種子。汝等但能消除情念。斷絕妄緣。對世間一切

愛欲境界。心如木石相似。直饒未明道眼。自然成就
淨身。若逢真正導師。切須勤心親近。假使參而未徹。
學而未成。歷在耳根。永爲道種。世世不落惡趣。生生
不失人身。纔出頭來。一聞千悟。須信道真善知識。爲
人中最大因緣。能化眾生得見佛性。深嗟末世誰說
一禪。只學虛頭全無實解。步步行有口口談空。自不
責業力所牽。更教人撥無因果。便說飲酒食肉不礙
菩提。行盜行淫無妨般若。生遭王法死陷阿鼻。受得
地獄業消。又入畜生餓鬼。百千萬劫無有出期。除非
一念回光。立即翻邪爲正。若不自懺自悔。自度自修。

諸佛出來也。無救你處。若割心肝如木石相似。便可食肉。若喫酒如喫屎尿相似。便可飲酒。若見端正男女如死尸相似。便可行淫。若見已財他財如糞土相似。便可侵盜。饒你鍊得到此田地。亦未可順汝意在。直待證無量聖身。始可行世間逆順事。古聖施設豈有他心。只爲末法僧尼少持禁戒。恐賺他向善俗子。多退道心。所以廣行遮護。千經所說。萬論所陳。若不去浮。斷一切清淨種。若不去酒。斷一切智慧種。若不去盜。斷一切福德種。若不去肉。斷一切慈悲種。三世諸佛同口敷宣。天下禪宗一音演暢。如何後學略不

聽從。自毀正。因反行魔說。只爲宿熏業種。生遇邪師。善力易消。惡根難拔。豈不見古聖道。見一魔事。如萬箭攢心。聞一魔聲。如千錐剗耳。速須遠離。不可見聞。各自究心。慎莫容易。

八溢聖解脫門

禮佛者。敬佛之德也。念佛者。感佛之恩也。持戒者。行佛之行也。看經者。明佛之理也。坐禪者。達佛之境也。參禪者。合佛之心也。得悟者。證佛之道也。說法者。滿佛之願也。實際理地。不受一塵。佛事門中。不捨一法。然此八事。猶如四方四隅。闕一不可。前聖後聖。其揆

一也。六波羅蜜亦須兼行。六祖云。執空之人。滯在一隅。謂不立文字。自迷猶可。又謗佛經。罪障深重。可不戒哉。

大智照律師比丘正名

梵語苾芻。華言乞士。內則乞法以治性。外則丐食以資身。父母人之至親。最先割捨。鬚髮世之所重。盡以髡除。富溢七珍。棄之猶同於草芥。貴尊一品。視之何啻於煙雲。極厭無常。深窮有本。欲高其志。必降其身。執錫有類於枯藜。擎鉢何殊於破器。肩披壞服。卽是弊袍。肘串絡囊。便同席袋。清淨活命。已沾八聖道中。

儉約修身。卽預四依行內。九州四海都爲遊處之方。
樹下塚間。悉是棲遲之處。攀三乘之逸駕。蹈諸佛之
遺蹤。稟聖教以無違。眞佛弟子。遇世緣而不易。實大
丈夫。可以戰退魔軍。揮開塵網。受萬金之勝供。諒亦
堪消。爲四生之福田。信非虛託。乞士爲義。期斯之謂
乎。

捨緣銘

追遠報恩。棄儒從釋。刮磨舊習。洗滌世緣。截斷眾流。
壁立千仞。文章筆硯。盡把焚除。雪月風花。無勞嘲詠。
酒殺財色。更莫回頭。聲利榮華。豈須著眼。末流狂妄。

正法澆漓。但欲變形。何嘗涉道。雖云捨俗。俗習不除。
盡說出塵。塵緣不斷。纔親講肆。擬作闍黎。未入叢林。
望爲長老。避溺投火。豈覺盲癡。卻步求前。實爲顛倒。
釋心儒服。代不乏人。釋服儒心。世途目擊。律防麤暴。
禪息妄緣。深究苦空。常思厭離。邪師惡友。畏若豺狼。
善導良朋。親如父母。低心似地。緘口如愚。摧挫我人。
消停意氣。端居靜室。課念遣時。送想樂邦。一心待盡。
若能如此。吾復何憂。厥或不然。子當裁酌。

座右銘

四體不勤。百事無闕。端坐受用。寧知所來。但養穢軀。

鮮營淨福。縱懷慚恥。尙恐難堪。況處學庠。濫參聽教。求人長短。壞彼規繩。假託他緣。閃避眾法。輕陵先覺。熒惑後生。規度利名。結構朋黨。不遭惡疾。必有餘殃。虛費精神。終無成結。昇沈由己。善惡無門。福謝禍來。雖悔何及。斯言非妄。汝曹思之。

規繩後跋

咨爾學眾。聽吾直言。父母生身。義當侍養。師長受度。理合供承。而乃遠別鄉閭。躬棲講肆。是宜親仁擇善。建志立身。討論不棄於寸陰。持守無忘於跬步。若乃縱無明之逸馬。任業識之野猿。見善不遷。作惡無恥。

或遭責罰。或被擯治。豈不負累宗親。恥辱師傅。濫他
淨眾。枉彼施心。號無慚人。遭不如意。且依律檢略示
條章。來學同遵。令法久住。

緇門警訓卷第二終

緇門警訓卷第三

撫州永安禪院僧堂記無盡居士撰

古之學道之士。灰心泯志於深山幽谷之間。穴土以爲廬。紉草以爲衣。掬溪而飲。煮藜而食。虎豹之與鄰。猿狙之與親。不得已而聲名腥薌。文彩發露。則枯槁同志之士。不遠千里。裹糧躡屨來從之游。道人深拒而不受也。則爲之樵蘇。爲之舂炊。爲之灑掃。爲之刈植。爲之給侍奔走。凡所以效勞苦致精一。積月累歲。不自疲厭。覬師見而愍之。賜以一言之益。而超越死生之岸。烏有今日所謂堂殿宮室之華。牀榻臥具之

安。羶幄之溫。簟席之涼。窗牖之明。巾單之潔。飲食之盛。金錢之饒。所須而具。所求而獲也哉。嗚呼。古之人。吾不得而見之矣。因永安禪院之新。其僧堂也。得以發吾之緒言。元祐六年冬十一月。吾行郡過臨川。聞永安主僧老病物故。以兜率從悅之徒。了常繼之。常陞座說法。有陳氏子一。歷耳根。生大欣慰。謂常曰。諦觀師誨。前此未聞。當有淨侶雲集。而僧堂狹陋。何以待之。願出家貲百萬。爲眾更造。明年堂成。高廣宏曠。殆甲江右。常遣人來求文曰。公迫常於山而及此也。幸卒成之。吾使謂常擊鼓集眾。以吾之意而告之曰。

汝比丘此堂旣成。坐臥經行。惟汝之適。汝能於此帶
刀而眠。離諸夢想。則百丈卽汝。汝卽百丈。若不然者。
昏沈睡眠。毒蛇伏心。暗冥無知。晝入幽壤。汝能於此
跏趺宴坐。深入禪定。則空生卽汝。汝卽空生。若不然
者。獼猴在檻外。覩檀栗。襍想變亂。坐化異類。汝能於
此橫經而誦。研味聖意。因漸入頓。因頓入圓。則三藏
卽汝。汝卽三藏。若不然者。春禽晝啼。秋虫夜鳴。風氣
所使。曾無意謂。汝能於此閱古人話。一見千悟。入紅
塵裏。轉大法輪。則諸祖卽汝。汝卽諸祖。若不然者。狗
齧枯骨。鴟啄腐鼠。鼓喙呀唇。重增饑火。是故析爲垢

淨。列爲因果。判爲情想。感爲苦樂。漂流汨溺。極未來際。然則作此堂者。有損有益。居此堂者。有利有害。汝等比丘。宜知之。汝能斷毗盧髻。截觀音臂。剗文殊目。折普賢脛。碎維摩座。焚迦葉衣。如是受者。黃金爲瓦。白銀爲壁。汝尙堪任。何況一堂。戒之勉之。吾說不虛。了常諮參。悅老十餘年。盡得其末後大事。蓋古德所謂金剛王寶劍云。元祐七年十二月十日。南康赤烏觀雪夜。擁爐書以爲記。

禪月大師大隱龜鑑

在塵出塵。如何處身。見善努力。聞惡莫親。縱居暗室。

如對大賓。樂情養性。逢危守貧。如愚不愚。修仁得仁。
謙讓爲本。孤高作鄰。少出爲貴。少語最珍。學無廢日。
時習知新。榮辱慎動。是非勿詢。常切責已。切勿尤人。
抱璞則足。興文厄陳。不暇古聖尙爾。吾徒奚伸。安聞世俗。
自任天真。奇哉快哉。坦蕩怡神。

右街寧僧錄三教總論

問曰。略僧史求事端。其故何也。荅曰。欲中興佛道。令
正法久住也。曰。方今天子重佛道。崇玄門。行儒術。致
太平已中興矣。一介比丘力輪何轉。而言中興佛道。
耶。荅曰。更欲助其中興耳。苟釋氏子不知法不修行。

不勤學科。不明本起。豈能副佐弗帝王之興乎。或曰。子有

何力。令正法久住乎。荅曰。佛言。知法。知摩夷。護持。攝受。可令法不斷也。又曰。諸師已廣著述。何待子之爲耶。荅曰。古人著述。用則闕如。曾不知三教循環終而復始。一人在上高而不危。有一人故。奉三教之興。有三教故。助一人之理。且夫儒也者。三王以降。則宣用而合宜。道也者。五帝之前。則冥符於不宰。昔者馬史躋道在九流之上。班書拔儒冠藝文之初。子長欲反其朴而還其淳。尙帝道也。孟堅思本其仁而祖其義。行王道焉。自夏商周至於今。凡幾百千齡矣。若用黃

老而治。則急病服其緩藥矣。由此仁義薄。禮刑生。越其禮而逾其刑。則儒氏拱手矣。釋氏之門。周其施用。以慈悲變暴惡。以喜捨變慳貪。以平等變冤親。以忍辱變瞋害。知人死而神明不滅。知趣到而受業還生。賞之以天堂。罰之以地獄。如範脫土。若模鑄金。邪範漏模。寫物定成其寢陋。好模嘉範。傳形必告其端嚴。事匪口談。人皆目擊。是以帝王奉信。羣下歸心。草上之風。翕然而偃。而能旁憑老氏。兼假儒家。成智猶待於三愚。爲邦合遵於眾聖。成天下之亶亶。復終日之乾乾。之於御物也。如臂使手。如手運指。或擒或縱。何

往不臧邪。夫如是則三教是一家之物。萬乘是一家之君。視家不宜偏愛。偏愛則競生。競生則損教。已在其內自然不安。及已不安則悔損其教。不欲損教則莫若無偏。三教既和故法得久住也。且如秦始焚坑儒術。事出李斯。後魏誅戮沙門。職由寇謙之。崔浩。周武廢佛道二教。矜衒己之聰明。蓋朝無正人。唐武宗毀除寺像。道士趙歸真率劉玄靖同力謗誣。李朱崖影助。此四君諸公之報驗。何太速乎。奉勸吾曹。相警互防。勿罹愆^過失。帝王不容法從何立。況道流守寶不爲天下先。沙門何妨饒禮以和之。當合佛言一切恭

信。信於老君先聖也。信於孔子先師也。非此二聖。曷能顯揚釋教。相與齊行。致君於犧黃之上乎。苟弗斯言。譬無賴子弟。無端鬪競。累其父母。破產遭刑。然則損三教之大猷。乃一時之小失。日月食過。何損於明。君不見秦焚百家之書。聖人預已藏諸屋壁。阮之令勦絕。楊馬二戴相次而生。何曾無噍類耶。梁武捨道後。魏勃興。拓跋誅僧子孫。重振後周。毀二教。隨牽復之。武宗陷釋門。去未旋踵。宣宗十倍興之。側掌豈能截河漢之流。張拳不可暴虎兕之猛。況爲僧莫若道安。安與習鑿齒交游。崇儒也。爲僧莫若慧遠。遠送陸

修靜過虎溪。重道也。余慕二高僧。好儒重道。釋子猶或非之。我旣重他。他豈輕我。請信安遠行事。其可法也。詩曰。伐柯伐柯。其則不遠。孟子曰。天時不如地利。地利不如人和。斯之謂歟。

傳禪觀法

禪法濫觴自於秦世。僧叡以法師序關中。出禪經。其文則明心達理之趣也。然譬若使其方未能修合。弗聞療疾。徒曰醫書。矧以大教旣敷。羣英分講。註之者矜其辭義。科之者逞其區分。執塵搖松。但尙其乘機。應變。解紛挫銳。唯觀其智刃辭鋒。都忘其詮。不求出

離江表遠公慨禪法未敷於是苦求而得也菩提達磨祖師觀此土之根緣對一期之繁紊而宣言曰不立文字遣其執文滯逐也直指人心明其頓了無生也其機峻其理圓故不免漸修之徒篤加訕謗傳禪法者自達磨爲始焉直下相繼六代傳衣橫枝而出不可勝紀如曹溪寶林傳所明也道法師箋本於直指人心下削本今

依舊本補入

洪州寶峰禪院選佛堂記丞相張商英撰

崇寧天子賜馬祖塔號慈應諡曰祖印歲度僧一人以奉香火住山老福深卽祖殿後建天書閣承閣爲

堂以選佛名之。使其徒請記於予。予三辭而請益堅。余謂之曰。古人謂選佛而及第者。涉乎名言爾。子以名堂。予又記之。無乃不可乎。憐子之勤謾爲之記。夫選者。選擇之謂也。有去有取。有優有劣。施之於科舉。用之於人才。此先王所以厲世磨鈍之具。非所以選佛也。使佛而可選也。取六根乎。取六塵乎。取六識乎。取三六則一切凡夫皆可以作佛。去三六則無量佛法誰修誰證。取四諦六度七覺八正九定十無畏。乃至十八不共法。三十七助道品乎。取之則有法也。去四諦六度。乃至三十七助道品乎。去之則無法也。去

取有無。眇然如絲之畱於心中。歛然如埃之入乎胸。次此在修多羅藏。或謂之二障。或謂之四病。或謂之不了義。或謂之戲論。或謂之遍計邪見。或謂之微細流注。取之非佛也。去之非佛也。不去不取亦非佛也。佛果可以選乎。曰先生之論相宗也。吾祖之論禪宗也。凡與吾選者。心空而已矣。弟子造堂而有問。宗師踞坐而有荅。或示之以玄要。或示之以料揀。或示之以法鏡三昧。或示之以道眼因緣。或示之以向上一路。或示之以末後一句。或示之以當頭。或示之以平實。或揚眉瞬目。或舉拂敲牀。或畫圓相。或劃一畫。或

拍掌或作舞。契吾機者。知其心之空也。知其心之空。則佛果可以選矣。余曰。世尊舉花。迦葉微笑。正法眼藏。如斯而已矣。後世宗師之所指示。何其紛紛之多乎。吾恐釋氏之教。中衰於此矣。深河東人也。甘麤糲耐辛苦。久從關西真淨遊。孤硬卓立。必能宏其教。蓋釋氏之教。枯槁以遺其形。寂寞以灰其慮。戒定密行。鬼神所莫窺。慈悲妙用。幽顯所同仰。迫而後應。則吾眾喪其伴侶。不得已而後言。則六聚亡其畛域。生死之變。人之所畏也。吾未嘗有生。安得有死。則奚畏之。有利害之境。人之所擇也。吾未嘗有利。安得有害。則

奚擇之爲。夫如是則不空於外。而內自空。不空於境。而心自空。不空於事。而理自空。不空於相。而性自空。不空於空。而空自空。空則等等則大。大則圓圓則妙。妙則佛。嗟乎。吾以此望子。子尙無忽哉。

三祖鏡智禪師信心銘

至道無難。唯嫌揀擇。但莫憎愛。洞然明白。毫釐有差。天地懸隔。欲得現前。莫存順逆。違順相爭。是爲心病。不識玄旨。徒勞念靜。圓同太虛。無欠無餘。良由取捨。所以不如。莫逐有緣。勿住空忍。一種平懷。泯然自盡。止動歸止。止更彌動。唯滯兩邊。寧知一種。一種不通。

兩處失功。遣有沒有。從空背空。多言多慮。轉不相應。絕言絕慮。無處不通。歸根得旨。隨照失宗。須臾返照。勝卻前空。前空轉變。皆由妄見。不用求真。唯須息見。二見不住。慎莫追尋。纔有是非。紛然失心。二由一有。一亦莫守。一心不生。萬法無咎。無咎無法。不生不心。能隨境滅。境逐能沈。境由能境。能由境能。欲知兩段。元是一空。一空同兩。齊含萬象。不見精麤。寧有偏黨。大道體寬。無易無難。小見狐疑。轉急轉遲。執之失度。必入邪路。放之自然。體無去住。任性合道。逍遙絕惱。繫念乖真。昏沈不好。不好勞神。何用疎親。欲取一乘。

勿惡六塵。六塵不惡。還同正覺。智者無爲。愚人自縛。
法無異法。妄自愛著。將心用心。豈非大錯。迷生寂亂。
悟無好惡。一切二邊。良由斟酌。夢幻虛華。何勞把捉。
得失是非。一時放卻。眼若不睡。諸夢自除。心若不異。
萬法一如。一如體玄。兀爾忘緣。萬法齊觀。歸復自然。
泯其所以。不可方比。止動無動。動止無止。兩旣不成。
一何有爾。究竟窮極。不存軌則。契心平等。所作俱息。
狐疑盡淨。正信調直。一切不留。無可記憶。虛明自照。
不勞心力。非思量處。識情難測。眞如法界。無他無自。
要急相應。唯言不二。不二皆同。無不包容。十方智者。

皆入此宗。宗非促延。一念萬年。無在不在。十方目前。極小同大。忘絕境界。極大同小。不見邊表。有卽是無。無卽是有。若不如此。必不須守。一卽一切。一切卽一。但能如是。何慮不畢。信心不二。不二信心。言語道斷。非去來今。

戒定慧三學

資持云。一切佛法。不出三學。以眾生迷心爲惑。動慮成業。由業感報。生死無窮。欲脫苦果。要除苦因。故先以戒治其業。次以定慧澄其惑。業分善惡。故止作兩行。以相翻。惑唯昏散。故定慧二法而對破。病因藥差。

機藉教修。然後業盡惑除。情亡性顯。教門雖廣。豈越於斯。

釋法四依

則見祖懷究竟指歸唯在了義

依法不依人者。人唯情有法。乃軌模性空正理。

性空通大

也。小體離非妄。即用此法爲正法。依涅槃極教盛明斯

轍。

涅槃云依法者卽是法性不依人者卽是聲聞緣覺

若能反彼俗心。憑準聖

量。隱心行務。知非性空。秉持此心。以爲道路。一分知

非明順空理。一分觀厥明違有事。如此安心。分明修

趣。法性眞道。

依義不依語者。語是言說。止是張筌。義爲達理。化物

之道

化猶變也

證解已後。絕慮杜言。法尙應捨。何況非法。

故經有捨筏之喻。人懷目擊之談。

莊子云目擊而道存

豈不以

言詮意表。得意息言。月喻妙指。無宜不曉。

上明義假語顯見義

捨語也

今謂得義。義乃是言。眞行道者。常觀常破。常觀

依語常破。隨義謂言。隨義還是誦言。

上謂得義忘言。仍須遣義無有

也

依智不依識者。識謂現行。隨塵分見。眼色耳聲。耽

迷不覺。與牛羊而等度。同邪凡而共行。

上明六識妄念人畜共依

故有淪墜已下令依佛智。卽唯識觀。今損過漸明也。

大聖示教。境是自心。下愚

冰執塵爲識外。所以化導無由。捨之。是知滯歸凡識。

倒遣聖心。愚迷履歷常淪三倒。勇勵特達。念動卽知。

知倒難清。名爲依識。知流須返。名隨分智。如是加功。漸增明大。後見塵境。知非外來。境非心外。是自心相。安有愚迷。生憎生愛。思擇不已。解異牛羊。

依了義經。不依不了義經者。此之兩經。並聖言量。凡入道者。率先曉之。則無壅不通。有疑皆決。但爲羣生性識深淺利鈍不同。致令大聖隨情別說。然據至道。但是自心。故經云。三界上下法。我說唯是心。此就世界依報以明心也。又云。如如與真際。涅槃及法界。種種意生身。佛說唯心量。此據出世法體以明心也。終窮至實畢。到斯源。隨流赴感。還宗了義。

戒唯佛制不通餘人

行宗云。大千界內佛爲法王。律是佛敕。唯聖制立。自餘下位。但可依承。良以如來行果極圓。窮盡眾生輕重業性。等覺已下。猶非所堪。況餘小聖。輒敢擬議。有如國家賞罰。號令必從王出。臣下僭越。庶人失信。亡敗無日。佛法亦爾。若容他說。羣生不奉。法不久住。故也。

撮略諸文以歎戒法

資持引標宗云。是汝大師以能軌物也。或云人足能有所至也。或云大地生成住持也。道品樓柱聖道所

依也。禪定城郭。定慧所憑也。乃至如池如鏡。如纓絡。如頭如器。又智論中。如重寶如命。如船如鳥翅等。尋之可知。又篇聚中。先明戒護。具列八喻。如王小子。如月光。如如意珠。如王一子。如人一目。如貧資糧。如王好國。如病良藥。又戒大序。如海無涯。如寶無厭。僧祇戒本。如猿猴鎖。如馬轡勒。廣在經律。不復繁引。良以戒德高廣。故非一物可喻。偏舉諸像。各得一端。不能全似。

佛在世時偏宏戒法

又云。雖談眾典。然於毗尼最所畱意。故篇聚云。世尊

處世深達物機。凡所施爲。必以威儀爲主是也。又經通餘人所說。律唯金口親宣。大權影響。但知祇奉。況餘小聖。安敢措詞。又復諸經說有時限。律則通於始終。義鈔云。始於鹿苑。終至鶴林。隨根制戒。乃有萬差等。具斯三意。永異餘經。偏宏之言。想無昧矣。

示僧尼戒相廣略

鈔云。問律中僧列二百五十戒。戒本具之。尼則五百。此言虛實。五百之言乃出智論與律不同故問決之。答兩列定數。約指爲

言。約卽略也。故諸部通言。不必依數。論其戒體。唯一無作。

約境明相。乃量塵沙。且指二百五十以爲持犯蹊徑。

耳律中尼有三百四十八戒。可得指此而爲所防。今準智論云。尼受戒法略則五百。廣則八萬。僧則略有二百五十。廣亦同尼律儀。

度尼教意

業疏云。女人機發。

律中佛姨母大愛道尼同五百女人求佛出家

深厭生死

求佛出家。以無宏道遠化益故。抑而不許。後還舍衛。便自鬚髮披衣。依僧坊立。祈聽受戒。時爲三請。便授敬法。必具依行。卽感具戒。記云。女性鄙弱人少敬信。故無弘化之益。反更毀辱正法減半。由佛不許。卻還城中。輒自變形復自祇桓倚門而住。阿難代請佛。令

傳教能行八敬。卽與出家。愛道等聞。卽發具戒。疏又云二十眾。受者爲明。女報惑深智淺。喜生慢怠。必欲受具。僧尼各十方發勝心。又云。若依神州。自宋已前。究勘僧史。尼一眾受。謂從大僧一眾邊受如諸律中。八敬受者。但專愛道。餘五百尼。十一眾受。故求那跋摩。此翻功德鎧聖者言。若無二眾。但一眾受。如愛道之緣者得也。何以知然。及論本法止前方便。未有可成。還約僧中羯磨。方感。後師子國鐵索羅等十一尼。學宋語通。方二眾受。

尼八敬法

事鈔尼眾篇云。善見佛初不度女人出家。爲滅正法五百年。後爲說八敬聽出家。依教行故。還得千年。今時不行隨處法滅。會正記云。佛成道後十四年。姨母求出家。佛不許度。阿難爲陳三請。佛令慶喜傳八敬向說。若能行者。聽汝出家。彼云。頂戴持言八敬者。一者。百歲比丘尼見初受戒比丘。當起迎送禮拜問訊。請令坐。二者。比丘尼不得罵謗比丘。三者。不得舉比丘罪說其過失。比丘得說尼過。四者。式叉摩那已學於戒。應從眾僧求受大戒。五者。尼犯僧殘。應半月在二部僧中行摩那埤。六者。尼半月內當於僧中求教。

授人七者。不應在無比丘處夏安居。八者。夏訖當詣僧中求自恣人。如此八法。應尊重恭敬讚歎。盡形不應違。

出家超世

業疏云。橫約諸有無思離染。故樹出家樂處閑靜。若有貪著終成金鎖。引出方便唯斯一道。如華手經云。有四法轉身卽在善來比丘蓮華化生。現增壽命。一者。自樂出家。亦勸助人令欣出家。二者。求法無倦。亦勸他人。三者。自行和忍。亦勸他行。四者。習行方便。深發大願。又出家功德經云。若能放人出家受戒功德。

無邊。譬如四天下滿中羅漢。百年供養。不如有人爲涅槃。故於一日夜出家受戒。謂猶前施。雖多有竭。是欲界繫。爲法出家。非三界業。故說過前。又云。縱起寶塔至忉利天亦劣。出家功德者。一時欣出。雖未可數。然其積微。是高勝本。

沙彌五德

鈔引福田經云。一者發心出家。懷佩道故。二者毀其形好。應法服故。三者委棄身命。遵崇道故。四者永割親愛。無適莫故。五者志求大乘。爲度人故。記云。此之五德。出家大要。五眾齊奉。不唯小眾。終身行之。不唯

初受。又業疏云。斯德始終通於五眾。俱堪物養。人天師範。故使誦持無輕。受體及形服也。

三衣興意

鈔引薩婆多云。欲現未曾有法。故一切九十六種外道。無此三名爲異外道。故分別功德論爲三時。故制有三衣。冬則著重。夏則著輕。春則著中。亦爲諸虫故。智論云。佛聖弟子住於中道。故著三衣。外道裸身無恥。白衣多貪重著也。十誦爲異外道。故便以刀截。知是慚愧人衣。襍含經云。修四無量者。並鬚鬚髮服三法衣出家也。準此而名。則慈悲者之服。華嚴云。著袈

袈者捨離三毒等。四分云。懷抱於結。使不應著袈裟。薩婆多五意制三衣也。一衣不能障寒。三衣能障故。二不能有慚愧。三不中入聚落。四乃至道行不生善。五威儀不清淨。故制令畜三便具上義。僧祇云。三衣者。賢聖沙門標幟。鉢是出家人器。非俗人所爲。應執持三衣瓦鉢。卽是少欲。少是等。當宗外部多爲寒。故制三四分。又云。三世如來並著如是衣。故業疏云。如律中說。如來因諸比丘畜長。不自節約。是以初夜著一衣。乃至後夜著第三。明旦因制如衣法初。

引示袈裟功能

又引大悲經云。但使性是沙門。汙沙門行。形是沙門。披著袈裟者。於彌勒乃至樓至佛所。得入涅槃。無有遺餘。悲華經云。如來於寶藏佛所發願。成佛時我袈裟有五功德。一者入我法中。或犯重邪見等四眾。於一念敬心尊重。必於三乘受記。二者天龍人鬼若能恭敬此人。袈裟少分。卽得三乘不退。三者若有鬼神諸人得袈裟。乃至四寸飲食充足。四者若眾生共相違反。念袈裟力。尋生悲心。五者若在兵陣持此小分。恭敬尊重。常得勝他。若我袈裟無此五力。則欺十方諸佛。濟緣引賢愚經云。佛告阿難。古昔無量阿僧祇

劫此閻浮提於山林中有一師子名踰迦羅毗

秦言堅誓

軀體金色光相明顯時獵師鬚頭著袈裟內佩弓箭以毒箭射之師子驚覺卽欲馳害見著袈裟念言此人不久必得解脫所以者何此染衣者三世聖人標相我若害之則爲惡心向三世聖賢

大教永斷繒綿皮物

鈔又引央掘經繒綿皮物若展轉來離殺者手施持戒人不應受者是比丘法若受者非悲不破戒涅槃云皮革履屣憍奢耶衣如是衣服悉皆不畜是正經律今有一方禪眾皆著艾布豈非順教

記云。已前律制。但據蠶家。大教轉來。不許受用。乃知
聲聞行劣。但取離非。菩薩慈深遠。推來處。雖離殺手
無非殺來足踏。坐具也身披。三衣也皆霑業分。非大士可
忍。豈比丘所宜。請考經文。少懷信仰。廣敘利害。見章
服儀。離殺手者。非蠶家故。不受者。應法大小俱順故。
受者。非悲違大順小故。小從大出。望制雖順約義還
違。故知持戒行慈。方符聖旨。縱情受用。全乖道儀。故
章服儀云。且自非悲之語。終爲永斷之言。據此爲論
頗彰深切。次引涅槃。乃終窮囑累。決了正教明文。制
斷。何得遲疑。

舉現事以斥妄行

記云。據僧傳中所敘。南嶽道休二師。不衣綿帛。並服艾絮。故南山律師云。佛法東漸。幾六百載。唯斯衡嶽。慈行可歸。今時禪講。自謂大乘。不拘事相。綾羅鬪美。紫碧爭鮮。肆恣貪情。背違聖教。豈不聞衡嶽。但服艾絮。以御風霜。天台四十餘年。唯披一衲。永嘉食不畊鉏。衣不蠶口。荆溪大布而衣。一牀而居。良由深解大乘。方乃專崇苦行。請觀祖德。勿染邪風。則稟教修身。眞佛子矣。

示衣財體如非

業疏云。但以邪心有涉貪染。爲利賣法。禮佛讀經。斷食諸業。所獲贓賄。皆曰邪命物。正乖佛化。故特制也。如經中說。比丘持糞掃衣。就河所洗。諸天取汁用洗自身。不辭穢也。外道持淨氎。次後將洗。諸天遙遮。勿汚池也。由邪命得體不淨。故以此文證心清淨者。是正本也。雖求清淨財體應法。綾羅錦繡俱不合。故世多用絹細者。以體由害命。特須制約。今五天及諸胡僧俱無用絹作袈裟者。親問彼云。以衣爲梵服。行四無量。審知行殺而故服之。義不應也。以法衣順道。錦色班綺。耀動心神。青黃五彩。眞紫上色。流俗所貪。故

齊削也。資持云。感通傳中天人云。佛法東傳六七百載。南北律師曾無此意。安用殺生之財。而爲慈悲之服。師何獨拔此意。南山荅曰。余因讀智論。見佛著麤布伽梨。因懷在心。何得乖此。及聽律後。便見蠶衣臥具。縱得已成。並斬壞塗墍。由此重增景仰。又云。復見西來梵僧。咸著布氎。具問荅云。五天竺國無著蠶衣。由此興念著章服儀等。義淨三藏內法傳中。反加毀誹。彼學小乘。有部故多偏執。今宗大乘了義。非彼所知。

示敬護三衣鉢具法

事鈔云十誦護三衣如自皮鉢如眼目乃至云所行之處與衣鉢俱無所顧戀猶如飛鳥若不持三衣入聚落俗人處犯罪僧祇亦云比丘三衣一鉢須常隨身違者出界結罪除病當敬三衣如塔想五分三衣謹護如身薄皮常須隨身如鳥毛羽飛走相隨四分行則知時非時不行所行之處與衣鉢具猶如飛鳥羽翮相隨諸部並制隨身今時但護離宿不應教矣記云今時希有護宿何況常隨多有畢生身無法服是則末世護宿猶爲勝矣但內無淨信慢法輕衣眞出家兒願遵聖制業疏云所以衣鉢常隨身者由出

家人虛懷爲本。無有住著。有益便停。故制隨身若任
畱者。更增餘習。於彼道分。曾無思擇。故有由也。

示開制本緣

資持云。象鼻者。卽犯眾學不齊整。戒文注顯然。今皆
垂肘。豈知步步越儀犯吉。今準感通傳天人所示。凡
經四制。世多迷執。略爲引之。彼云。元佛初度五人。爰
及迦葉兄弟。並制袈裟左臂。坐具在袈裟下。西土王
臣皆披白氎。搭左肩上。故佛制衣角居臂異俗。此制也
後徒似漸多。年少比丘儀容端美。入城乞食。多爲女
愛。由是制衣角在肩後。爲風飄聽。以尼師壇鎮之。此

也制後有比丘爲外道難言袈裟旣爲可貴有大威靈

豈得以所坐之布而居其上比丘不能答以事白佛

由此佛制還以衣角居於左臂坐具還在衣下此三制也

於後比丘著衣不齊整外道譏言狀如婬女猶如象

鼻由此始制上安鉤紐令以衣角達於左臂達卽至也置

於腋下不得令垂如上過也今須準此乍可挑著左肩若垂臂肘定判非法

步步結罪舊云今在左臂爲正但不得垂炎角者非也

鉢制意

事鈔引僧祇云鉢是出家人器非俗人所宜十誦云

鉢是恆沙諸佛標誌不得惡用善見云三乘聖人皆

執瓦鉢乞食資生。四海以爲家居。故名比丘。中阿含云。鉢者。或名應器。言體者。律云。大要有二泥及鐵也。五分律云。有用白銅鉢者。佛言。此外道法。若畜得罪。佛自作鉢。坯以爲後式。十誦律云。畜金銀木石等鉢。非法得罪。言色者。四分云。應熏作黑色赤色。律文廣有熏法。素瓦白鐵油塗者。並爲非法。言量者。四分云。大受三斗小受斗半。中品可知。此律姚秦時譯。彼國用姬周之斗。若準唐斗。上鉢受一斗。下者五升。乃至云。然則諸部定量雖無一指。然多三斗斗半爲限。但此器名應器。須依教立律云。量腹而食。度身而衣。趣

足而已。言通增減必準正教。

坐具教意

鈔引四分爲身爲衣爲臥具故。制長佛二揲。吒革手廣一揲手半。廣長更增半揲手。諸部論揲不定。今依五分佛一揲手。長二尺準唐尺。則一尺六寸七分。強此用二尺爲揲手準。姬周尺也。十誦云。新者二重。故者四重。伽論亦同。鼻柰耶云。新尼師壇。故者緣四邊以亂其色。若作者應安緣。五分須揲四角。不揲則已。四分云。若減量作。若疊作兩重並得。十誦不應受單尼師壇。離宿吉羅。摩得伽云。離宿不須捨墮。非佛制故。

亦不應離宿。記云。爲身者。恐坐地上有所損故。次爲
衣者。恐無所藉。三衣易壞故。爲臥具者。恐身不淨。汗
僧牀榻故。

緇門警訓卷第三終

緇門警訓卷三

三

三

緇門警訓卷第四

漉囊教意

鈔云。物雖輕小。所爲極大。出家慈濟。厥意在此。今上品高行。尙飲蟲水。況諸不肖焉。可言哉。故律中爲重蟲命。偏制飲用。二戒由事常現。有用者多數故也。記云。出家之人。修慈爲本。慈名與樂。無殺爲先。物類雖微。保命無異。此乃行慈之具。濟物之緣。大行由是而生。至道因茲而剋。同儔負識。勿以爲輕。

引大教說淨以斥倚濫

資持引地持論云。菩薩先於一切所畜資具。爲非淨

故以清淨心捨與十方諸佛菩薩。如比丘將現前衣物。捨與和尚闍黎等。涅槃云。雖聽受畜。要須淨施。篤信檀越。是也。今時講學。專務利名。不恥五邪。多畜八穢。但隨浮俗。豈念聖言。自下壇場。經多夏臘。至於淨法。一未霑身。寧知日用所資。無非穢物。箱囊所積。並是犯財。慢法。欺心。自貽伊戚。學律者知而故犯。餘宗者固不足言。誰知報逐心成。豈信果由種結。現見袈裟離體。當來鐵葉纏身。爲人則生處貧窮。衣裳垢穢。爲畜則墮於不淨。毛羽腥臊。況大小兩乘。通名淨法。倘懷深信。豈憚奉行。故荆溪禪師輔行記云。有人言。

凡諸所有非已物想。有益便用說淨何爲。今問等非已財。何不任於四海。有益便用。何不直付兩田。悲敬二田而閉之深房。封於囊篋。實懷他想。用必招愆。盜犯謂已財。仍違說淨。說淨而施。於理何妨。任已執心。後生做做。故知不說淨人。深乖佛意。兩乘不攝。三根不收。若此出家。豈非虛喪於戲。

八財不淨長貪壞道

鈔云。一田宅園林。二種植生種。三貯積穀帛。四畜養人僕。五養繫禽獸。六錢寶貴物。七氊褥釜鑊。八象金飾牀及諸重物。此之八名。經論及律盛列通數。顯過

不應。又律經言。若有畜者。非我弟子。五分亦云。必定不信我之法律。由此八種皆長貪壞道。汙染梵行。有得穢果。故名不淨也。乃至云。律中在事小機意狹。故多開畜。又涅槃云。若諸弟子無人供須時。世饑饉。飲食難得。爲欲護持建立正法。我聽弟子受畜金銀車乘。田宅穀米貿易所須。雖聽受畜。如是等物要須淨施。篤信檀越。記云。上明大乘機教俱急。下明小乘機教俱緩。律在事者違事故。輕則顯經宗。於理違理。故重小機意狹。不堪故開反上。大乘堪任故重。世人反謂小乘須戒。大教通方。幾許悞哉。

勸廣開懷利隨道擁

僧綱篇云。眞誠出家者。怖四怨之多苦。厭三界之無常。辭六親之至愛。捨五欲之深著。良由虛妄之俗可棄。眞實之道應歸。是宜開廓遠意。除蕩鄙懷。不吝身財。護持正法。況僧食十方普同彼取。自分理應隨喜。而人情忌慳^慳。用心不等。或有閉門限礙。客僧者。不亦蚩乎。鳴鐘本意。豈其然哉。出家捨著。尤不應爾。但以危脆之身。不能堅護正法。浮假之命。不肯遠通僧食。違諸佛之教。損檀越之福。傷一時眾情。塞十方僧路。傳謬後生所敗遠矣。改前迷而復道。不亦善哉。

獨慳食
我四

餓鬼之業。或問僧事有限。外客無窮。以有限之食供是謂大迷。

無窮之僧。事必不立。荅曰。此乃鄙俗之淺度。瑣人之短懷。豈謂清智之深識。達士之高見。夫四輩之供養。三寶之福田。猶天地之生長。山海之受用。何有盡哉。故佛藏經言。當一心行道。隨順法行。勿念衣食所須者。如來白毫相中一分。供諸一切出家弟子。亦不能盡。由此言之。勤修戒行。至誠護法。由道得利。以道通用。乃至云。俗教尙謂憂道不憂貧。況出家之士。高超俗表。不憂護法而憂飲食。其失大甚也。

辯燒身指大小相違

資持云義淨三藏寄歸傳廣斥世人燒身然指意謂
菩薩大士之行非出家比丘所宜古來章記相傳引
誠講者寡聞用爲口實此由不知機有淺深教分化
制律明自殺方便偷蘭燒指然香違制得吉梵網所
制若不燒身臂指非出家菩薩犯輕垢罪此蓋小機
急於自行期盡報以超生大士專在利他歷塵劫而
宏濟是以小律結其大過大教歎其深功況大小兩
教俱是聖言一抑一揚豈容乖異且經明出家菩薩
那云不許比丘彼云捨身非沙門所爲等傳列苦行遺身豈是專
存通俗彼云經中所荆溪所謂依小不燒則易依大

燒之則難。保命貪生物情皆爾。今以義判。且爲三例。
一若本白衣不在言限。或全不受戒。依此經中足指
供養勝施國城。若依梵網直受大戒。順體奉持。然之
彌善。二若單受小戒。位局比丘。不燒則順本成持。燒
之則依篇結犯。三若兼受大戒。名出家菩薩。燒則成
持。不燒則成犯。若先小後大。或先大後小。並從大判。
不犯律儀。若此以明麤分進否。豈得雷同一概頓斥
爲非。然有勇暴之夫。情存矯誑。邀人利養。規世聲名。
故壞法門。乃佛教之大賊。自殘形體。實儒宗之逆人。
直是惡因。終無善報。今時頗盛驚俗。豈知則義淨之

誠亦有取矣。

律制襍學以妨正業

鈔文云。五分云。爲知若會等。

知事差餽及法食會集等

學書不得

爲好廢業。不聽卜相及問他吉凶。四分開學誦文書。

及學世論爲伏外道。襍法中新學比丘開學算法。十

誦好作文頌莊嚴章句。是可怖畏不得作。毗尼母論

佛言。吾教汝一句一偈。乃至後世應行者卽行之。不

應行者亦莫行之。後世比丘所說亦爾。記云。以書算

卜術俗典文頌。俱是世法。非出家業。爲因緣故時復

開之。今時釋子名實俱喪。能書寫則稱爲草聖。通俗

與則自號文章。擇地則名爲山水。卜術則呼爲三命。豈意捨家事佛。隨順俗流之名。本圖厭世超昇。翻集生死之業。故智論云。學習外典。如以刀割泥。泥無所成。而刀自損。又如視日光。令人眼暗。然往古高僧。亦多異學。或精草隸。或善篇章。或醫術馳名。或陰陽顯譽。皆謂精窮。傍涉餘宗。無非志在護持。助通佛化。故善戒云。若爲論議。破於邪見。若二分經。一分外書。不犯四分。開誦此其意耳。今或沽名邀利。附勢矜能。形廁方袍。心染浮俗。畢身虛度。良可哀哉。

解行無實。反輕戒律。

資持云。十誦中律制比丘。五夏已前專精律部。若違持犯。辦比丘事。然後乃可學習經論。今越次而學。行既失序。入道無由。大聖呵責。終非徒爾。又彼律云。佛見諸比丘不學毗尼。遂讚歎毗尼。面前贊歎波離持律第一。後諸上座長老比丘。從波離學律也。今持纔霑戒品。便乃聽教參禪。爲僧行儀。一無所曉。況復輕陵戒檢。毀訾毗尼。貶學律爲小乘。忽持戒爲執相。於是荒迷塵俗。肆恣凶頑。嗜杯鬻自。謂通方。行姪怒言。稱達道。未窮聖旨。錯解眞乘。且戒必可輕。汝何登壇而受。律必可毀。汝何削髮染衣。是則輕戒全是自輕。

毀律還成自毀。妄情易習。至道難聞。拔俗超羣。萬中無一。請詳聖訓。能無從乎。

歸敬三寶興意

歸敬儀云。然則熏習日久。取會無由。事須立敬設儀。開其信首之法。附情約相顯於成化之功。然後肝膽塗地。形骸摧折。知宇宙之極尊。則敬逾天屬。天屬卽父母也曉教義之遠大。則道越常迷。卽七略經史等乃至云。小乘論云。敬者以慚爲體也。由我德薄前境尊高。故行敬也。今反無慚不恥。深可笑也。大乘論云。由信及智故敬。於彼信故。非邪智故。興敬故引。誠教信智及慚敬之

本矣。又引論云。歸依者回轉之語。由昔背正從邪流蕩生趣。今佛出世興言極尊。遂卽回彼邪心。轉從正道故也。於是乃立歸法有五等之差。始於背俗之初。終於入道之極。皆歸三寶以爲心師之迹也。所師極矣。所爲大矣。故增一阿含經云。無恭敬心於佛者。當生龍蛇中。以過去從中來。今猶無敬。多睡癡等。斯爲良證。大悲經云。佛過去時行菩薩道。見三寶舍利塔像師僧父母耆年善友。外道諸仙沙門婆羅門。無不傾側謙下敬讓。由是報故。成佛已來。山林人畜無不傾側以敬於佛。又俗禮云。毋不敬。儼若思。安定辭。傲

不可長。欲不可縱。志不可滿是也。

求歸三寶功益

敬儀云。是知初心後進。必須憑師善友。今依止三寶。常樂親近故。大智論云。若菩薩未入法位。遠離諸佛。壞諸善根。沒在煩惱。自不能度。安能度人。是故不應遠離諸佛。譬如嬰兒不離其母。行道不離糧食。熱時不離涼風。寒時不欲離火。度水不離好船。病苦不離良藥。是故菩薩常不離佛。何以故。父母親友。人天王等。不能益我。度諸苦海。唯佛世尊。令我出苦。是故常念不離諸佛。又如善生經云。若人受三自歸。所得果

報不可窮盡。如四大寶藏。舉國人民七年之中。運出不盡。受三歸者。其福過彼。不可稱計。又校量功德。經云。四有洲中。滿二乘果。有人盡形供養。乃至起塔。不如男子女人作如是言。我某甲皈依佛法僧。所得功德。不可思議。以諸福中。三寶勝故。

列示三寶名相

歸敬儀云。然三寶爲敬謁之尊。是以明其相狀行者。云。歸命常住法身。所謂如來成就十力。四無所畏。五眼六通。十八不共法。大慈大悲。三念處等。一切種智。無上調御。功德智慧微妙清淨。廣大如法界。究竟如

虛空安慰世間普覆一切。無障無礙無所分別。不可以智知。不可以識識。而能示現三十二相。八十種好。常舉右手安接眾生。放大光明。除無明暗。百福莊嚴。萬德圓滿。雨甘露雨。轉正法輪。濟益眾生。出生死海。是故號佛。眾聖中尊。無上法王。

十二部經。梵語一修多羅。二祇夜。三和伽那。四伽陀。五優陀那。六尼陀那。七阿波陀那。八伊帝目多伽。九闍陀伽。十毗佛略。十一阿浮達摩。十二優波提舍。唐言一契經。二重頌。三授記。四孤起。五無問。六因緣。七譬喻。八本事。九本生。十方廣。十一未曾有。十二論議。自然具足。開現梵行。最上第一。度於彼岸。甚深實相。平等大慧。自性清淨。心行處滅。言語道斷。而此正法。

境界無礙。爲眾生說不違實義。由是無上出世良藥。破滅眾生無始煩惱。

三乘淨僧所行三慧。

聞思修也

是菩薩道。披宏誓鎧策精

進馬。執忍辱弓。放智慧箭。煞煩惱賊。直心深心。決定正趣無上第一平等正道。不離念佛念法念僧。受行諸佛一切言教。常以六度度諸眾生。常以四攝攝諸含識。爲尊爲導。爲依爲救。安置眾生佛菩提道。是故號僧法朋善友。常以方便利益世間。是良福田。眞供養者。

三寶住持全由戒法

資持云。三寶四種一體。理體就理而論。化相一種局據佛世。住持一位。通被三時。功由戒力。運載不絕。故如舟焉。何以然耶。由佛法二寶並假。僧宏僧寶所存。非戒不立。如標宗中。順則三寶住持。違則覆滅正法。又如華嚴云。具足受持威儀教法。能令三寶不斷等。

明理三寶功高歸之益大

歸敬儀云。由此三寶常住於世。不爲世法之所凌慢。故稱寶也。如世珍寶爲世所重。今此三寶爲諸羣生三乘七眾之所歸仰。故云正歸。若無專信。襍事邪神。雖受歸戒。不得聖法。故經云。歸依於佛者。眞名清信。

士終不妄歸依其餘諸天神。斯何故耶。以眞三寶性相常住。堪爲物依。自餘天帝身心苦惱。有爲有漏無力無能。自救無暇。何能救物。唯出世寶有力能持。言歸依者。如憑王力得無侵害。今憑正寶威福無涯。故使神龍免金翅之誅。信士超夜叉之難。五種三歸皆歸此寶。或卽名之同相三寶。由理通三世義盡十方。常住三寶此爲至極。經云。若人得聞常住二字。是人生生不墮惡趣。斯何故耶。以知法佛本性常故。一時聞解熏本識心。業種旣成淨信無失。況能立願歸依奉爲師範。固當累劫清勝義無陷沒。如經有人受三

歸依。彌勒初會解脫生死。此乃出苦海之津梁。入佛法之階位。

住持三寶

住持三寶者。人能宏道。萬載之所流慈。道假人宏。三法於斯開位。遂使代代興樹。處處傳宏。匪假僧揚佛法。潛沒。至如漢武崇盛。初聞佛名。既絕僧傳。開緒斯竭。及顯宗開法。遠訪身毒。致有迦竺來儀。演布聲教。開物成務。發信歸心。實假敷說之勞。誠資相狀之力。名僧寶也。所說名句。表理爲先。理非文言。無由取悟。故得名教。說聽之緣。名法寶也。此理幽奧。非聖莫知。

聖雖云亡影像斯立。名佛寶也。但以羣生福淺不及化源。薄有餘資。猶逢遺法。此之三寶體是有爲。具足漏染不足陳敬。然是理寶之所依持。有能遵重相從出有。如俗王使巡歷方隅。不以形徵。故敬齊一。經云。如世有銀金爲上寶。無銀有鋤亦稱無價。故末三寶敬亦齊真。今不加敬更無尊重之方。投心何所起歸何寄。故當形敬靈儀。心存真理。導緣設化。義極於斯。經云。造像如麥。獲福無量。以是法身之器也。論云。金木土石體是非情。以造像故。敬毀之人自獲罪福。莫不表顯法身。致令功用無極。故使有心行者。對此靈

儀莫不涕泣橫流。不覺加敬。但以真形已謝。唯見遺蹤。如臨清廟。自然悲肅。舉目摧感。如在不疑。今我亦爾。慈尊久謝。唯畱影像。導我幔幢。是須傾屈。接足而行禮敬。如對真儀。而爲說法。今不見聞。心由無信。何以知耶。但用心所擬。三界尙成。豈此一堂。頑癡不動。大論云。諸佛常放光說法。眾生罪故。對面不見。是須一像。旣爾。餘像例然。樹石山林。隨相標立。導我心路。無越聖儀。

化相三寶

化相三寶者。謂釋迦如來爲佛寶也。所說滅諦爲法

寶也。先智苦盡爲僧寶也。此化相三寶。或名別相體。是無常四相所遷。滅過千載。但可追遠。用增翹敬。以賢劫中三佛已往。無我第四羣生何依。長淪苦海。解脫無路。是以能仁膺期出世。三祇修鍊。萬行功圓。纖瑕去而法性凝清。片善具而報化微妙。爾後上生兜率。下降王宮。三十歲居道樹成佛。四十九年住世教化。說法三百五十度。宣演八萬四千門。王臣外護於四海九洲。師僧內傳於人間天上。利益廣大。傳法難思。故有偈云。

假使頂戴經塵劫。身爲牀坐徧三千。若不傳法度眾

生。畢竟無能報恩者。

傳法有五

一受持 二看讀 三諷誦 四解說 五書寫
外護內護流傳。卽佛法僧寶不斷也。

仁宗皇帝讚三寶文

讚佛

天上天下金仙世尊。一心十號四智三身。度脫五陰
超踰六塵。生靈歸敬。所謂能仁。

讚法

萬法唯心心須至靜。由彼一心能生萬行。背覺爲妄。

悟真則聖。稽首法門。昭然佛性。

讚僧

六度無懈。四恩匪常。爲人眼目。助佛津梁。體潤一雨。心熏眾香。道無不在此土。他方。

大慧禪師看經回向文

某甲業力障魔。神志錯亂。所歷根鈍。自然想來。脫略混淆。顛倒重疊。臨文徇意。字誤句差。乖清濁之正音。泥解會之邪見。或事奪其志。心不在經。問對起居。斷絕隔越。久誦懈怠。因事憤瞋。嚴潔或涉於垢塵。肅敬或成於瀆慢。身口服用之不淨。衣冠禮貌之弗恭。供

不如儀處非其地。卷舒揉亂墜落汚傷。種種不專不誠。大慚大懼。恭願諸佛菩薩。法界虛空界一切聖眾。護法善神天龍等。慈悲憐憫懺滌罪愆。悉令誦經功德周圓畢遂。某甲回向心願。尚慮譯潤或誤。註解或非。傳授差殊。音釋舛錯。校對仍改之失。書寫刊刻之訛。其師其人。悉爲懺悔。仗佛神力。使罪消除。常轉法輪。起濟含識。

懶菴樞和尚語

佛誠羅睺羅頌云。十方世界諸眾生。念念已證善逝果。彼既丈夫我亦爾。何得自輕而退屈。六凡四聖同。

此一性。彼既如是。我何不然。直須內外資熏。一生取辦。更若悠悠過日。是誰之咎。古德云。此身不向今生度。更向何生度。此身。

天台智者大師云。何不絕語言。置文字。破一微塵。出大千經卷。一微塵者。眾生妄念也。大千經卷者。眾生佛性也。眾生佛性爲妄念所覆。妄念若破。則佛性現前。此老人爲固執文字語言者。興此歎也。此亦是金鎚刮膜之義。他日眼開。方知得力。

楞嚴經云。云何賊人。假我衣服。裨販如來。造種種業。若不以戒攝心者。縱饒解齊佛祖。未免裨販如來。造

種種業。況平平之人。清涼國師以十願律身者。良有以也。戒以慎爲義。又曰。洗心曰齋。防患曰戒。

四句偈

經中四句偈者。我相人相眾生相壽者相也。若有我相人相眾生相壽者相。則不能受持四句偈。若無我相人相眾生相壽者相。則能受持四句偈。山野看來。人人皆能受持。知者萬中有一。何故如此。祇爲此經被他前塵蓋覆。不自覺知也。

示比丘已德行受食

比丘已德行全缺。應供者。德行全可以應供。德行缺則

不可應供。今之比丘。或年三四十歲。或年五六十歲。未嘗一日不應供也。德行全耶。德行缺耶。所以云。學道不通理。覆身還信施。長者八十一。其樹不生耳。年齒既高。園中草不生。教有明文。不可不信。若也一念回光。日消萬兩黃金。

示比丘慎勿放逸

增一阿含經云。眼以色爲食。耳以聲爲食。鼻以香爲食。舌以味爲食。身以觸爲食。意以法爲食。涅槃以無放逸爲食。如今叢林中。三八念誦。鳴鐘集眾。維那白云。眾等當勤精進。如救頭然。但念無常。慎勿放逸。此

語與增一頗同。往往聞者以爲常例。如風過樹略不餐采。佛祖之意。遂成虛設矣。

菩薩三事無厭

智論云。菩薩唯有三事無厭。一者供養佛無厭。二者聞法無厭。三者供給僧無厭。今之學者。雖未至菩薩地位。撥棄因果者。或有之。更不究先聖之微言。殊不知卽理而事。卽事而理。事理圓融。法爾如是。故永明云。擬欲蛭嫌海量。螢掩日光乎。

戒定慧

戒定慧三學者。眾生自性本有之物。不因修證而得。

非唯諸佛菩薩具足。一切凡夫悉皆具足。自性無善惡。無持亦無犯。是自性戒。自性無靜亂。無取亦無捨。是自性定。自性本無知而無所不知。是自性慧。諸佛菩薩知有故得受用。一切凡夫不知有故不得受用。知有不知有似乎少異。而戒定慧未嘗少異也。

誠觀檀越四事從苦緣起出生法終南山宣律師爲弟子慈忍作

損害生命名苦業。筋骨斯盡名苦緣。經云。食者從耕種鋤刈收治。颺簸窖藏運輦舂磨。炊爨蒸煮。聊設供給奉送。又種菜造牆溉灌田園。營爲醬酢。計一鉢食。

出一鉢汗。汗在皮肉卽是其血。一食功力出於作者。一鉢之血。況復一生。凡受幾食。始從耕種乃至入口。傷殺無數。襍類小虫。是以佛戒日受一食。支持性命。寄過一生。衣服者。養蠶殺蠶。取柔織絡。染浣裁縫。眾緣調度。無量辛苦。計上下衣資。凡殺幾蠶。出幾氣力。蠶蠶入湯。受幾痛苦。是故佛教著糞掃衣。障弊陋質。冀得修道。房舍者。從起立。牆壁穿坑掘地。傷殺土蟲。斫伐材木。傷林樹蟲。造甑瓦時。殺泥水蟲。放火陶冶。殺柴草蟲。作人苦力。施主費財。飲食眾緣。勞損甚大。始成一房。是故行者。依於塚樹草蓐自安。念食是苦。

節身而食。念衣殺命。著糞掃衣。念房舍臥具。從苦緣生。志樂頭陀。三月一移。念四事難消。少欲知足。經云。受檀越食。如饑饉。世食子肉想。受施主衣。如熱鐵纏身。入房舍時。如入鐵鑊。受牀座時。如熱鐵牀。寧破此身。猶如微塵。不以破戒之身。受人供給。三塗苦報。皆爲愛衣貪食樂好房舍。若破戒因緣。還償施主。或作奴婢。鞭打驅策。或受畜生形。披毛帶角。生償筋骨。死還皮肉。負重力盡。起而復倒。虛受信施。樂不足言。及償施主苦過萬倍。是故教汝。知慚知愧。慎護後世。莫破戒受施名爲淨心。

誠觀末法中校量心行法

凡夫解義皆因聽學。爲知法人。身犯四重。畜八不淨。財。食。噉。俗。饌。無羞無恥。知而故犯。不畏後世。是故令汝校量心行。先淨禁戒。後方聽經。汝用五誠得名淨心。古者大德講華嚴經。唯一卷疏。於後法師作三卷疏。今時講者十地一品。出十卷疏。各逞功能。競顯華誦。文字浩博。寄心無所。然文者當體卽義。何須人語。今時愚人競求於名。不求於法。法尙不可著。何況著文字。法離文字言語斷故。大集經云。經文是一。講者異說。各恃已見。壞亂正法。天神瞋故。三災俱起。以是

因緣佛法淡薄。如一斛水解一升酪。看似酪色。食卽無味。諦思講論人情。測佛佛智境界。豈人能測。如是審察。名爲淨心。

誠觀破戒僧尼不修出世法

僧尼破戒者。所謂畜養奴婢僮僕。牛驢車乘。田宅種植園林花果。金銀粟帛。屏風氍毹。好枕細席。箱匱盆瓮。銅器槃椀。上好三衣。牙牀坐褥。房舍退屋。厨庫碓磨。脂麪藥酒。襪鮭醬酢。異種口味。王公貴重。多人顧識。生緣富貴。數過親舊。餉送弔問。申訴衙府。身爲眾首。門徒强盛。講說相難。好喜音樂。常居一寺。評量僧

事迭相擯罰。借問旱潦豐儉。盜賊水火毒獸之事。經過酒店市廛屠膾。獵射之家。親友婦女琴瑟詩賦。圍碁雙陸。讀外書典。高語大笑。嫌恨爭競。飲酒食肉。綾羅衣服。五色鮮明。勤鬚鬚髮。爪利如鋒。畜八不淨。財寶富足。於此等事貪求愛著。積聚不離。名眞破戒。經云。此等比丘。名禿居士。名披袈裟賊。名禿獵師。名三塗人。名無羞人。名一闍提。名謗三寶。名害一切檀越。眼目。名生死種子。名障聖道。遠離此等十種惡名。卽爲淨心。

誠觀六難自慶修道法

一者萬類之中人身難得。如提謂經云。今得人身難於龜木。二者雖得人身中國難生。此土卽當邊地之中。具足大乘法經律。三者雖有正法信樂復難。今隨力信不敢疑謗。四者人身難具。今受男形根無殘缺。相貌成就。五者雖具男形六根無缺。五欲纏染出家甚難。今得割愛出家修道。披著佛衣受佛淨戒。六者雖受禁戒隨戒甚難。汝可於戒律中尊重愛樂。慚愧慎護。於此六事若不觀察。卽便放逸深障聖道。旣超六難常應喜慶。難得已得得已莫失。如是思量名爲淨心。

戒賢論師祈禱觀音文

聞性空持妙無比。思修頓入三摩地。無緣慈力赴羣
機。明月影臨千澗水。比丘某甲稽首歸命。大慈悲父
觀世音菩薩。仰願他心道眼無礙見聞。動大哀憐冥
熏加被。一者願某甲早斷漏結速證無生。三業圓明
六根清淨。二者願某甲一聞千悟。獲大總持。具足辯
才四無礙解。凡是聖教熏習其心。一歷耳根永無忘
失。功德智慧莊嚴其身。根根塵塵周徧法界。三者願
某甲上求佛果下度羣生。梵行早圓三輪空寂。直至
成佛。於其中間捨身受身。常爲男子。隨佛出家。發菩

提心。自利利他。行願無盡。然後願我臨欲命終時。盡除一切諸障礙。面見彼佛阿彌陀。卽得往生安樂刹。生彼國已滿諸大願。足菩薩行。與諸眾生皆成佛道。

永嘉眞覺禪師發願文

稽首圓滿徧知覺。寂靜平等本眞源。相好嚴特非有無。慧明普照微塵刹。稽首湛然眞妙覺。甚深十二修多羅。非文非字非言詮。一音隨類皆明了。稽首清淨諸賢聖。十方和合應眞僧。執持禁戒無有違。振錫攜瓶利含識。卵生胎生及濕化。有色無色想非想。非有非無想襍類。六道輪迴不暫停。我今稽首歸三寶。普

爲眾生發道心。羣生沈淪苦海中。願因諸佛法僧力。
慈悲方便拔諸苦。不捨宏願濟含靈。化力自在度無
窮。恆沙眾生成正覺。說此偈已。我復稽首歸依十方
三世一切諸佛法僧前。承三寶力。志心發願修無上
菩提。契從今生至成正覺。中間決定勤求不退。未得
道前身無橫病。壽不中天。正命盡時不見惡相。無諸
恐怖。不生顛倒。身無苦痛心不散亂。正慧明了。不經
中陰。不入地獄。畜生餓鬼水陸空行。天魔外道。幽冥
鬼神一切襍形。皆悉不受。長得人身。聰明正直。不生
惡國。不值惡王。不生邊地。不受貧苦奴婢女形。黃門

二根。黃髮黑齒。頑愚暗鈍。醜陋殘缺。盲聾瘖瘂。凡是
可惡。畢竟不生。出處中國。正信家生。常得男身。六根
完具。端正香潔。無諸垢穢。志意和雅。身安心靜。不貪
瞋癡。三毒永斷。不造眾惡。恆思諸善。不作王臣。不爲
使命。不願榮飾。安貧度世。少欲知足。不長畜積。衣食
供身。不行偷盜。不殺眾生。不噉魚肉。敬愛含識。如我
無異。性行柔輒。不求人過。不稱己善。不與物爭。怨親
平等。不起分別。不生憎愛。他物不憊。自財不恡。不樂
侵犯。恆懷質直。心不卒暴。常樂謙下。口無惡說。身無
惡行。心不詭曲。三業清淨。在處安隱。無諸障難。竊盜

劫賊王法牢獄枷杖鉤鎖。刀鎗箭槊猛獸毒虫。墮峰
溺水火燒風飄。雷驚霹靂樹折岩頽。堂崩棟朽。搥打
怖畏。趁逐圍繞。執捉繫縛。加誣毀謗。橫註鉤牽。凡諸
難事。一切不受。惡鬼飛災。天行毒癘。邪魔魍魎。若河
若海。崇山穹嶽。居止樹神。凡是靈祇。聞我名者。見我
形者。發菩提心。悉相覆護。不相侵惱。晝夜安隱。無諸
驚懼。四大康強。六根清淨。不染六塵。心無亂想。不有
昏滯。不生斷見。不著空有。遠離諸相。信奉能仁。不執
已見。悟解明了。生生修習。正慧堅固。不被魔攝。大命
終時。安然快樂。捨身受身。無有怨對。一切眾生。同爲

善友所生之處。值佛聞法。童真出家。爲僧和合。身身之服。不離袈裟。食食之器。不乖孟鉢。道心堅固。不生憍慢。敬重三寶。常修梵行。親近明師。隨善知識。深信正法。勤行六度。讀誦大乘。行道禮拜。妙味香花音聲。讚唄燈燭臺觀。山海林泉。空中平地。世間所有。微塵已上。悉持供養。合集功德。迴助菩提。思惟了義。志樂閑靜。清素寂默。不愛喧擾。不樂羣居。常好獨處。一切無求。專心定慧。六通具足。化度眾生。隨行所願。自在無礙。萬行成就。精妙無窮。正直圓明。志成佛道。願以此善根。普及十方界。上窮有頂。下極風輪。天上人間。

六道諸身。一切含識。我所有功德。悉與眾生共。盡於微塵劫。不惟一眾生。隨我有善根。普皆充薰飾。地獄中苦惱。南無佛法僧。稱佛法僧名。願皆蒙解脫。餓鬼中苦惱。南無佛法僧。稱佛法僧名。願皆蒙解脫。畜生中苦惱。南無佛法僧。稱佛法僧名。願皆蒙解脫。天人阿修羅。恆沙諸含識。八苦相煎迫。南無佛法僧。因我此善根。普免諸纏縛。南無三世佛。南無修多羅。菩薩聲聞僧。微塵諸聖眾。不捨本慈悲。攝受羣生類。盡空諸含識。歸依佛法僧。離苦出三塗。疾得超三界。各發菩提心。晝夜行般若。生生勤精進。常如救頭然。先得

菩提時。誓願相度脫。我行道禮拜。我誦經念佛。我修戒定慧。南無佛法僧。普願諸眾生。悉皆成佛道。我等諸含識。堅固求菩提。頂禮佛法僧。願早成正覺。

隨州大洪山遂禪師禮華嚴經文

南無毗盧教主華藏慈尊。演寶偈之經文。布琅函之玉軸。塵塵混入。剎剎圓融。十兆九萬五千四十八字。一乘圓教。大方廣佛華嚴經。若人欲了知。三世一切佛。應觀法界性。一切惟心造。常願供養常恭敬。七處九會佛菩薩。常願證入常宣說。五周四分華嚴經。常願供養無休歇。九十剎塵菩薩眾。常願悟入常宣說。

大方廣佛華嚴經。伏願某甲生生世世。在在處處。眼中常見如是經典。耳中常聞如是經典。口中常誦如是經典。手中常書如是經典。心中常悟如是經典。願生生世世。在在處處。常得親近華藏一切聖賢。常蒙華藏一切聖賢慈悲攝受。如經所說。願悉證明。願如善財菩薩。願如文殊師利菩薩。願如彌勒菩薩。願如普賢菩薩。願如觀世音菩薩。願如毗盧遮那佛。以此稱經功德。以此發願功德。願與四恩三有。法界一切眾生。消無始以來。盡法界虛空界無量罪垢。願與四恩三有。法界一切眾生。解無始以來。盡法界虛空界。

無量冤業。願與四恩。三有法界。一切眾生。集無始以來。盡法界。虛空界。無量福智。同遊華藏莊嚴海。同入菩提大道場。南無大方廣佛華嚴經。

桐江映法師觀心銘

心焉心焉。本自天然。卓爾獨立。湛寂孤堅。妙中至妙。玄中又玄。無來無去。不變不遷。非迷非悟。絕聖絕賢。思不可及。強以言詮。由體明覺。遂生諸緣。鏡含萬象。海納百川。收之兮神潛方寸。舒之兮光充大千。變化自在。作用無邊。乃生乃佛。爲實爲權。迷之則浩浩不返。悟之則了了相傳。心焉汝靈。心焉汝靈。語汝莫忘。

誨汝須聽。汝具萬法。今本自圓成。萬法具汝。今其體空。平境非實。境名是假。名。汝昔不悟。今枉受鈴。竅。汝今自覺。今可保堅貞。觸途莫滯。念起卽惺。六塵不染。三毒乃清。休更鼓之。令濁。今失本明。宜自澄之。令淨。今歸元精。

緇門警訓卷第四終

緇門警訓卷第五

終南山宣律師賓主序

夫損己利他者。蓋是僧家之義也。害物安身者。非爲
釋子之理也。有賞善罰惡之能。斷是非不平之事。若
是先人後己。契諸佛之慈心。如或爾死我活。乖六和
之妙行。爲主者。倘存仁義。感十方衲子之雲臻。若乃
私受人情。招千里惡名之遠播。爲賓者。懷恭執禮。有
義而到處安身。苟取狂圖。無義而隨方惹怨。今者幸
生中國。得賴空門。脫萬丈之火坑。拋千重之羈網。如
囚出獄。似鳥開籠。履布金積善之場。住七寶無殃之

地。天龍恭敬神鬼。欽崇。非桑蠶而著好衣。不耕田而
食美饌。何須結怨。鬻利非理。圖財求蝸角之虛名。閉
人天之坦路。取龜毛之小利。穿地獄之深坑。積恨結
於今生。受波吒於後世。縱使滿堂金玉。牽纏自己愚
身。直饒羅綺盈箱。鬪亂子孫業重。少求儉用。免逼迫
於心田。知足除貪。播馨香於意地。或住梵剎。或挂雲
堂。莫論他非。但省己過。若有才高之者。把三藏以研
窮。志淺之流。覽五乘而課誦。切莫口行慈善。肚裏刀
鎗。面帶笑容。心藏劍戟。貧者不恤。老者不憐。忘慈親
鞠養之深恩。乖師長提攜之厚德。如斯用意。退十方

檀越之信心。執假迷真。惹四海英賢之譏誚。是以丁
寧勸諭仔細精專。聞之者破我慢之高山。覽之者塞
昏迷之巨海。皆希稟信普願回心。只宜來世勝今生。
莫道今生勝來世。奉勸大眾疾須覺知。大限臨頭悔
之莫及。

東山演禪師送徒弟行腳

大凡行腳須以道心爲重。不可受現成供養。等閑過
日。須將生死二字貼在額頭上。每日十二時中裂轉
面皮。討箇分曉始得。若只隨羣逐隊打閑過日。忽然
死了。閻羅老子打算飯錢。莫道我不曾說與你來。若

是做工夫。須要時時檢點。刻刻提撕。那裏是得力處。那裏是不得力處。那裏是打失處。那裏是不打失處。若如此檢點做工夫時。定有到家時候。有一等辦道人。經又不看。佛又不禮。纔上蒲團。便打瞌睡。及至醒來。胡思亂想。纔下蒲團。便與人說襍話。若是如此辦道。至彌勒佛下生時。也未有入手底時節。須是猛著精采。提一箇無字。晝參夜參。與他厮睚。不可坐在無事甲裏。又不可在蒲團上死坐。須要活弄。恐襍念紛飛起時。千萬不可與他厮睚。轉鬪轉多。有人到這裏。不識進退。解免不下。成風成顛。壞了一生。宜向紛飛

起處輕輕放下。轉身下地行一遭。又上蒲團開兩眼。捏兩拳。豎起脊梁。依前提起所參話頭。便覺清涼。如一鍋沸湯。攪一杓冷水相似。若如此做工夫。日久歲深。自有到家時節。工夫未入手。不可生煩惱。恐煩惱魔入心。若覺得力。不可生歡喜。恐歡喜魔入心。種種禪病說之不盡。如眾中有老成道伴。千萬時時請益。若無將前輩祖師教人做工夫語言看一遍。如親見相似。如今向此道者。難得其人。千萬努力向前。望汝早早打破漆桶歸來。與老僧揩背。偈曰。瞻風撥草離家時。一念途中善護持。近日叢林風味別。腳頭到處

著便宜。

石屋琪禪師送慶侍者回里省師

汝師年老中山寺。朝暮無人可瞻侍。不歸掃灑執巾
瓶。師資禮法合也未。汝母兼又年紀高。除汝一人更
無二。望斷秋風未見歸。倚門日日長垂淚。離師棄母
入山來。所圖畢竟成何事。安貧樂道固所難。住箇茅
菴豈容易。也要種竹栽松。也要鉏山掘地。也要運水
搬柴。也要澆蔬灌芋。也要行道諷經。也要攝心除睡。
藜羹黍飯塞飢瘡。淡齏薄粥通腸胃。人生皆爲口體
忙。我亦未免形骸累。自家心地如未明。業識茫茫無

本據水邊林下暫經過。吾汝皆非久居計。月江和尙
有書來。勉汝歸寧有深意。開緘未讀便抽身。不負來
音全孝義。有言孝爲百行先。在俗在僧誰不然。侍師
奉母名敬田。何須入眾并參禪。忽然思靜又嫌喧。短
策不妨閑往還。

結制小參

佛祖門風將委地。說著令人心膽碎。扶持全在我兒
孫。不料兒孫先作弊。紛紛走北向奔南。昧卻正因營
襍事。滿目風埃滿面塵。業識茫茫無本據。縱饒挂搭
在僧堂。直待版鳴歸被位。聚頭寮舍鼓是非。收足蒲

團便瞋睡。癡雲靨。鍵性天昏。石火交煎。心鼎沸。暫時
寂寂。滯輕安。一向冥冥。墮無記。百丈清規。不肯行。外
道經書。勤講議。因果分明。當等閒。罪福昭然。渾不懼。
或遷一榻。一間房。放逸總由身口意。頭上瓦。腳下瓢。
身上衣。口中味。一一皆出。信心檀越。人家施。未成道
業。若爲消。捫心幾箇。知慚愧。今日三。明日四。閒處光
陰。盡虛棄。一朝老病來相尋。閻翁催請死符至。從前
所作業。不忘。三塗七趣。從茲墜。袈裟失卻。復再難。鱗
甲羽毛。披則易。看他古之學道流。直忘人世輕名利。
煮黃精。煨紫芋。飯一搏。水一器。爲療形枯。聊接氣。石

爛松枯竟不知。洗心便作累生計。物外清閑一味高。
世上黃金何足貴。劫空田地佛花開。香風觸破娘生
鼻。選佛場中及第歸。圓覺伽藍恣遊戲。茲因結制夜
小參。不覺所言成此偈。

上堂

六月七月天不雨。農家曉夜忙車水。背皮焦裂腳底
疼。眼花無力欲悶死。公人又來逼夏稅。稅絲納了要
盤費。大麥小麥盡量還。一日三食不周備。思量我輩
出家兒。現成受用都不知。進道身心無一點。東邊浪
宕西邊嬉。三箇五箇聚頭坐。開口便說他人過。及乎

歸到暗室中。背理虧心無不做。莫言墮在異類中。來生定作栽田翁。前來所說苦如此。那時難與今時同。古德訓徒有一語。對人天眾拈來舉。緇田無一簣之功。鐵圍陷百刑之苦。

中峰和尚遺誠門人

佛法無你會處。生死無你脫處。一報之身如風燈石火。念念如救頭然。尙無你了辦處。著甚死急。平地上討許多忙亂。貶得眼來。早已四五十歲了也。你喚甚麼作佛法。任你以百千聰明。一把他三乘十二分教。乃至一千七百則陳爛葛藤。及與百氏諸子。從頭

解註得盛水不漏。總是門外打之遶。說時似悟對境
還迷。此事向道無你會處。你轉要會轉不相應。你莫
見與麼說。便擬別生知解。直饒向千人萬人拶不入
處。別有生機。總不出箇要會的妄念。惟有具大信根。
向已躬下真參實悟。乃能荷負。你若作荷負想。依舊
沒交涉。故古教謂假使滿世間。皆如舍利弗。盡思共
度量。不能測佛智。如今有等人。拾得橘皮。自認爲火。
到處高談濶論。主張一路。道我會佛法。要人恭敬。有
甚得便宜處。幻者三四十一年。向此事上著到。展轉於
佛注二字。尙不相應。所以日夜懷慚。安敢濫膺師位。

尋常遇甘言厚幣。不啻毒箭入心。累避之而不可。此
蓋多生緣業所致。乃虛妄本。非道力使之然也。每見
道流沒要緊。遇些子不順意事。一點無明恣縱業識。
狂心毒行。平地上拷陷人。喚作我持公論。殊不知從
無量劫來。被此等公論結縛無明。未曾有一事以公
論而會道念。且今日所持底公論。你還知多少人在
你背後掩鼻之不暇。生死無你脫處。自家一箇生死
大事。粘皮綴骨。念念無間。無量劫來百千伎倆。一齊
弄盡。只是此心不肯休歇。徒向千佛萬祖。累發重誓。
逗到今日。撞在三衣下。喚作道流。奈何依舊識他目。

前不破。動便生心起念。莫非滋長生死結縛。忘卻最初出家本志。似與麼熱亂。得千生萬生。徒長業輪。於理何益。好教你知。眾生結縛濃厚。無你柰何處。你若無力處眾。但只全身放下。向半間草屋。冷淡枯寂。丐食鶉衣。且圖自度。亦免犯人苗稼。作無慚人。所以知佛法無你會處。生死無你脫處。既會不得。又脫不得。但向不得處。一捱捱住。亦莫問三十年二十年。忽向不得處。驀尔援透。始信余言之不相誣矣。

誠閑

世人未有不以閑散爲樂。而共趣之。逆問其故。乃曰。

昔嘗以榮辱是非累日與事物相交馳。心志勞而形體痛。以至結於情想。接於夢寐。靜而思之。人生幾何。不得一日之安。雖富貴奚益也。由是一切棄之。思欲行歌坐忘。觀青天白雲。以自放浪於事物之表。或有避父師之訓。厭身世之勞。望治生如避水火。必欲拔塵遠俗。以遂其閒。余曰。忙固勞。形役慮也。閒則坐消白日。又何益於理哉。二者皆欣厭之情妄耳。故聖人有動靜二相。了然不生之旨。正不必厭此忙而欣彼之閒也。余將直言之。夫人欲學入世間之道。苟不服勤勞役。則事無貴賤皆無由成。然悟世間虛妄。欲究

聖賢出世之道。倘不忘飡廢寢。則根無利鈍。又何從而得之。故雪山大士捨身命如微塵數。事知識如恆河沙。積劫迨今。歷試諸難。蓋欲示後學者。知道之不易聞也。故入世間則忠於君。孝於親。悉盡其義。不可不忙。出世間則親師擇友。朝參暮扣。以盡其道。又不可不忙。既盡其義。又盡其道。將見體如泰山之不動。心等太虛之無爲。豈一閑字可與同日語哉。或入世不能盡其義。出世不能盡其道。惟孜孜以安閑不擾爲務。而不肯斯須就勞者。故聖人斥之爲無慚人。凡有識者。安肯負此無慚。而復嗜閑於疎散之域也。余

故書此。以爲投閑者之誡。

千崑長禪師示眾

參禪爲第一。持戒爲第二。作福爲第三。禮誦爲第四。既作出家兒。須行四種事。不可縱汝心。不可恣汝意。不可懶汝身。不可昏汝智。諦觀苦與樂。痛念生與死。莫憂衣與食。莫貪名與利。時中惺惺著。胸中蕩蕩地。行坐合清規。動靜依先制。常近善知識。常遠惡朋輩。若能信我言。成佛極容易。若不信我言。出家徒勞耳。是百姓光頭。是修羅聚會。是地獄抽芽。是畜生羣隊。快脫袈裟來。快出山門去。且自做俗人。莫與我同住。

天衣懷禪師室中以淨土問學者

若言舍穢取淨。厭此欣彼。則是取舍之情。眾生妄想。若言無淨土。則違佛語。修淨土者。當如何修。眾無語。復自荅云。生則決定生。去則實不去。又云。譬如雁過長空。影沈寒水。雁絕遺蹤之意。水無畱影之心。

大智律師警自甘塗炭者

世之學佛者。其始莫不皆曰。爲生死事大。及乎聲利所動。世緣所汨。則生死大事。置而弗論。或爲人扣擊。則他辭託跋。不能自決。或云。此不須問。或云。不必用知。或云。符到奉行。莫作計較。或云。隨處受生。出入自

在。或云。且生不高不下之家。復男子身。或云。把定精神。見善惡相。不得隨去。或令預候之時。或教臨終奪陰。或云。百骸潰散。一物長靈。或云。形散氣消。歸於寂滅。如是種種臆度。矯亂。皆不出凡夫外道斷常二見。逮乎四大解分。病苦所逼。識神無主。隨業輪迴。決無疑矣。假令定日剋時坐脫立化。世德可致。未足爲奇。斯由不見十六觀經。不知九品生相。不信彌陀願力。而堅恃所具自甘塗炭。豈不爲之悲哉。

永明壽禪師戒無證悟人勿輕淨土

問曰。但見性悟道。便超生死。何用繫念彼佛。求生他

方。荅曰。眞修行人應自審察。如人飲水。冷暖自知。今存龜鑑。以破多惑。諸仁者當觀自己行。從見性悟道。受如來記。紹祖師位。能如馬鳴龍樹否。得無礙辯才。證法華三昧。能如天台智者否。宗說皆通行。解兼修。能如忠國師否。此諸大士皆明垂言教。深勸往生。蓋是自利利他。豈肯悞人自悞。況大雄讚歎金口丁寧。希從昔賢恭稟佛敕。定不謬誤也。仍往生傳所載。古今高士事跡。顯著非一。宜勤觀覽。以自照知。又當自度。臨命終時。生死去住。定得自在否。自無始來惡業重障。定不現前。此一報身。定脫輪迴否。三途惡道異。

類中行。出沒自由。定無苦惱否。天上人間十方世界。隨意寄託。定無滯礙否。若也了了自信得及。何善如之。若其未也。莫以一時貢高。卻致永劫沈淪。自失善利。將復尤誰。嗚呼哀哉。何嗟及矣。

慈雲式懺主三衣辯惑篇

佛制法衣但三。一曰安陀會。二曰鬱多羅僧。三曰僧伽梨。此三法衣。定是出家之服。非在家者所披。僧祇云。三衣者。賢聖沙門標識。非俗人所爲。智論云。佛聖弟子住於中道。故著三衣。外道裸形無恥。白衣多貪重著。襍阿含云。修四無量者。並鬚髮服三法衣。而出

家也。據斯以知定非俗服。世云梵網經有通俗著者。人見彼經廣列王臣道俗盡得受戒。應教身所著袈裟等言。便令士女受菩薩戒者著七條衣。觀彼經文未必全爾。袈裟正翻爲染。或翻臥具。據翻染者祇是通制。道俗受戒須服壞色。恐其染同特艷。乖於法制。乃云應教身所著染。皆使壞色。或有風俗不可盡制。而出家菩薩必須染壞故。復文云。比丘應與俗服有異。何曾通俗著七條衣。或翻臥具者。南山云。三衣總名。梵網經云。披九條七條五條袈裟。卽其文也。若爾者。又何妨袈裟之語。別在出家。亦卽文云。比丘皆應

與俗服有異。尋天台及藏法師章疏俱作染壞義釋。並無通俗三衣之說。雖方等經中通俗修懺入道場時。許著三衣。但是單縫。不許卻刺。佛言。此三衣者一名單縫。二名俗服。荆溪師云。若卻刺者。卽是大僧受持之衣。是故此衣應須別造。世有借出家人衣。深爲未可。故知雖三衣非出家服。出輔行記信其梵網若已許著。方等何故要須單縫。乃至阿含佛令取阿難鬱多羅僧。與婆四吒女著等。此出自聖意。暫爾赴機。滅後下凡。須依定制。一切戒律涅槃重宣。最後之言。方爲拈定。三衣許俗。彼經無文。餘或云。攘災免厄。許與小

片至如戲女暫挂獵師假披。或云得四寸而飲食斯充。挂一片而羅刹不噉。蓋顯三衣之功用。非許四民之受持。出家閑邪之人。尙昧持衣之軌。在塵煩襍之眾。寧知奉法之儀。南山云。若受用有方。則不生罪戾。必領納乖式。便自陷深憊。一生無衣覆身。一死自負聖責。何慮無惡道分。觀斯之言。自坐深過。忍將非法誤累在家。更有憊妄不能緘默。多見道俗競挂絡子。濫觴久矣。滋彰近矣。且三衣五納制聽二典。絡子名狀出自何文。誤以三衣破片而迴作者。比亾衣損祗合補治。令不失受持。豈容披其破片。更立異名。何殊

遭賊失衣比丘乎。或云。院內執作暫挂無妨者。安陀會正是院內之衣。何不著耶。至於俗家弟子。若免災厄。不應常挂袈裟之片。若許常挂。何不全許三衣。而但許一片耶。南山引僧祇龍著袈裟免金翅難。乃云。必不順教。則所被無力。袈裟違教。尙云無力。況今絡子特新裁染。公然製造。若名若體。全是非法。驗知披挂得罪無福。今略書三種違教之咎。庶幾讀之。宥過無大。必改爲善。一者絡子名體都無所載。制聽二教。一切所無。旣乏五功。濫參三賤。違教之責。冥報非虛。二者制聽二教。唯佛一人。自菩薩聲聞述而不作。今

既自制絡子。仁者便是佛耶。三者隋外道輩。非佛者流。南山云。以襍色線縫於衣上。作條幅者。是外道法。結偷蘭遮。況乎造非法衣。殊乖先制。非外道輩。斯何人哉。幸願四方道人行大乘者。讀文尋竟。莫守己情。擔麻棄金。殊非智者。革弊從正。斯則達人。應知無上。佛乘解無道俗。傳持之軌。誠在律儀。涅槃扶律。談常正在於此。律範若壞。法假誰傳。豈生爲人不護眼目。斷常住命。非旃陀羅耶。昔靜靄法師。值周武行虐。自恨不能護法出家。奚爲。乃坐石奮刀。徧身剖肉。引腸挂樹。以手捧心而卒。嗚呼。古賢護法。其若是乎。我等

緇門警訓卷五

既敦未能。宜守法制。莫致毀損。殃墜自他矣。

緇門警訓卷第五終

緇門警訓卷第六

長蘆慈覺頤禪師龜鏡文

夫兩桂垂陰一華現瑞。自爾叢林之設。要之本爲眾僧。是以開示眾僧故有長老。表儀眾僧故有首座。荷負眾僧故有監院。調和眾僧故有維那。供養眾僧故有典座。爲眾僧作務故有直歲。爲眾僧出納故有庫頭。爲眾僧主典翰墨故有書狀。爲眾僧守護正教故有藏主。爲眾僧迎待檀越故有知客。爲眾僧請召故有侍者。爲眾僧看守衣鉢故有寮主。爲眾僧供侍湯藥故有堂主。爲眾僧洗濯故有浴主。水頭。爲眾僧禦

寒故有炭頭爐頭。爲眾僧乞丐。故有街坊化主。爲眾僧執勞。故有園頭磨頭莊主。爲眾僧滌除。故有淨頭。爲眾僧給侍。故有淨人。所以行道之緣。十分備足。資身之具。百色現成。萬事無憂。一心爲道。世間尊貴物。外優閑。清淨。無爲。眾僧爲最。回念多人之力。寧不知恩報恩。晨參莫請。不捨寸陰。所以報長老也。尊卑有序。舉止安詳。所以報首座也。外遵法令。內守規繩。所以報監院也。六和共聚。水乳相參。所以報維那也。爲成道故。方受此食。所以報典座也。安處僧房。護惜什物。所以報直歲也。常住之物。一毫無犯。所以報庫頭。

也。手不把筆如救頭然。所以報書狀也。明窗淨案古
教照心。所以報藏主也。韜光晦迹不事追陪。所以報
知客也。居必有常請必先到。所以報侍者也。一餅一
鉢處眾如山。所以報寮主也。寧心病苦粥藥隨宜。所
以報堂主也。輕徐靜默不昧水因。所以報浴主水頭
也。緘言拱手退已。讓人所以報炭頭爐頭也。忖己德
行全闕應供。所以報街坊化主也。計功多少量彼來
處。所以報園頭磨頭莊主也。酌水運籌知慚識愧。所
以報淨頭也。寬而易從簡而易事。所以報淨人也。所
以叢林之下道業惟新。上上之機一生取辦。中流之

士長養聖胎。至如未悟心源。時中亦不虛棄。是真僧寶。爲世福田。近爲末法之津梁。畢竟二嚴之極果。若或叢林不治。法輪不轉。非長老所以爲眾也。三業不調。四儀不肅。非首座所以率眾也。容眾之量不寬。愛眾之心不厚。非監院所以護眾也。修行者不安。敗羣者不去。非維那所以悅眾也。六味不精。三德不給。非典座所以奉眾也。寮舍不修。什物不備。非直歲所以安眾也。畜積常住。減剋眾僧。非庫頭所以贍眾也。書狀不工。文字滅裂。非書狀所以飾眾也。几案不嚴。喧煩不息。非藏主所以待眾也。憎貧愛富。重俗輕僧。非

知客所以贊眾也。禮貌不恭尊卑失序。非侍者所以命眾也。打疊不勤守護不謹。非寮主所以居眾也。不閑供侍惱亂病人。非堂主所以恤眾也。湯水不足寒暖失儀。非浴主水頭所以浣眾也。預備不前眾人動念。非爐頭炭頭所以向眾也。臨財不公宣力不盡。非街坊化主所以供眾也。地有遺利人無全功。非園頭磨頭莊主所以代眾也。懶惰併除諸緣不具。非淨頭所以事眾也。禁之不止命之不行。非淨人所以順眾也。如其眾僧輕師慢法取性隨緣。非所以報長老也。坐臥參差去就乖角。非所以報首座也。意輕王法不

顧叢林。非所以報監院也。上下不和鬪諍堅固。非所以報維那也。貪婪美膳毀訾麤食。非所以報典座也。居處受用不思後人。非所以報直歲也。多貪利養。不惜常住。非所以報庫頭也。事持筆硯馳騁文章。非所以報書狀也。慢易金文看尋外典。非所以報藏主也。追陪俗士交結貴人。非所以報知客也。遺忘召請久坐眾僧。非所以報侍者也。以己妨人慢藏誨盜。非所以報寮主也。多瞋少喜不順病緣。非所以報堂主也。桶杓作聲用水無節。非所以報浴主水頭也。身利溫煖有妨眾人。非所以報爐頭炭頭也。不念修行安然

受供。非所以報街坊化主也。飽食終日。無所用心。非所以報園頭磨頭莊主也。涕唾墻壁。狼藉東司。非所以報淨頭也。專尙威嚴。宿無善教。非所以報淨人也。蓋以旋風千匝。尙有不周。但知捨短從長。其辦出家之事。所冀師子窟中。盡成師子。旃檀林下。純是旃檀。令斯後五百年。再覩靈山一會。然則法門興廢。係在僧徒。僧是敬田。所應奉重。僧重則法重。僧輕則法輕。內護旣嚴。外護必謹。設使粥飯主人。一期王化叢林。執事偶爾當權。常宜敬仰同袍。不得妄自尊大。若也貢高我慢。私事公酬。萬事無常。豈能長保。一朝歸眾。

何面相看。因果無差。恐難迴避。僧爲佛子。應供無殊。天上人間。咸所恭敬。二時粥飯。理合精豐。四事供須。無令缺少。世尊二千年遺蔭。蓋覆兒孫。白毫光一分功德。受用不盡。但知奉眾。不可憂貧。僧無凡聖。通會十方。旣曰招提。悉皆有分。豈可妄生分別。輕厭客僧。旦過寮。三朝權住。盡禮供承。僧堂前暫爾求齋等心。供養俗客。尙猶照管。僧家忍不逢迎。若無有限之心。自有無窮之福。僧門和合。上下同心。互有短長。遞相蓋覆。家中醜惡。莫使外聞。雖然於事無傷。畢竟滅人瞻仰。如師子身中蟲。自食師子肉。非外道天魔所能。

壞也。若欲道風不墜。佛日常明。壯祖域之光輝。補

皇朝之聖化。願以斯文爲龜鏡焉。

慈受禪師示眾箴規

壽無量本
大同小異

陞堂念誦諷經小參。但是眾集。宜須先赴。遊方上士。
規矩隨身。豈可乖慵。遭人檢點。一回可恕。三犯何顏。
不思百丈真風。便見投子道底。靜脾纔挂。宜各默然。
縱不挂時。豈可談笑。古佛垂訓。守口如瓶。二六時中。
常宜緘默。三業不戒。萬禍潛生。善諳魯祖風。便口挂
壁上。自己案前。常令潔淨。只安香匣。禪策經文。貴圖
齊整。不得安世俗文字。藥裏香爐。種種所須。宜收案

下。出聲持誦。噪吵稠人。背靠扳頭。輕欺大眾。虛占案
分。挂物明窗。不合律儀。叢林安許。端身正意。默爾披
尋。諦味聖言。契合心地。不虛開卷。始會看經。平時鄰
案道人。切忌交頭接耳。賓客相看。禮不可免。茶湯纔
罷。敘話已周。相引出寮。不可久坐。若是舊時道伴。遠
地親情。相邀林下水邊。方可傾心談論。至於交關買
賣。引惹襍人。盡非衲子所爲。便可一筆勾下。粥後歸
寮。同伸問訊。止中下座。恭敬爲先。苟或不然。輕人慢
已。放參開籠。須白知寮。出入掀簾。要垂後手。登牀宴
坐。不可垂衣。舉動經行。更宜緩步。使人動念。魔障易

生眾口爍金自家何樂。洗衣把針宜於齋后。不急之
務道業荒唐。不可將湯瓶。泡衣洗面。卓上裁紙糊卓。
偷煮點心。包藏藥石。竹竿要知觸淨。熨斗須看閑忙。
執在一隅。恐妨眾用。古聖補破遮寒。縫了便休。豈可
朝昏事侍針線。煎點茶湯。叢林盛禮。大眾雲集。方可
跏趺。蓋橐收歸。眾人齊退。私藏茶末。取笑傍觀。隻手
揖人。是何法度。有故不赴。須白知寮。小坐茶湯。輒不
可免。新到入寮。宜懷謙下。未諳法度。請問耆年。隨方
毗尼。在人建立。安籠占案。不必著忙。欸細之間。自然
穩便。入寮煎點。本爲眾人。意在志誠。茶須通喫。使了

家事舊處安排。瀉卻湯瓶卽時添注。山行水次戒護
開談。張口如弓。發言如箭。雌黃之事。品藻他人。說食
說錢。呵風罵雨。牆壁有耳。法令無親。忽然虎口遭傷。
始見鋒頭太露。凡遇茶毗。陰晴齊赴。各懷悽愴。同運
悲心。恐彼前人。虛生浪死。口持經呪。肩負柴薪。豈可
猖狂恣聲談笑。衣盂估唱。本爲破慳。後人不知。返成
貪愛。偷量長短。暗窺舊新。賤唱貴分。過如常賣。不知
反責。猶說便宜。識者傍觀。面慚汗下。若是海門上士。
禪院高賓。但爲死者結緣。莫被活人嗤笑。柔和善順。
上下可觀。我慢貢高。諸聖不祐。八萬細行。三千威儀。

二六時中頭頭可見。穿堂直過。豈不厚顏。尊殿間行。恐招薄福。衲衣登殿。草履遊山。莫踐法堂。回互耆宿。五更洗面。本爲修行。吐唾拖盆。喧聒大眾。暗中動念。自昧不知。日往月來。面黃身瘦。浴湯少使。籌子休拈。作福雖多。不如避罪。廊舍吐唾。案上抓頭。違背聖賢。自從已便。時時檢點。步步隄防。直須小卻身心。便好大著腸肚。十日知寮。遞相供養。晚眠早起。務在精誠。苦切勞心。先人後己。大眾衣鉢。切要關防。一事不周。眾人動念。煎茶掃地。換水裝香。莫教冷卻湯瓶。免見禪和煩惱。寮中首座。務要柔和。規矩先行。繩墨自定。

依時上案簡徑開談。有一不周。眾人共議。遊山翫水。出入有時。惡性道人。善言誘勸。倘不聽從。密白方丈。護善遮惡。取信檀那。淨髮圍爐。禮宜謙讓。右件規矩。委曲預聞。日用時中。各宜照顧。一撥便轉。善不可加。三喚不回。相聚何益。況乃心塵難掃。性水易湍。中器中根。可上可下。克賓法戰不勝。曾罰饘飯。一堂交遠。勝劣爭禪。輪卻糊餅兩箇。叢林榜樣。後學依從。焦山不說兩般禪。只要罰油十六兩。頌曰
烏龜忽爾艾燒頭。千古令人笑不休。奉勸後生高著眼。莫教罰了一斤油。

笑翁和尚家訓

日亦然。今夜亦然。睡時宜後起。宜先收單摺被。候開靜。動止回旋。向左肩。

晨朝粥罷。莫猖狂。盥漱低頭。少使湯。頭若痒時。須待浴。手巾乾淨。不相妨。

寂靜身心。展鉢時。出宜先筯入。先匙。食巾收摺。須臨後。左右和南。禮莫虧。

粥了。和南飯後茶。放參藥石。莫誼譁。出堂入戶。清規合。猶見叢林有作家。

座元門首板丁當。是甚禪和。敢入堂。追罰百錢。由自

可。高懸一膀最難當。

入室陞堂念誦時。從規合自具威儀。近來一等無羞恥。直裰中間小袖兒。

脫著衣鞋要整齊。掩門宜緩放籌低。密持呪語輕彈指。淨桶常將右手提。

入浴披衫貴靜恭。需湯擊板合從容。不應觸布安槽上。雙腳如何著桶中。

禮拜持經遣睡魔。不須將此當嚙囉。一朝突出娘生眼。執藥方知病轉多。

頂笠腰包號水雲。尋師切勿憚辛勤。法門冷淡須防

護莫學尋常救火軍。

黃龍死心新禪師小參

夫小參者。謂之家教。何謂家教。譬如人家有三箇五箇兒子。大底今日幹甚事。小底今日幹甚事。是與不是。晚間歸來。父母一一處斷。叢林中亦復如是。院門今日幹甚事。是與不是。住持人當一一處斷。觀今之時節。叢林淡薄。人根狹劣。不可說也。有一般破落戶長老。馳書達信。遮邊討院住。那邊討院住。纔討得院住。便揀箇好日入院。又道我是長老。方丈裏自在受快活。遮般底喚作地獄滓。如今叢林中。若論參禪固

是難得其人。我看見你遮一隊漢。在遮裏心憤憤口
悱悱。道我會禪。會道入方丈裏。趁口快。撐兩轉語。便
行。不是遮箇道理。又有一般漢。影影響響。認得箇頑
空。便道只是遮箇事。又有一般道。見虛空裏光影。又
有一般道。無有不是者。錯了也。救不得了也。遮般底
只宜色身安樂。莫教一頓病打在延壽堂內。如落湯
螃蟹。手忙腳亂。見神見鬼。遮邊討巫師。那邊討鑿博
卜凶卜吉。問好問惡。你不見我佛如來。爲三界鑒王
四生慈父。鑒一切眾生心病。只爲你不信自心。向外
馳求。被邪魔魍魎入你心中。做得許多見解。要識你

自心麼。如太陽當晝。天下皆明。那裏更有暗處。若到遮箇田地。亦無吉凶爻象。亦無是非好惡。便能向是非頭上坐。是非頭上臥。乃至姪坊酒肆虎穴魔宮。盡是當人安身立命之處。只爲你無量劫來業識濃厚。心中趨趨欹欹。繻繻絳絳。信之不及。便被世間情愛纏縛得來。七顛八倒。江南人護江南人。廣南人護廣南人。淮南人護淮南人。向北人護向北人。湖南人護湖南人。福建人護福建人。川僧護川僧。浙僧護浙僧。道我鄉人住院。我去讚佐他。一朝有箇不周全。翻作是非到處說。苦哉苦哉。恁麼行腳掩彩殺人。鈍置殺

人。若是箇漢。一畫畫斷。多少自由自在。若也畫不斷。處處被愛之所縛。愛色被色縛。愛院被院縛。愛名被名縛。愛利被利縛。愛身被身縛。你何不退步思量。你遮臭皮袋。有甚麼好處。當時只爲你有一念愛心。便入母胎中。受父精母血。交搆成一塊膿團。母喫熱時。便受鑊湯地獄。母喫涼時。便受寒冰地獄。及至撞從母胎裏出來。受寒受熱。受饑受飽。受病受苦。煎煎逼逼。直至今日。只爲不能返觀。便有許多是非生滅。我生你死。你死我生。生生死死。死死生生。隨業受報。無有休時。近來又有一般奴狗。受雇得錢。買度牒鬻下。

狗頭披佛袈裟。奴郎不辨菽麥不分。入吾法中破壞
吾法。一向裝裹箇渾身。倭腰捺胯胡揮亂罄。要做大
漢。大漢不恁麼做。要做大漢。須是退步莫面前背後。
奴唇婢舌嫌好道惡。說遮裏飲食豐厚。那裏寮舍穩
便。不消得如此。諸上座。人身難得佛法難聞。此身不
向今生度。更向何生度。此身你諸人要參禪麼。須是
放下著。放下箇甚麼。放下箇四大五蘊。放下無量劫
來許多業識。向自己根腳下推窮。看是甚麼道理。推
來推去。忽然心華發明。照十方刹。可謂得之於心。應
之於手。便能變大地作黃金。攪長河爲酥酪。豈不暢

快平生。莫只管冊子上念言念語。討禪討道。禪道不在冊子上。縱饒念得一大藏教。諸子百家。也只是閑言語。臨死之時。總用不著。古人悟了。方求明師決擇。去其砂石。純一真實。秤斤定兩。恰如人開襍貨鋪。相似。無種不有。來買甘草。便將甘草與他。來買黃連。便將黃連與他。不可買黃連。卻將甘草與他。又似你有一塊金。將入紅爐裏煅煉。煉來煉去。煉得熟也。方上鉗鎚。打作瓶盤釵釧。瓶重幾兩。盤重幾兩。一一分明。然後卻將此瓶盤釵釧。鎔成一金。喚作一味平等法門。若不如此。盡是儻洞真如顚預佛性。你還會麼。你

還信麼。山僧適來荅遮僧四轉語道。死中有活。活中有死。死中怕死。活中怕活。將此四轉語驗盡天下衲僧。且道天下衲僧將甚麼驗。良久云。大體還他肌骨好。不搽紅粉也風流。語錄

褒禪山慧空禪院輪藏記無爲居士楊傑作

法界本無眾生。眾生緣乎妄見。如來本無言教。言教爲乎有情。妄見者。眾生之病。言教者。如來之藥。以藥治病。則病無不治。以言覺妄。則妄無不覺。此如來不得已而言。賢智不得已而述也。故阿難陀集而爲經。優婆離結而爲律。諸菩薩衍而爲論。經律論雖分乎

三藏戒定慧蓋本乎一心。藏以示其函容。心不可以凝滯。是以雙林大士接物隨機。因權表實。聚言教而爲藏。載寶藏而爲輪。以教依輪。則教流而無礙。以輪顯教。則輪運而無窮。使披其教者。理悟變通。見其輪者。心不退轉。然後優游性海。解脫意筌。無一物不轉法輪。無一塵不歸華藏。非有深智者。其孰能與於此哉。

慈照聰禪師住襄州石門。請查待制爲撰僧堂記。

乾明寺者。去郡百里。古曰石門。因敕易之。高山峻谷。

虎豹所伏。岐路磽确。人烟寬絕。非志於道者。罔能棲
其心也。遊宦之徒。羈束利名。雖觀其勝絕。而罕能陟
其境。道守郡日。知有學者。法字守榮。自雍熙五年。參
尋而至。後安禪之堂。卑隘墮壞。於是發心重構。克堅
其志。聚落求化。多厯年所。召良工。市美材。迄景德三
年始告成。凡五間十一架。春有學徒。慧果攜錫至京。
請余識之。將刊於石。乃書曰。自佛法廣被。達磨西來。
具信根者。求證本源。星居曠野。蔽身草木。衣不禦寒。
食不充腹。及正法漸漓。人法替怠。百丈禪師。乃營其
棟宇。以安老病。邇來禪刹。競構宏壯。少年初學。恣臥

其間殊不知化緣者勞形苦骨。施財者邀福懺罪。明因果者如臥鐵牀。若當冤敵。自非朝夕。密密增長聖胎。其次親善知識者。志求解脫。可以暫容其形。龍神攸護。其或心汨蓋纏。身利溫煖。不察無明。不知命縮。惟記語言。自謂究竟。美也韶盡遷謝。墮彼惡趣。丈夫猛利。得不動心者哉。榮公生鳳翔虢邑。出家於雍州鄠縣白雲山淨居禪院。大中祥符二年四月八日記。

應庵華禪師荅詮長老法嗣書

老僧自幼出家。正因也。方袍圓頂。正因也。念生死未明。撥草瞻風。親近眞善知識。正因也。至於出世領眾。

今三十餘年。未嘗毫髮厚己也。方丈之務。未嘗少怠也。晝夜精勤。未嘗敢懈也。念眾之心。未嘗斯須忘也。護惜常住之念。未嘗敢私也。行解雖未及古人。隨自力量行之。亦不負愧也。痛心佛祖慧命懸危。甚於割身肉也。念報佛祖深恩。寢食不遑安處也。念方來衲子。心地未明。不啻倒懸也。雖未能盡古人之萬一。然此心不欺也。長老隨侍吾三四載。凜然卓卓可喜。去年夏末。命悅眾。是吾知長老也。吾謝鍾山寓宣城昭亭。未幾赴姑蘇。光孝方兩月。長老受鳳山之請。道由姑蘇。首來相見。道義不忘如此也。別後杳不聞耗。正

思念間懷淨上人來。承書并信物。方知入院之初。開堂爲吾燒香。乃知不負之心昭廓也。今旣爲人天眼目。與前來事體不同也。果能如吾自幼出家爲僧。行腳親近真善知識。以至出世住持。其正因行藏如此行之。則吾不妄付授也。又何患宗門寂寥哉。至祝無以表信。拂子一枝。法衣一頂。幸收之。紹興壬午七月初七日。住平江府光孝應庵老僧曇華書復。語錄

怡山然禪師發願文

歸命十方調御師。演揚清淨微妙法。三乘四果解脫僧。願賜慈悲哀攝受。但某甲自違眞性。枉入迷流。隨

生死以飄沈。逐色聲而貪染。十纏十使。積成有漏之因。六根六塵。妄作無邊之罪。迷淪苦海。深溺邪途。著我耽人。舉枉措直。累生業障。一切慙尤。仰三寶以慈悲。瀝一心而懺悔。所願能仁。拯拔善友。提攜出煩惱之深淵。到菩提之彼岸。此世福基。命位各願昌隆。來生智種。靈苗同希增秀。生逢中國。長遇明師。正信出家。童真入道。六根通利。三業純和。不染世緣。常修梵行。執持禁戒。塵業不侵。嚴護威儀。蜎飛無損。不逢八難。不缺四緣。般若智以現前。菩提心而不退。修習正法。了悟大乘。開六度之行門。越三祇之劫海。建法幢。

於處處。破疑網於重重。降伏眾魔。紹隆三寶。承事十方諸佛。無有疲勞。修學一切法門。悉皆通達。廣作福慧。普利塵沙。得六種之神通。圓一生之佛果。然後不捨法界。徧入塵勞。等觀音之慈心。行普賢之願海。他方此界。逐類隨形。應現色身。演揚妙法。泥犁苦趣。餓鬼道中。或放大光明。或見諸神變。其有見我相。乃至聞我名。皆發菩提心。永出輪迴苦。火鑊冰河之地。變作香林。飲銅食鐵之徒。化生淨土。披毛戴角。負債啗冤。盡罷辛酸。咸霑利樂。疾疫世而見爲藥草。救療沈痾。饑饉時而化作稻粱。濟諸貧餒。但有益無不興。

崇。次期累世冤親現存眷屬。出四生之汨沒。捨萬劫之愛纏。等與含生齊成佛道。虛空有盡。我願無窮。情與無情同圓種智。

開善密庵謙禪師荅陳知丞書

某啓。欣審官舍多暇。焚香靜默。坐進此道。何樂如之。參禪如應舉。應舉之志在乎登第。若不登第。而欲功名富貴光華一世者。不可得也。參禪之志在乎悟道。若不悟道。而欲福德智慧超越三界者。不可得也。竊嘗思悟道之爲易。登第之爲難。何故學術在我。與奪在彼。以我之所見。合彼之所見。不亦難乎。是以登第

之難也。參究在我。證入在我。以我之無見合彼之無見。不亦易乎。是以悟道之爲易也。然參禪者眾。悟道者寡。何也。有我故也。有我則不能證入。亦易中之難也。讀書者眾。及第者亦眾。何也。見合故也。見合則推而應選。是難中之易也。故見合爲易。無我爲難。無我爲易。無無爲難。無無爲易。亦無無無爲難。亦無無無爲易。亦無無無爲難。亦無無無爲易。和座子撞翻爲難。故龐居士云。煉盡三山鍊。鎔銷五嶽銅。豈欺人哉。因筆及此。庶火爐邊團圓頭說無生話時。聊發一笑。

司馬溫公解禪偈

文中子以佛爲西方聖人。信如文中子之言。則佛之心可知矣。今之言禪者。好爲隱語以相迷。大言以相勝。使學者俛俛然。益入於迷妄。故予廣文中子之言。而解之作解禪偈六首。若其果然。則雖中國行矣。何必西方。若其不然。則非予之所知也。

忿怒如列火。利欲如銛鋒。終朝長戚戚。是名阿鼻獄。顏回安陋巷。孟軻養浩然。富貴如浮雲。是名極樂國。孝弟通神明。忠信行蠻貊。積善來百祥。是名作因果。言爲百代師。行爲天下法。久久不可掩。是名不壞身。

仁人之安宅。義人之正路。行之誠且久。是名光明藏。道德修一身。功德被萬物。爲賢爲大聖。是名佛菩薩。

仰山飯戶部尙書阮中大撰

阮戶部外集

仰山飯仰山飯。粒粒如珠似銀爛。食者須知來處難。略爲諸人試拈看。東臯西疇春早時。耕夫餉婦寒且饑。土膏脉起農事動。牛領生瘡猶挽犁。夏苗秋秀未成實。無雨四天惟烈日。背枯面裂汗流胸。耘耨只愁稂莠出。秋深稻熟如黃雲。晝穫夜舂甘苦辛。里胥催督王租急。官債私逋皆及身。官債未償被鞭扑。私債未償賣田屋。父母妻兒飽幾曾。家家畱米羞齋粥。住

持老僧沿門求丐士緣化主撮收手胼足胝不敢憚
櫛風沐雨何曾休五更雲堂門尙閉普供厨中人早
起惟憂清眾粥飯遲日日朝朝悉如是米瀋滿地凝
如脂去麤存精運柴炊沸湯烟燄甌釜熱執務捨力
良勞疲長板聲終木魚吼端坐禪牀捧盂受細論變
生造熟功卻恐閻黎難下口不從香積世界來又非
鬼神供爾齋一匙一杓至一鉢皆是求福檀信財維
那白槌似璫響十聲佛名嬾用喝衍益纔遲忿怒生
第二戒中念都忘古人都爲學道忙徧參知識遊諸
方木皮草葉供鐺煮豈有此飯充飢腸百歲光陰如

夢幻參請工夫宜早辦。若還心地不分明。佛也難消
仰山飯。

白侍郎六讚偈并序

出長慶集

樂天常有願。願以今生世俗文筆之因。翻爲來世讚
佛乘轉法輪之緣也。今年登七十。老矣病矣。與來世
相去甚邇。故作六偈。跪唱於佛法僧前。欲以起因發
緣。爲來世張本也。

讚佛

十方世界。天上天下。我今盡知無如佛者。堂堂巍巍
爲天人師。故我禮足讚歎皈依。

讚法

過見當來千萬億佛。皆因法成法。從經出。是大法輪。
是大寶藏。故我合掌至心迴向。

讚僧

緣覺聲聞諸大沙門。漏盡果滿眾中之尊。假和合力。
求無上道。故我稽首和南僧寶。

讚眾生

毛道凡夫火宅眾生。胎卵濕化一切有情。善根苟種。
佛果終成。我不輕汝。汝無自輕。

懺悔

無始劫來所造諸罪。若輕若重無大無小。我求其相中間內外。了不可得。是名懺悔。

發願

煩惱願去。涅槃願住。十地願登。四生願度。佛出世時。願我得親。最先勸請。請轉法輪。佛滅度時。願我得值。最後供養。受菩提記。

天台圓法師自誠

三界悠悠一囹圄。羈鎖生靈受酸楚。本來面目久沈埋。野馬無羶恣飄鼓。欲火燒殘功德林。逝波傾入無明塢。紛紛萬類器中蚊。啾啾鳴亂沈還舉。亦曾天帝

殿中遊也。向閻公鍋裏煮。循環又撞入胞胎。交搆腥
臊成沫聚。一包膿血暫扶持。數莖白骨權撐拄。七情
馳騎不知歸。六賊爭鋒誰作主。春風不改昔時波。依
舊貪瞋若狼虎。改頭換面弄機關。忍氣吞聲受辛苦。
貴賤賢愚我與人。是非榮辱今猶古。金烏玉兔自摩
空。雪鬢朱顏盡成土。我嗟瞥地一何晚。隨波逐浪空
流轉。追思古聖與先賢。掩袂令人獨羞赧。而今捉住
主人翁。生死魔來我誰管。昔時伎倆莫施呈。今日生
涯須自勉。是非窟裡莫回頭。聲利門前高著眼。但於
自己覓愆尤。肯與時流較長短。一點靈光直照西。萬

端塵事任舒卷。不於蝸角竊虛名。獨向金臺預高選。
從他病死與生老。只此一回相括惱。修行惟下有稍
難。豎起脊梁休放倒。莫教錯認定盤星。自家牢守衣
中寶。願同法界冤與親。共駕白牛遊直道。

緇門警訓卷第六終

緇門警訓卷第七

芙蓉楷禪師小參

夫出家者。爲厭塵勞。求脫生死。休心息念。斷絕攀緣。故名出家。豈可以等閑利養埋沒平生。直須兩頭撒開。中間放下。遇聲遇色。如石上栽花。見利見名。如眼中著屑。況從無始以來。不是不曾經歷。又不是不知次第。不過翻頭作尾。止於如此。何須苦苦貪戀。如今不歇。更待何時。所以先聖教人。只要盡卻今時。能盡今時。更有何事。若得心中無事。佛祖猶是冤家。一切世事自然冷淡。方始那邊相應。你不見。隱山至死不

肯見人。趙州至死不肯告人。匾檐拾橡栗爲食。大梅以荷葉爲衣。紙衣道者只披紙。玄泰上座只著布。石霜置枯木堂與人坐臥。只要死了你心。投子使人辦米同煮共餐。要得省取你事。且從上諸聖有如此榜樣。若無長處如何甘得。諸仁者若也於斯體究。的不虧人。若也不肯承當。向後身恐費力。山僧行業無取。忝主山門。豈可坐費常住。頓忘先聖付囑。今者輒敷古人爲住持體例。與諸人議定。更不下山。不赴齋。不發化主。唯將本院莊課一歲所得。均作三百六十分。日取一分用之。更不隨人添減。可以備飯則作飯。作

飯不足則作粥。作粥不足則作米湯。新到相見茶湯而已。更不煎點。惟置一茶堂。自去取用。務要省緣。專一辦道。又況活計具足。風景不疎。花解笑。鳥能啼。木馬長鳴。石牛善走。天外之青山。寡色耳畔之流水。無聲。嶺上猿啼。露顯中宵之月。林間鶴唳。風回清曉之松。春風起而枯木龍吟。秋葉凋而寒林華發。玉階鋪苔蘚之紋。人面帶煙霞之色。音塵寂爾。消息沈然。一味蕭條。無可輒向。山僧今日向諸人面前說家門。已是不著便。豈可更去陞堂入室。拈槌豎拂。東呵西棒。張眉努目。如癩病發相似。不惟屈枕上座。況亦孤負。

先聖。你不見達磨西來。少室山下面壁九年。二祖至
於立雪斷臂。可謂受盡艱辛。然而達磨不曾措了一
辭。二祖不曾問著一句。還喚達磨作不爲人得麼。二
祖做不求師得麼。山僧每至說著古聖做處。便覺無
他容身。慚愧後人軟弱。又況百味珍羞。遞相供養。道
我四事具足。方可發心。只恐做手腳不迭。便是隔生
隔世去也。時光似箭。深爲可惜。雖然如是。更在諸人
從長相度。山僧也強教你不得。諸仁者還見古人偈
麼。山田脫粟飯。野菜淡黃虀。喫則從君喫。不喫任東
西。伏惟同道各自努力。珍重。

黃蘗禪師示眾

預前若打不徹。臘月三十夜到來。管取你熱亂。有般外道。纔見人說做工夫。他便冷笑。猶有遮箇在。我且問你。忽然臨命終時。你將何抵敵生死。你且思量看。卻有箇道理。卽得天生彌勒。自然釋迦。有一般閑神野鬼。纔見人有些少病。便與他人說。你只放下著。及至到他有病。又卻理會不下。手忙腳亂。爭奈你肉如利刀碎割。做主宰不得。萬般事。須是閑時辦得。下忙時得用。多少省力。休待臨渴掘井。做手腳不辦。遮場狼藉。如何迴避。前路黑暗。信采胡鑽亂撞。苦哉苦哉。

平日只學口頭三昧。說禪說道呵佛罵祖。到遮裏都用不著。平日只管瞞人。爭知道今日自瞞了也。阿鼻地獄中決定放你不得。而今末法將沈。全仗有力量兄弟家。負荷續佛慧命。莫令斷絕。今時纔有一箇半箇行腳。只去觀山觀景。不知光陰能有幾何。一息不回便是來生。未知甚麼頭面。嗚呼勸你兄弟家。趁色力康健時。討取箇分曉處。不被人瞞底一段大事。遮些關捩子。甚是容易。自是你不肯去下死志做工夫。只管道難了。又難。好教你知。卮得樹上自生底木杓。你也須自去做箇轉變始得。若是箇丈夫漢。看箇公

案僧問趙州狗子還有佛性也無。州云無。但去二六時中看箇無字。晝參夜參。行住坐臥。著衣喫飯處。阿屎放尿處。心心相顧。猛著精彩。守箇無字。日久月深。打成一片。忽然心花頓發。悟佛祖之機。便不被天下老和尚舌頭瞞。便會開大口。達磨西來。無風起浪。世尊拈花一場敗闕。到遮裏說甚麼。閻羅老子。千聖尚不奈你何。不信道。直有遮般奇特。爲甚如此。事怕有心人。頌曰

塵勞迴脫事非常。謹把繩頭做一場。不是一番寒徹骨。爭得梅花撲鼻香。

徐學老勸童行勤學文

玉不琢不成器。人不學不知道。出家兒幸得身離塵網。居於廣堂大廈。切不可溫飽自滿其志。少壯之時。不勤學問。不究義理。不正呼吸。對聖前如何可以宣白。士大夫前如何可以談吐。不學一筆字。文疏如何寫。士大夫往來書尺如何回。出家人胸中貫古今。筆下起雲煙。方可了身了性。以至於了命。若自懶惰。託言所稟無受道之資。是自壞了一生也。且如猿猴獸類也。尚可教以藝解。鵠鵠禽鳥也。尚可教以嚆唱。人爲萬物之靈。如不學視禽獸之不若也。爲人師者。

自當尙嚴。師嚴而後道尊。與其初年失於寬而招異
時之怨。不若過於嚴招異時之感。人家子弟捨父事
師。師卻不嚴而縱其懶。及其時過失學也。談吐又訥。
宣白又鈍。發遣又疎。寫染又拙。覺時事事無能。方始
自悔而歸咎於其師。何謂至感。初年脫白從師。師長
訓導極其嚴緊。於公事畢。然後敢治私事。禁妄出讀
書。要背。寫字要楷。義理要通。道念要正。日漸月磨。復
還固有之天。得造洞然之妙。由是性海清澄。心珠瑩
徹。學仙者著腳蓬萊。學佛者安身樂國。到恁麼時。卻
感師長嚴訓之功也。

月窟清禪師訓童行

咨爾童行聽予誠云。高以下基。洪田織起。古今賢聖。莫不由斯。儒宗頗多釋氏尤甚。茲不繁引。略舉二三。虞夏至尊。尙曾歷試。可能二祖猶服勤勞。一念因真。千生果實。若其濫服終無所成。任是毀形徒增黑業。爾等童耄。今各顓誠。履實踐真。無隨流俗。處清淨地。生難遭心。見佛逢僧。克勤敬慕。如能反責。可謂丈夫。施主交肩。宜先祇揖。同衣相見。莫後和南。夕火晨香。常常勿懈。齋餐蚤粥。念念興慚。當直殿堂。供過寮舍。宜勤拂拭。無怠應承。進止威儀。上流是則。言默要道。

下輩休詢。貝葉固合精通。墳典尤宜博學。稍知今古。
方解爲人。若似啞羊出家何益。如來未成佛果。文武
兼能。永嘉才作人師。宗說俱備。晞顏晞驥。子雲有言。
誦箒誦苕。釋尊無誤。各須努力。莫謾因循。立志堅高。
不墮凡地。故經云。立志如高山。種德若深海。如斯苦
口。期汝爲人。報荅佛祖莫大恩。拔濟眾生無量苦。日
日如是不愧自心。頌曰。

負春剗草示嘉模。紹續須還猛烈徒。一念豁然三際
斷。單傳直下老臊胡。

山谷居士黃太史發願文

昔者師子王。白淨法爲身。勝義空谷中。奮迅及哮吼。
念弓明利箭。被以慈哀甲。忍力不動搖。直破魔王軍。
三昧常娛樂。甘露爲美食。解脫味爲漿。遊戲於三乘。
安住一切智。轉無上法輪。我今稱揚稱性實語。以身
口意籌量觀察。如實懺悔。我從昔來。因癡有愛。飲酒
食肉。增長愛渴。入邪見林。不得解脫。今者對佛發大
誓願。願從今日盡未來世。不復淫欲。願從今日盡未
來世。不復飲酒。願從今日盡未來世。不復食肉。設復
淫欲。當墮地獄。住火阬中。經無量劫。一切眾生爲淫
亂故。應受苦報。我皆代受。設復飲酒。當墮地獄。飲淫

銅汁經無量劫。一切眾生爲酒顛倒。應受苦報。我皆代受。設復食肉。當墮地獄。吞熱鐵丸。經無量劫。願我以此盡未來際。忍事誓願。根塵清淨。具足十忍。不由他教。入一切智。隨順如來。於無盡眾生界中。現作佛事。恭惟十方洞徹。萬德莊嚴。於刹刹塵塵。爲我作證。設經歌羅邏身。忘失本願。惟垂加被。開我迷雲。稽首如空等一痛切。

雲峰悅和尚小參語

湖隱石刻

師舉百丈和尚示眾云。汝遮一隊後生。經律論學。故是不知也。入眾參禪。禪又不曾。臘月三十日作麼生。

折合去。師云。酌然。諸上座去。聖時遙。人心淡薄。看卻
今之叢林。更是不得也。所在之處。聚徒三百五百。浩
浩地。只以飲食豐厚。寮舍溫暖。便爲旺化。其間孜孜
爲道者。能有幾人。設有十箇五箇。走上走下。半青半
黃。總道我會了也。各各自謂握靈蛇之寶。孰肯知非。
及乎編辟挨拶。將來直是萬中無一。苦哉苦哉。所謂
般若叢林。歲歲彫。無明荒草。年年長。就中今時後生。
纔入眾來。便乃端然拱手。受他別人供養。到處菜不
擇一莖柴不搬一束。十指不沾水。百事不干懷。雖則
一期快樂。爭柰三塗累身。豈不見教中道。寧以熱鐵

纏身不受信心人衣。寧以洋銅灌口。不受信心人食。
上座若是去。直饒變大地作黃金。攪長河爲酥酪。供
養上座不爲分外。若也未是。至於滴水寸絲。便須披
毛帶角。牽犁拽把。償他始得。又不見祖師云。入道不
通理。復身還信施。長者八十一。其樹不生耳。終不虛
也。諸上座光陰可惜。時不待人。莫待一朝眼光落地。
緇田無一簣之功。鐵圍陷百刑之痛。莫言不道珍重。

月林觀和尚體道銘

上士參玄人。光陰莫虛弃。渡江須用船。爲人須有志。
名相各不同。非一亦非二。佛法苦無多。於中無別伎。

動著關捩子。非師自然智。徹底老婆心。觸人無忌諱。
刹境一毫端。到此無迴避。唱起德山歌。道者合如是。
佛祖出頭來。吞聲須飲氣。作略遮些兒。古今無變異。
混沌未分時。早有箇田契。人人本具足。不肯回頭視。
箇箇達本鄉。切忌著名位。過去諸如來。不離而今喫。
現在諸菩薩。轉次而受記。智者暗點頭。心空親及第。
愚人不信受。拋家自逃逝。哀哉猛省來。現成真活計。
箇裏用無窮。宗門第一義。左右逢其原。亦不離行市。
銅頭鐵額兒。腦門須著地。願以此功德。普及於一切。

慈受深禪師小參

此心清淨猶如虛空。無一點相貌。舉心動念。全乖法體。纔退步。便相應。只是不肯退步。纔放下。便安樂。只是不肯放下。大都是無始劫來。慣習成了也。古人學道。先打當貪瞋癡。然後放教一切處。冷啾啾地。如臘月裏。扇子相似。直是無人覷著。亡得名利。甘得淡薄。世間心輕微。道念自然濃厚。匾檐山和尚。一生拾橡子煮喫。永嘉大師。不喫鑊頭下菜。高僧惠休。三十年著一緇鞋。百補千綴。遇輒地行。則赤腳。恐損他信施信心物。難消。他總是妻子口中減削將來。供養你了。便要邀福懺罪。你十二時中。種種受用。盡出他人之

力未饑而食未寒而衣未垢而浴未困而眠。道眼未明。心漏未盡。如何消得。故古德云。爲成道業。施將來道業未成。爭消得。山僧遮裏不可與你諸人打粥飯。過日也。若是坐消信施。諸天不喜。麤茶淡飯也難消他底。如今初學比丘。飽學高眠。取性過日。猶嫌不稱意。在出家人如一塊磨刀石。一切人要刀快。便來你石上磨。張三也來磨。李四也來磨。磨來磨去。別人刀快。自家石漸消薄。有底更嫌他人不來我石上磨。有甚便宜處。進食如進毒。受施如受箭。幣厚言甘。道人所畏。你灼然與道相應。萬兩黃金亦消得。此事不是。

說了便休。須是實到遮箇田地始得。高談大論瞞人自瞞。大不濟事。如今叢林中無人說著遮般話也。莫道焦山長老說禪。全無孔竅。記取記取。伏惟珍重。

汾州大達無業國師上堂

有僧問曰。十二分教流於此土。得道果者非止一二。云何祖師東化。別唱玄宗。直指人心。見性成佛。豈得世尊說法有所未盡。只如上代諸德高僧。並學貫九流。洞明三藏。生肇融又叡盡是神異間生。豈得不知佛法遠近。某甲庸昧。願師指示。師曰。諸佛不曾出世。亦無一法與人。但隨病施方。遂有十二分教。如將蜜果

換苦葫蘆。淘汝諸人業根。都無實事。神通變化及百
千三昧門。化彼天魔外道。福智二嚴爲破執有滯空
之見。若不會道及祖師來意。論甚麼生肇融叡。如今
天下解禪解道。如河沙數。說佛說心。有百千萬億。纖
塵不去。未免輪迴。思念不亡。盡從沈墜。如斯之類。尙
不能自識業果。妄言自利利他。自謂上流。並他先德。
但言觸目無非佛事。舉足皆是道場。原其所習。不如
一箇五戒十善凡夫。觀其發言嫌他二乘十地菩薩。
且醞酏上味爲世珍奇。遇斯等人。翻成毒藥。南山尙
自不許呼爲大乘。學語之流。爭峰唇舌之間。鼓論不

形之事。並他先德誠實苦哉。只如野逸高士。尙解枕石漱流。棄其利祿。亦有安國理民之謀。徵而不赴。況我禪宗。途路且別。看他古德道人。得意之後。茆茨石室。向折腳鐺子裏煮飯喫。過三二十年。名利不干懷。財寶不爲念。大忘人世隱迹。岩叢君王命而不來。諸侯請而不赴。豈同我輩貪名愛利。汨沒世途。如短販人。有少希求。而忘大果。十地諸賢。豈不通佛理。可不如一箇博地凡夫。實無此理。他說法如雲如雨。猶被佛訶云。見性如隔羅縠。只爲情存聖量。見在果因。未能逾越聖情。過諸影迹。先賢古德。碩學高人。博達

古今洞明教網。蓋爲識學詮文。水乳難辨。不明自理。念靜求真。嗟乎得人身者。如爪甲上土。失人身者。如大地土。良可傷哉。設有悟理之者。有一知一解。不知是悟中之則入理之門。便謂永出世利。巡山傍澗。輕忽上流。致使心漏不盡。理地不明。空到老死無成。虛延歲月。且聰明不能敵業。乾慧未免苦輪。假使才並馬鳴。解齊龍樹。只是一生兩生。不失人身。根思宿淨。聞之卽解。如彼生公。何足爲羨。與道全遠。共兄弟論實。不論虛。只遮口食身衣。盡是欺賢罔聖。求得將來。他心慧眼觀之。如喫膿血一般。總須償他始得。阿那

箇有道果。自然招得他信。施來不受者。學般若菩薩。不得自謾。如冰凌上行。似劍刃上走。臨終之時。一毫凡聖情量不盡。纖塵思念未忘。隨念受生。輕重五陰。向驢胎馬腹裏託質。泥犁鑊湯裏煮爍一徧了。從前記持憶想。見解智慧。都虛一時失卻。依前再爲螻蟻。從頭又作蚊蚋。雖是善因而遭惡果。且圖甚麼。兄弟只爲貪欲成性。二十五有向腳跟下繫著。無成辦之期。祖師觀此土眾生。有大乘根性。惟傳心印。指示迷情。得之者卽不揀凡之與聖。愚之與智。且多虛不如少實。大丈夫兒如今直下便休歇去。頓息萬緣。越生

死流。迥出常格。靈光獨照。物累不拘。巍巍堂堂。三界獨步。何必身長丈六。紫磨金輝。項佩圓光。廣長舌相。若以色見。我是行邪道。設有眷屬莊嚴。不求自得。山河大地。不礙眼光。得大總持。一聞千悟。都不希求。一食之直。汝等諸人。倘不如是。祖師來至此土。非常有損有益。有益者。百千人中。撈漉一箇半箇。堪爲法器。有損者。如前已明。從他依三乘教法修行。不妨卻得四果三賢。有進修之分。所以先德云。了卽業障本來空。未了還須償宿債。傳燈

法昌運禪師小參

大凡參學兄弟道眼未明。心地未安。入一叢林。出一
保社。須當親近良朋善友。二六時中。將佛法爲事。直
須決擇。令心眼精明。遮箇不是小事。光陰易失。時不
待人。一失人身。卒未有出頭處在。莫與麼打闕過時。
今日。三。明日。四。遮裏經冬。卅邊過夏。記取一肚葛藤。
路布學解。到處掠虛摩唇。將背漢語胡言。道我解禪。
解道。輕忽好人。作無間業。將知此事大不容易。沒量
大人到遮裏。討頭鼻不著。莫當等閑。開大口。法昌老
漢。無人情。莫愛人。摩捋你。贊歎你。盡不是好心。一朝
風火解散。眼光落地。善惡業緣。受報好醜。生死境界。

一時現前。卽時便如落湯螃蟹。手忙腳亂。從前學得。活計神通佛法。總使不著。業識茫茫。無本可據。追悔不及。隨緣受報。改頭換面。都未可定。豈不見古者道學般若菩薩。且莫自瞞。切須子細。纖毫不盡。未免輪迴。絲念未忘。盡從沈墜。你要識披毛戴角底麼。便是你尋常亂作主宰者是。你要識拔舌地獄底麼。便是誑惑迷途者是。你要識寒冰鑊湯底麼。便是你濫膺信施者是。三塗八難。盡是你心自作。只爲道眼不明。方乃如是。若是諦當底人。豈有遮般消息。法昌與麼說話。盡是契合諸聖。不獨爲你三兄四弟。但未得忍。

菩薩皆有此過。豈況天龍八部。既來遮裏經冬過夏。莫生容易。老僧鑊頭邊討飯供養你。說些子出家話。莫被人我^批劣卻。一生空過。一旦四大分張。卽時作伎倆遲了也。有一般漢。聞人舉著他肚裏事。瞋心忿起。便道佛法豈有與麼事。大悟不拘小節。更問阿誰。我問你悟見箇甚麼。還脫得髑髏識想也未。十二時中。且與五戒十善相應。靈山會上。還曾見有無行業底佛麼。還有妄語底祖師麼。大似將牛屎比旃檀。有甚交涉。可謂醍醐上味。爲世所珍。遇斯等人。翻成毒藥。你要得他日相應。但從今日去。一切處放教枯淡。二

六時中對五欲八風。如盲人視物。不爲諸法管帶。亦
不管帶諸法。六根門頭。檢點無絲毫過患。方有少許
趣向分。法昌與麼說話。如服瞋眩底藥相似。一期苦
口。他時大有得力處。所以道。假使百千劫。所作業不
忘。因緣會遇時。果報還自受。無人替代。各自努力珍
重。語錄

古鏡和尚回汾陽太守

南陽忠國師三詔竟不赴。遂使唐肅宗愈重於佛祖。
然我望南陽雲泥雖異路。回首思古人。媿汗下如雨。
如何汾陽侯。視我如泥土。戲以玉峰寺。出帖請權住。

豈可爲一身。法門同受污。萬古長江水。惡名洗不去。
謹謹納公帖。觀使自收取。放我如猿鳥。雲山樂幽趣。
他年無以報。朝夕香一炷。

雪竇明覺禪師壁間遺文石刻

夫傳持祖燈。嗣續佛壽。此非小任。宜景前修。肅爾威
儀。尊其瞻視。懲忿窒慾。治氣養心。無以名利動於情。
無以得失介於意。無隨世之上下。無逐人之是非。黑
白置之於胸。喜怒不形於色。樂人之樂。猶己之樂。憂
人之憂。若己之憂。容眾尊賢。克己復禮。無因小隙失
素所善。無背公義。弃素所疎。能不可矜。勢不可恃。無

護已短無拙人長。見德不可忘身。在貴不可忘賤。且夫學本修性。豈愠人之不知。道貴全生。無蘄世之為用。人或慕義禮固推餘。必也篤爾心誠。誨以規矩。博援群籍深示妙宗。慈室忍衣不可須臾而離。大方寶所欲其造次必是。動息有常嫌疑必慎。人不可侮天不可欺衆之去來無追無拒。人之毀譽無恚無貪。內無所慚外無所恤。或若聲華溢美利養豐多。畏四趣之果因。慎三寶之交互。死生未脫業苦難逃。方其得志亟思利正。身如行廁利稱輒賊。百年非久三界無安。可惜寸陰當求解脫。古先諸祖舉有懿範。杖錫一

味喫土丹霞只箇布裘。趙州青灰滿首。朗師編草為壇。或深禪久修。或優詔不就。大都約則𡵚失。奢則招譏。謙則有光。退則無忌。去佛愈遠。行道有艱。觀時進止。無自辱也。

范蜀公送圓悟禪師行腳

觀水莫觀污池水。污池之水魚鰲卑。登山莫登迤邐山。迤邐之山草水稀。觀水須觀滄溟廣。登山須登泰山上。所得不淺所見高。工夫用盡非徒勞。南方幸有選佛地。好向其中窮妙旨。他年成器整頽綱。不負男兒出家志。大丈夫休擬議。豈為虛名滅身計。百年隨

分覺無多。莫被光陰暗添歲。成都況是繁華國。打住
只因花酒惑。吾師幸是出家兒。肯隨齷齪同埋沒。吾
師幸有虹蜺志。何事躊躇溺泥水。豈不見吞舟之魚
不隱卑流。合抱之木不生丹丘。大鵬一展九萬里。豈
同春岸飛沙鷗。改何如急駕千里驥。莫學鷦鷯戀一枝。
直饒講得千經論。也落禪家第二機。白雲長是戀高
臺。莫罩朝籠不暫開。爲慰蒼生霖雨望。等閑依舊出
山來。又不見荆山有玉名璠瑤。病良工未遇居蓬蒿。當
時若不離荆楚。爭得連城價倍高。

保寧勇禪師示看經

夫看經之法。後學須知。當淨三業。若三業無虧。則百福俱集。三業者。身口意也。一端身正坐如對尊顏。則身業淨也。二口無襍言斷諸嬉笑。則口業淨也。三意不散亂屏息萬緣。則意業淨也。內心既寂。外境俱捐。方契悟於真源。庶研窮於法理。可謂水澄珠瑩。雲散月明。義海湧於胸襟。智嶽凝於耳目。輒莫容易。實非小緣。心法雙忘。自他俱利。若能如是。真報佛恩。

大智照律師送衣鉢與圓照本禪師書

某年月日。比丘元照謹裁書。獻於淨慈圓照禪師。元照早嘗學律。知佛制。比丘必備三衣一鉢。坐具漚囊。

是爲六物。上中下根制令遵奉。故從其門者不可輒違。違之則抵逆上訓。非所謂師資之道也。三衣者何。一曰僧伽梨。謂之大衣。入聚應供登座說法。則著之。二曰鬱多羅僧。謂之中衣。隨眾禮誦入堂受食。則著之。三曰安陀會。謂之下衣。道路往來寺中作務。則著之。是三種衣。必以麤疎麻苧爲其體。青黑木蘭染其色。三肘五肘爲其量。裂碎還縫。所以息貪情也。條葉分明。所以示福田也。言其相則三乘聖賢而同式。論其名則九十六道所未聞。敘其功則人得免凶危之憂。龍被逃金翅之難。備存諸大藏。未可以卒舉也。一

鉢者。具云鉢多羅。此云應器。鍤瓦二物體如法也。煙熏青翠色如法也。三斗斗半量如法也。蓋是諸佛之標幟而非廊廟之器用矣。昔者迦葉如來授我釋迦本師。智論所謂十三條麤布僧伽黎是也。洎至垂滅。遣飲光尊者持之於雞足山。以待彌勒。有以見佛佛之所尊也。祖師西至六代相付。表嗣法之有自。此又祖祖之所尙也。今有講下僧在原。奉持制物有年數矣。近以病卒。將啓手足。囑令以衣鉢坐具奉於禪師。實以賴其慈蔭。資其冥路故也。恭惟禪師道邁前修。德歸庶物。黑白蟻慕遐邇雲奔。天下叢林莫如斯盛。

竊謂事因時舉。道假人宏。果蒙慙屈。高明俯從。下意
許容。納受。特爲奉持。如是則大聖之嚴制可行。諸祖
之餘風未墜。謹遣僧齋衣鉢。共五事。修書以道其意。
可否間。惟禪師裁之。不宣。
準薩婆多中三衣長五肘
廣三肘每肘一尺八寸準
姬周尺長九尺
廣五尺四寸

釋門登科記序

三代僧史十科取人。讀誦一門功業尤重。皇朝著令。
帝王誕辰。天下度僧。用延聖祚。尊崇吾教。宣布眞風。
自古皆然。於茲尤盛。方今州縣淨侍實繁。每歲選人。
必量經業。開場考試。合格精通。公榜星羅。獎平生之

勤苦。綸恩露墜。許畢世以安閑。外被田衣。內懷戒寶。
爲法王子。作人天師。不事耕桑。端受信施。棲心物外。
旅泊寰中。釋子之榮。豈復過此。近世出俗。多無正因。
反欲他營。不崇本業。唯圖進納。濫預法流。或倚侍宗
親。或督迫師長。至有巡街打化。袖疏干求。送惠追陪。
強顏趨謁。頻遭毀辱。備歷艱辛。爲者百千。成無數十。
豈信有榮身良策。安樂法門。斯由當本昧出家心。抑
亦爲人無丈夫志。況蓮華妙典。鷲嶺極談。大事因緣。
開佛知見。是諸佛降靈本致。實羣生悟入津途。無量
國中。不知名字。幸而聞見。那不誦持。豈獨孤恩。誠爲

忘本奉勉未度者。宜加精至。早冀變通。已達者莫廢
溫尋。終爲道業。百金供施。實亦能消。四輩瞻依。諒無
慚德。幻軀有盡。實行不亡。故有舌相粲若紅渠。身骨
碎如珠顆。具書傳錄。識者備聞。況般若。有經耳之緣。
法華。校隨喜之福。幸依聖訓。勿棄時陰。近期於削髮
爲僧。遠冀於破魔成佛。若能如此。夫復何言。所患爲
僧。不應於十科。事佛徒消於百載。古賢深誠。寧不動
心哉。

顏侍郎荅雲行人書

近辱書誨。且以禪教之說見教。讀之深有開慰。而向

來亦嘗有所開示。適以多事不能與師周旋。今復有言。自非見愛之深。孰能以此相警。顧我愚昧。何足知之。然師所言者。余竊疑焉。於如來方便之道。似執一偏。猶有人我之見。以我爲是。以人爲非。於佛法中。是爲大病。人我不除。妄談優劣。只爲戲論。爭之不已。遂成謗法。未獲妙果。先招惡報。不可不慎。但能於先佛一方便門。精進修行。行滿功圓。自然超脫。不必執我者爲是。以餘爲非也。修行淨土。佛及菩薩。皆所稱歎。在家出家。往生非一。況今末法之中。修此門者。可謂捷徑。然於是中間。亦須洗去根塵。摧折我慢。於其他

種種法門。雖非正修行路。隨力隨分。亦加欽信。豈可妄論優劣。自爲高下。達磨西來。不立文字。直傳心印。一花五葉。自曹溪來。悟此法者。如稻麻竹葦。在李唐時。世主尊崇。如事師長。以至於今。師授不絕。特未可以優劣議也。若必欲引教家義目。定其造證。謂如是修者。方入某地。如是行者。方登某位。眞所謂描畫虛空。徒自勞耳。故經云。如人數他寶。自無半錢分。於法不修行。多聞亦如是。願師屏去知見。勿論其他。專心自修於淨業也。某每與師談。見師多斥不立文字之說。使此說非善。則達磨必不西來。二祖必不肯斷臂。

求之也。今禪家文字徧滿天下。此乃末流自然至此。何足怪耶。娑婆世界眾生知見種種差別。非可以一法而得出離。故佛以方便設種種法門。使其東西南北縱橫小大。皆可修行。皆可證入。華嚴會上文殊師利。蓋嘗問於覺首言。心性是一。云何見有種種差別。問於德首言。如來所悟惟是一法。云何乃說無量諸法。問於智首言。於佛法中智爲上首。如來何故或讚布施。或讚持戒。或讚堪忍。以至或復讚歎慈悲喜捨。終無有以一法而得出離者。咸有頌答。是師之朝夕所誦者也。斯理必深明之。夫受病旣殊。處方亦異。今

以手足之疾服某藥而愈。他人病在腹心而責其不進手足之藥。乃以治腹心之劑爲非。可乎。稜嚴會中二十五行獨推觀音。豈可便優觀音而劣諸菩薩。神仙外道。於我法中皆爲邪見。然華嚴知識。或在外道。或爲人王。或爲姪女。引導眾生。若以正修行者爲是。則善財所參勝熱婆須蜜女。無厭足王等。皆可指爲非也。千經萬論止爲眾生除病。病去藥除。何須無病而自灸。此心垢重。故修淨因。淨垢若亡。復何修證。三界無住。何處求心。四大本空。佛依何住。衣中之寶。只爲衣纏。衣若壞亡。珠當自現。聊敘鄙見。以復來誨。或

別有可教者更垂一言幸甚。慎勿支離蔓衍以成戲論也。邇來四大輕安否。所苦不下食。今復差退否。某隨緣過日。只求無事耳。未間。千萬珍重。

陳提刑貴謙荅眞侍郎德秀書

嘗參月林鐵鞭諸大老

承下問禪門事。仰見虛懷樂善之意。顧淺陋何足以辱此。然敢不以管見陳白。所謂話頭合看與否。以某觀之初無定說。若能一念無生全體是佛。何處別有話頭。只緣多生習氣背覺合塵。剎那之間念念起滅。如猴獼拾栗相似。佛祖不得已權設方便。令咬嚼一箇無滋味話頭。意識有所不行。將蜜果換苦葫蘆。淘

汝業識都無實義。亦如國家兵器不得已而用之。今時學者卻於話頭上強生穿鑿。或至逐箇解說。以當事業。遠之遠矣。稜道者二十年坐破七箇蒲團。只管看驢事。未去馬事到來。因捲簾大悟。所謂八萬四千關捩子。只消一箇鎖匙開。豈在多言也。來教未誦佛之言。存佛之心。行佛之行。久久須有得處。如此行履。固不失爲一世之賢者。然禪門一著又須見徹自己本地風光。方爲究竟。此事雖人人本有。但爲客塵妄想所覆。若不痛加煅煉。終不明淨。圓覺經云。譬如銷金鑛。金非銷固有。雖復本來金。終以銷成就。蓋謂此

也。來教又謂道若不在言語文字上。諸佛諸祖何謂
畱許多經論在世。經是佛言。禪是佛心。初無違背。但
世人尋言逐句。沒溺教網。不知有自己一段光明大
事。故達磨西來不立文字。直指人心。見性成佛。謂之
教外別傳。非是教外別是一箇道理。只要明了此心
不著教相。今若只誦佛語而不會歸自己。如人數他
珍寶。自無半錢分。又如破布裏珍珠。出門還漏卻。縱
使於中得少滋味。猶是法愛之見。本分上事。所謂金
屑雖貴。落眼成翳。直須打併一切淨盡。方有少分相
應也。某向來雖不閱大藏經。然華嚴。楞嚴。圓覺。維摩。

等經誦之亦稍熟矣。其他如傳燈諸老語錄。壽禪師宗鏡錄。皆玩味數十年間。方在屋裏著到腳。無暇看經論也。棲伽雖是達磨心宗。亦以句讀難通。不曾深究。要知吾人皆是誠心。非彼世俗自瞞以資談柄而已。姑以日用驗之。雖無濁惡羶過。然於一切善惡逆順境界上。果能照破不爲他所移換否。夜睡中夢覺一如否。恐怖顛倒否。疾病而能作得主否。若目前猶有境在。則夢昧未免顛倒。夢昧旣顛倒。疾病必不能作得主宰。疾病旣作主宰不得。則生死岸頭必不自在。所謂如人飲水冷暖自知。待制舍人於功名鼎盛

之時。清修寡欲。畱神此道。可謂火中蓮華矣。古人有言。此大丈夫事。非將相之所能爲也。又云。直欲高高峰頂立。深深海底行。更欲深窮遠到。直到不疑之地。來教謂無下手處。只此無下手處。正是得力處。如前書所言。靜處鬧處皆著。一隻眼看。是甚麼道理。久久純熟。自無靜鬧之異。其或襍亂紛飛。起滅不停。卻舉一則公案。與之厮捱。則起滅之心自然頓息。照與照者。同時寂滅。卽是到家也。某亦學焉而未至也。姑盡吐露如此。不必他示。恐有儒釋不侔者。必大怪之。待制舍人他日。心眼開明。亦必大笑而罵之。

緇門警訓卷第七終

緇門警訓卷第八

慈受禪師訓童行

世諦紛紛沒了期。空門得入是便宜。直須日夜常精進。莫教勞勞空過時。

燒香禮拜莫匆匆。目覩心存對聖容。懺悔多生塵垢罪。願存法水洗心胸。

心猿易縱安教縱。意馬難調亦要調。到老情塵掃不盡。出家四事恐難消。

也要學書也念經。出家心地要分明。他年圓頂方袍日。事事臨時總現成。

一等出家爲弟子。事師如事在堂親。添香換水須勤謹。自有龍天鑑照人。

衣衫鞋襪須齊整。掛搭巾單不可無。身四威儀常具足。莫隨愚輩學麤疎。

廊下逢僧須問訊。門前遇客要相呼。出家體態宜謙讓。莫學愚人禮數無。

出家不斷葷和酒。枉在伽藍地上行。到老心田如未淨。菩提種子亦難生。

莫說他人短與長。說來說去自招殃。若能閉口深藏舌。便是安身第一方。

莫學愚人說脫空。脫空說得有何窮。暗中莫道無人見。只恐難瞞馬相公。

色身康健莫貪眠。作務辛勤要向前。不見碓坊盧行者。祖師衣鉢是渠傳。

二時普請宜先到。眾手能爲事不差。諷誦如來經一卷。勝如閑話口吧吧。

香積厨中好用心。五湖龍象在叢林。瞻星望月雖辛苦。須信因深果亦深。

常住分毫不可偷。日生萬倍恐難酬。猪頭驢腳分明現。佛地今生掃未休。

家事精麤宜愛惜。使時須把眼睛看。莫將恣意胡拋擲。用者須知成者難。

諸寮供過要精勤。掃地煎茶莫厭頻。事眾若能常謹切。身心方是出家人。

有時緣幹出街頭。照顧瀉山水牯牛。門外草深常管帶。等閑失卻恐難收。

拳手相交不可爲。麤豪非是出家兒。遭人唾面須揩卻。到底饒人不是癡。

三通浴鼓入堂時。觸淨須分上下衣。語笑高聲皆不可。莫將麤行破威儀。

出家言行要相應。戰戰常如履薄冰。雖是未除鬚與髮。直教去就便如僧。

勉僧看病

靈巖石刻

四海無家病比丘。孤燈獨照破牀頭。寂寥心在呻吟裏。粥藥須人仗道流。

病人易得生煩惱。健者長懷惻隱心。彼此夢身安可保。老僧書偈示叢林。

氣濕風勞猶可療。不知禪病若爲醫。衲僧更擬論方藥。便把拳頭驀口搥。

大慈慧師禮觀音文

清淨三業一心五體投地皈依。南無十方慈父廣大
靈感觀世音菩薩。我聞菩薩從聞思修入三摩地。得
二隨順。四不思議。十四無畏。十九說法。七難二求。三
十二應。無量功德。興大威力。發大誓願。同流九界。六
道四生。生死趣中。興百千萬億無量恆河沙劫數善
行方便。救度拔濟一切眾生。無有休息。我今哀求必
賜加被。伏念某甲宿生慶幸。生遇佛法。身雖出家。心
不染道。愚癡邪見。諸根昏塞。內外經書。雖於習學。章
句妙理。無所通曉。又恐福力淺薄。壽命不長。徒入空
門。虛生浪死。我今洗心泣血。稽顙投誠。終日竟夜存

想聖容。受持聖號。禮拜聖像。惟願菩薩天耳聞聲。悲心救苦。憐憫加被。放大神光照我身心。傾大甘露灌我頂門。蕩滌累世冤愆。洗潔千生罪業。身心清淨。魔障消除。晝夜之間。坐臥之中。觀見菩薩放大神光。開我慧性。使某卽時神通朗發。智慧聰明。一切經書自然記憶。一切義理自然通曉。得大辯才。得大智慧。得大壽命。得大安樂。參禪學道。無諸魔障。悟無生忍。世世生生。行菩薩道。四恩總報。三有齊資。法界眾生同圓種智。

◎天台智者大師觀心誦經法

夫欲念經滅罪。第一先須盥漱整威儀。別座跏趺而坐。第二入觀所坐之座高廣嚴好。次觀座下皆有天龍八部四眾圍繞聽法。次須運心作觀。觀我能爲法師傳佛正教。爲四眾說。想所出聲。非但此一席眾。乃至十方皆得聽受。名爲假觀。次觀能說之人所念之經。何者是經爲經卷。是爲紙墨。是爲標軸。是誦者爲當心念。是口念。是爲齟齬和合而出。爲有我身爲無我身。誰是念者。觀此四眾。爲是實有。爲後想生。四眾非有。推尋畢竟無有我。能念者是名空觀。雖無所念之經。而無經卷紙墨文字。雖無能念之人。而有我身。

爲四眾宣念。雖非內外不離內外。雖非經卷不離經卷。雖非心口不出心口。從始至終必無差謬。名不可思議。能作此解。能作此觀。名爲三觀。於一念得不前不後三觀宛然。雖無施者而有法施。雖無受者四眾宛然。雖無法座登座宣說。非一二三而一二三名爲法施。檀波羅蜜。專心執持無諸遮礙。名爲持戒。忍耐惡覺。名聞財利皆不能惱。名之爲忍。一心不息從始至終無有慚愧。名爲精進。專念此經無有愛味。名之爲禪。分別無謬。序正流通無不諦了。字句分明。名爲般若。是名六波羅蜜具足。自行此法。名之爲實。傳授

外人名之爲權。若從生至老一生已辦。以此成功德。於無始心名爲正。因種子。若有心觀名爲了。因高座。四眾說授。因緣名爲因緣。三因具足。若觀未明。但是性德。研之不已。觀心相應。名托聖胎。以胎業成就。名爲修德。中間四十二位。亦名性修。至於極果。名爲種智。伊字三點。不縱不橫。名大涅槃。名到彼岸。名第一義空。平等大慧。是名念經正觀。三世諸佛無不從此而生。信者可施。無問莫說。第三流通者。若自調自度。不名爲慈。見苦不救。不名爲悲。既修正觀現前。復應莊嚴法界。所念經竟。出觀之後。以此道觀功德。已登

正覺之者。願度眾生。入位之人。悉登上地。未入位者。卽運慈悲二法。願未來世成等正覺也。

觀心食法

旣敷座坐已。聽維那進止鳴磬後。斂手供養一體三寶。徧十方施作佛事。次出生飯。稱施六道。卽表六波羅蜜。然後受此食。夫食者。眾生之外命。若不入觀。卽潤生死。若能知入觀。分別生死有邊無邊。不問分衛與清眾淨食。皆須作觀。觀之者。自恐此身內舊食。皆是無明煩惱潤益生死。今之所食。皆是般若想。於舊食從毛孔次第而出。食旣出已。心路卽開。食今新食。

照諸闡滅。成於般若。故淨名云。於食等者。於法亦等。是爲明證。以此食故。成般若。食能養法身。法身得立。卽得解脫。是爲三德。照此食者。非新非故。而有舊食之故。而有新食之新。是名爲假。求故不得。求新不得。畢竟空寂。名之爲空。觀食者。自那可食。爲新。旣無新食。那可得食者。而不離舊食養身。而新食重益。因緣和合。不可前後分別。名之爲中。只中卽假空。只空卽中假。只假卽空中。不可思議。名爲中道。又淨名云。非有煩惱。非離煩惱。非入定意。非起定意。是名食法也。

大智律師三衣賦

吾有三衣。古聖眞規麤疎麻苴爲其體。獸毛蠶口害
命傷慈。青黑木蘭壞其色。五正五間涉俗生譏。其奉
持也如鳥兩翼。其敬護也如身薄皮。信是恆沙諸佛
之標幟。賢聖沙門之軌儀。九十六道起信之首。二十
五有植福之基。是以堅誓獸王忍死而頻加稱歎。蓮
花色女作戲而盡斷貪癡。宏誓甚重至德難思。龍披
免金翅之禍。人得息戰敵之危。末流浮薄正教衰遲。
競買亂朱之服。率遭濫吹之嗤。壯大於貢高我慢。欺
壓於碩德厖眉。習以成俗。愚不知非。汝當敬遵彝範。
仰荷恩慈。時時自慶。步步勿離。潛神樂國。今銖衣自

被垂形忍界。今報服常隨。劫石可銷。想斯言而不泯。
太空有盡。諒此志以難移。

鐵鉢賦

吾有鐵鉢。裁製合轍。斗半爲量。不大不小。竹烟熏治。
唯光唯潔。似二分之明珠。若將圓之皎月。清晨入聚。
羣心發越。黃梁傾散。有若金沙。白浙高堆。宛如積雪。
與香積之變現無殊。比自然之天供何別。咨爾同舟。
宜自隳括。不耕不耘。不鉏不割。有生之命。自何而活。
且夫口腹無厭。貪源叵竭。正念微乖。羅刹已奪。嗜一
時之甘美。爲萬劫之饑渴。萬金可受。保君未徹。杯水

難堪聖教明說。是宜五觀無違。三匙有節。慎勿枉彼信施。以養穢軀。會須藉此資緣。早求自脫。

坐具賦

吾有坐具。裁量有據。其色相則一類袈裟。其物體則兩重疎布。長四廣三。壞新櫟故。彼形之大者。可用開增。吾身之小兮。從初制度。好大惡小。但責他非。反制爲開焉。知自誤。嘗聞比丘身者。五分之塔也。尼師壇者。四分之基也。是則道者所資。豈宜身之爲護。安禪講法。敷之莫失。於威儀入聚遊方。持之勿離。於跬步不然。諸律有違。制刑科。一生無如法坐處。

漉囊賦

吾有漉囊製造有方。緻練作底。熟鐵爲匡。其用漉兮。深須諦視。其還放兮。切忌損傷。宜知我佛仁慈。尙不遺於微物。將使吾曹飲用得幸。免於餘殃。一化境中。上下皆制。半由旬內。往返須將。世多輕略。孰究否臧。或聞而不製。則嗤爲小道。或製而不用。但懸於草堂。斯由內無慈愍。外恣疎狂。塞來蒙之津徑。害吾教之紀綱。汝當存誠。持守竭力。恢張。豈止四生有賴。抑使三寶增光。

錫杖賦

吾有一錫。裁製有式。上下三停。聳榦六尺。十二環圓而無缺。示因緣乃死乃生。兩鉗開而復同。顯空有不離不卽。匪以扶羸。唯將丐食。執之兮居然寂寂。振之兮其鳴歷歷。直欲使諸有門開三途苦息。隨身所止。懸之屋壁。塵垢易生長。須拂拭。擲雲外兮不以爲難。解虎競兮未須勞力。幸哉凡愚。蹈夫聖跡。外露麤暴。內懷荊棘。用之舍之兮能無夕惕。

蹟禪師誠洗麵文

詳夫麪豈天然。麥非地涌。盡眾生之汗血。乃檀越之脂膏。本療形枯爲成道業。尋常受用尙恐難消。況於

盪洗精英唯餘筋滓。全資五味借美色香。巧製千端
擬形魚肉。致使鵝毛白雪之狀。逐水流離。常堂口分
之食三分去二。如斯枉費實謂無慚。昧稼穡之艱難。
滅龍神之祐護。設具輪王之福。猶須瓦解冰消。雖非
害命傷生。寧不招因帶果。大覺世尊一麻一麥。古來
高士果菜充饑。飲食之侈未除。解脫之期安在。但願
參禪得髓。何須洗麪求筋。縱消萬兩黃金。正好麤羹
淡飯。既免多求妨道。自然所向清高。雖云淡薄家風。
別是一般安樂。痛想圓通慈訓。真堪換骨洗腸。法雲圓通
禪師常戒學徒不得洗麪。深思舜老規繩。須是斬釘截鐵。雲居舜和尚制

常住及諸莊並不令洗麪。大眾同推道念。莫嫌供養蕭疎。假饒斫

下山僧頭。決定不洗常住麪。元符三年十一月一日住持宗蹟白。

洗心猶在半途中。洗麪何曾振古風。今日叢林思舜老。昔時宗匠憶圓通。

種麥辛勤磨麥難。莫將洗麪作盤飧。爲憐枉費情何似。恰與山僧肉一般。

任是豐年猶損福。假饒凶歲亦傷財。殷勤爲報諸禪者。緊把繩頭更不開。

正使有餘須愛惜。不應過分太無慚。閻羅老子眞難

解主稼龍神意未甘。

莫言此費不多爭。萬事皆從洗麪生。舜帝昔年爲漆器。百僚猶諫不須行。

麪裏有筋須有腳。忽然筋去腳難行。自家喫著情猶倦。過與他人意未平。

調和香味如眞肉。鬪釘肥鮮作假魚。畫佛旣然成道果。像生那得證無餘。

三冬洗處寒侵骨。九夏蒸時汗滿身。費水費油兼費火。勞人勞畜亦勞神。

道者疎食樂有餘。淨人還不費工夫。尋常普請供承

外。落得參禪誦佛書。

不學諸方五味禪。箇中消息更天然。成湯祝網從君意。呂望垂鉤信我緣。

三時普請歸禪室。一念無心過虎溪。鉢裏飯盛麤粟米。桶中羹是淡黃虀。

玉食尊官莫動情。隨堂齋飯太麤生。空門平等無高下。千聖從來一路行。

信心檀越事齋筵。莫以蕭疎意便闌。太抵精麤同一飽。細論功過卻多般。

效古修行利益深。新羅不是拘叢林。雖然冷淡無滋

味。聊表禪家一片心。

君親義重曾輕捨。水陸庖精尙遠離。今日此情猶未
息。低頭更念出家時。

摩盤拭案強逢迎。終愧禪林本分僧。出世道心隨日
減。順情人事逐年增。

叢林枯淡變柴林。日用蕭條古意深。不洗十方常住
麪。唯參六代祖師心。

莫以今人似古人。較量終是有疎親。當時建磨分皮
髓。後代兒孫洗麪筋。

疎齋易備長安樂。美食難消損道緣。多見水邊林下

客。一生無事亦長年。

已學壞衣爲乞士。忍誇精饌敵王公。有人解笑從他笑。甘豎降旗立下風。

不是憂貧不是慳。息繁飡道合如然。通心上士應相委。多口禪和莫亂傳。

乳薤葷羶損戒香。麤筋奢靡費常堂。如今一筆都勾下。轉覺空門氣味長。

洗麤終歸剋化難。因循多病障輕安。凡夫福德能多少。縱使滄溟也解乾。

本來面目甚分明。逐浪隨波太瘦生。應被叢林高士

笑。天真喪盡得浮名。

龍象高僧意不羣。撩天鼻孔氣凌雲。尙嫌禪悅珍羞味。爭肯嚙嚙愛麪筋。

山僧初未歷艱難。振領提綱似等閑。十五萬斤常住麪。已隨流水過人間。

雖然指馬事難明。同過同功未可憑。惜福此時因大眾。無慚當日是山僧。

招提枉費禍難量。見說泥犁歲月長。卻恐那時妨道業。不如今日且尋常。

叢林執事莫癡憨。苦果酌格因豈易擔。更擬諸方閻王

老不知辛苦爲誰甜。

僧家一飯且支身。惜福由來戒麪筋。大嚼屠門真可愧。十千沽酒又何人。

天生三武禍吾宗。釋子還家塔寺空。應是昔年崇奉日。不能清儉守真風。

山僧特地改家常。圖得吾門更久長。若向此時疎奉養。免教他日悞君王。

唐朝欲末事如麻。兵火屠燒萬萬家。當日太平思儉約。可能巢賊亂中華。

宴安風範日驕奢。須趁昇平剪禍芽。所以吾門增淡

薄。且圖天下息繁華。

攝伏龍天動鬼神。蓋因高行出凡倫。從教古淡無人愛。只此清修是化門。

隨家豐儉事難同。禪悅偏宜淡薄中。下口若知無味味。舉頭方見不空空。

受福人多惜福稀。得便宜是落便宜。雲門胡餅金牛飯。一飽心頭忘百饑。

百納袈裟五綴盂。一時寧復計精麤。沙門畢竟宜清苦。輒暝修行道業疎。

太平人物侈心開。受用殷繁養禍胎。慚愧未生癡福

盡。災荒水旱驀頭來。

太平生齒漸增加。美食鮮衣器用華。地力有窮財有限。此時宜儉不宜奢。

辨才淨法師心師銘

咄哉此身。爾生何爲。資之以食。覆之以衣。處身以室。病之以醫。百事將養。一時不虧。殊不知恩反生怨。違四大互惱。五臟相欺。此身無常。一息別離。此身不淨。九孔常垂。百千癰疽。一片薄皮。此身可惡。無貪惜之。當使此身依法修持。三種淨觀。十六思惟。一行不退。安養西歸。成無上智。是爲心師。

唐禪月大師座右銘并

序曰。愚常覽白太保所作續崔子玉座右銘一首。其詞旨乃典乃文。再懽再切。實可警策。未悟貽厥將來。次又見姚崇卞蘭張說李邕皆有斯文。尤爲奧妙。其於束勛婉婉。乃千古之鑒誠資腴矣。愚竊愛其文。唯恨世人不能行之。十得一二。一日因袖毫遂作續白氏之續命。曰續姚梁公座右銘一首。雖文經理緯非逮於羣公。而亦可書於屋壁。

善爲爾諸身。行爲爾性命。禍福必可轉。莫慙言前定。見人之得。如己之得。則美無不克。見人之失。如己之

失。是亨貞吉。返此之徒。天鬼必誅。福先禍始。好殺滅
紀。不得^①不止。守謙寡欲。善善惡惡。不得^②不作。無見貴
熱。諂走蹇蹇。無輕賤微。上下相依。古聖著書。矻矻孳
孳。忠孝信行。越食逾衣。生天地間。未或非假。身危彩
虹。景速奔馬。胡不自強。將昇玉堂。胡爲自墜。言虛行
僞。豔殃爾壽。須戒酒腐。爾腸須畏。勵志須至。撲滿必
破。非莫非於飭。非過莫過於文。過及物陰。功子孫必
封。無恃文學。是司奇薄。患隨不忍。害逐無足。一此一
彼。諧官合徵。親仁下問。立節求己。惡木之陰。匪陰盜
泉之水。非水。世孚草草。能生幾幾。直須如冰如玉。種

桃種李。嫉人之惡。酬恩報義。忽己之慢。成人之美。無
擔虛譽。無背至理。恬和慈暢。冲融終始。天人景行。盡
此而已。丁寧丁寧。戴髮含齒。禪月集

吉州龍濟山友雲鰲和尚蛇穢說

世間最毒者無甚於蛇虺。至穢者莫過乎便利。蓋蛇
虺之毒能害人之性命。便利之穢能穢人之衣服。所
以欲保其性命也。必遠於毒害。欲潔其形服也。必除
其穢惡。如世之人夢蛇虺。則欣其有財。夢便利。則悅
其獲利。何寤寐愛惡之不同哉。苟知惺有所忌。寤有
所懼。又何必見財斯喜。見利斯悅者乎。況財之毒尤

甚於蛇虺。利之穢更過乎便利。且古之人以財害乎性命者。不止於一。以利汙乎形服者。亦由其眾。而不悟者。愛之而不已。貪之而不止。是亦可悲也。且夫貧也富也。人之分定也。能安其分。雖貧亦樂。不安其分。縱富常憂。能知分之可安。貧之可樂。則性命可以保而生。形服可以潔而存。是知貪財者是養於蛇虺。好利者必汙乎形服。吾非好貧也。是遠毒害也。吾非惡富也。是除穢惡也。如有遠財如遠蛇虺。去利如去便利者。吾保此人漸可以爲達人矣。不然。生生之厚。貪愛無休。必將見傷其性命而汙其形服矣。世人其訓。

之。

大慧禪師荅孫知縣書

蒙以所修金剛經相示。幸得隨喜一徧。近世士大夫
肯如左右畱心內典者。實爲希有。不得意趣。則不能
如是信得及。不具看經眼。則不能窺測經中深妙之
義。眞火中蓮也。詳味久之。不能無疑耳。左右詆諸聖
師翻譯失真。而汨亂本眞。文句增減違背佛意。又云。
自始持誦。卽悟其非。欲求定本。是正舛差。而習僞已
久。雷同一律。暨得京師藏本。始有據依。復考繹天親
無著論頌。其義脗合。遂泮然無疑。又以長水孤山二

師皆依句而違義。不識左右。敢如是批判。則定嘗見
六朝所譯梵本。盡得諸師翻譯錯謬。方始泮然無疑。
旣無梵本。便以臆見刊削聖意。則且未論招因帶果。
毀謗聖教。墮無間獄。恐有識者見之。卻如左右檢點
諸師之過。還著於本人矣。古人有言。交淺而言深者。
招尤之道也。某與左右素昧平生。左右以此經求印
證。欲流布萬世。於眾生界中種佛種子。第一等好事。
而又以某爲箇中人。以箇中消息。相期於形器之外。
故不敢不上稟。昔清涼國師造華嚴疏。欲正譯師訛
舛。而不得梵本。但書之於經尾而已。如佛不思議法。

品中。所謂一切佛有無邊際身。色相清淨。普入諸趣。而無染著。清涼但云佛不思議法品上卷第三葉第十行。一切諸佛舊脫諸字。其於經本脫落。皆注之於經尾。清涼亦聖師也。非不能添入及減削。止敢書之於經尾者。識法者懼也。又經中有大琉璃寶。清涼曰。恐是吠瑠璃。舊本錯寫。亦不敢改。亦只如此。注之經尾耳。六朝翻譯諸師。非皆淺識之士。翻譯場有譯語者。有譯義者。有潤文者。有證梵語者。有正義者。有唐梵相校者。而左右尙以爲錯譯聖意。左右旣不得梵本。便妄加刊削。卻要後世人諦信。不亦難乎。如論長

水依句而違義。無梵本證。如何便決定以其爲非。此公雖是講人。與他講人不同。嘗參琅琊廣照祥師。因請益琅琊首楞嚴中富樓那問佛清淨本然云何忽生山河大地之義。琅琊遂抗聲云。清淨本然云何忽生山河大地。長水於言下大悟。後方披襟自稱座主。蓋座主多是尋行數墨。左右所謂依句而不依義。長水非無見識。亦非尋行數墨者。不以具足相故。得阿耨菩提。經文大段分明。此文至淺至近。自是左右求奇太過。要立異解。求人從己耳。左右引無著論云。以法身應見如來。非以相具足故。若爾如來雖不應以

相具足見。應相具足爲因。得阿耨菩提。爲離此著故。經言。須菩提。於意云何。如來可以相成就得阿耨菩提。須菩提。莫作是念等者。此義明相具足體非菩提。亦不以相具足爲因也。以相是色自性故。此論大段分明。自是左右錯見錯解爾。色是相緣起。相是法界緣起。梁昭明太子謂莫作是念。如來不以具足相故。得阿耨菩提。三十二分中。以此分爲無斷無滅分。恐須菩提不以具足相。則緣起滅矣。蓋須菩提初在母胎。卽知空寂。多不住緣起相。後引功德施菩薩論。末後若相成就是真實有。此相滅時卽名爲斷。何以故。

以生故有斷。又怕人不曾。又云。何以故。一切法是無
生性。所以遠離斷常二邊。遠離二邊是法界相。不說
性而言相。謂法界是性之緣起故也。相是法界緣起。
故不說性而言相。梁昭明所謂無斷無滅是也。此段
更分明。又是左右求奇太過。強生節目耳。若金剛經
可以刊削。則一大藏教凡有看者。各隨臆解。都可刊
削也。如韓退之指論語中畫字爲畫字。謂舊本差錯。
以退之之見識。便可改了。而只如此論在書中何也。
亦是識法者懼爾。圭峰密禪師造圓覺疏鈔。密於圓
覺有證悟處。方敢下筆。以圓覺經中一切眾生皆證

圓覺圭峰改證爲具。謂譯者之訛而不見梵本。亦只如此論在疏中不敢便改正經也。後來泐潭眞淨和尚撰皆證論。論內痛罵圭峰。謂之破凡夫臊臭漢。若一切眾生皆具圓覺而不證者。畜生永作畜生。餓鬼永作餓鬼。盡十方世界都盧是箇無孔鐵鎚。更無一人發眞歸元。凡夫亦不須求解脫。何以故。一切眾生皆已具圓覺。亦不須求證故。左右以京師藏經本爲是。遂以京本爲據。若京師藏本從外府州納入。如徑山兩藏經。皆是朝廷全盛時賜到。亦是外州府經生所寫。萬一有錯。又卻如何改正。左右若無人我。定以

妙喜之言爲至誠。不必泥在古今一大錯上。若執己見爲是。決欲改削。要一切人唾罵。一任刊板印行。妙喜也只得隨喜讚歎而已。公旣得得遣人以經來求印可。雖不相識。以法爲親故。不覺惻惻怛怛相觸忤。見公至誠。所以更不畱情。左右決欲窮教。乘造奧義。當尋一名行講師。一心一意與之參詳。教徹頭徹尾。一等是畱心教網也。若以無常迅速生死事大已事未明。當一心一意尋一本分作家。能破人生死窠窟者。與伊著死工夫厮捱。忽然打破漆桶。便是徹頭處也。若只是要資談柄。道我博極羣書。無不通達。禪我

也會。教我也會。又能檢點得前輩諸譯主講師不到處。逞我能我解。則三教聖人都可檢點。亦不必更求人印可。然後放行也。如何如何。

佛鑑懃和尚與佛果勤和尚書

時住夾山

惠懃啓上。昔奉祖峰老師左右。嘗聞其語。今時叢林學道之士。而聲名不揚。匪爲人之取信者。良由梵行不清白。爲人不諦當。輒欲苟異名聞利養。乃廣衒其華飾。遂爲有識者所譏。故蔽其要妙。爾輩他後忽風雲際會。出來爲人天師範者。切宜以此事自勉。某得聞此語。遂書諸紳銘於心。終身誦之。不敢忘。近有禪

客至此傳聞夾山禪師邇來爲兄弟請益雪竇其洪
機捷辨出沒淵奧頗異諸方自古今未有也某聞之
不覺灑涕自謂高蹈之士何至此矣老兄何不激揚
達磨未來時因緣誘接學者以報先聖之德無乃牽
蔓至此何太錯也此蓋老兄博覽古今所蘊之妙而
不憤今時邪黨異說有昧古人之意故奮發大用益
舒卑願開顯先德之機以破其蔽意在此然高明遠
識者有以見亮必無外也第恐晚進後昆疑其言句
尖新以爲佛法只如此矣遂坐守化城不能進至寶
所爲害非淺就此而言不唯有損宗教亦乃無益於

學者。某不懼罪責。敢以先師所授之言。以告於左右。倘能自勉。則幸莫大焉。苟或以此見棄於我者。亦不罪於左右也。不宣。

荅投子通和尚書

某啓上。比聞瓶錫赴緣。投子四方歸德。翕然欽承。無有間者。則其同風異慶。又可知也。伏承來書。以法屬見。呼良難當。克未審禪師得法果嗣何人。若汾陽的派臨濟正宗。何幸加焉。從上先祖各有密傳宗旨。以辨正邪。爲之驗人關。肘後印。三世諸佛。六代祖師。萬象森羅。有情無情。以海印三昧一印印定。普天匝地。

更無絲毫滲漏。自百丈大智禪師以下遞代相承。至於汾陽有三種獅子句。一超宗異目。二齊眉共躡。三影響音聞。若超宗異目。見過於師。方爲種草。若齊眉共躡。減師半德。不堪傳授。若影響不真。狐狼猥勢。異類何分。慈明傳之。遂云。掌上握乾坤。千差都一照。楊岐傳之。則以金剛圈栗棘蓬。以驗正邪。鍊圍山可透。金剛圈不可透。大海水可吞。栗棘蓬不可吞。若吞得一蓬。百千萬億蓬。吞之無礙。若透得一圈。百千萬億圈。透之無礙。自楊岐傳之。白雲端師翁。師翁傳之。五祖先師。先師傳之。於新戒。遞代相傳。若當勘辨邪正。

切須子細。恐濫宗乘。有悞後學。某自授先師印可。握柄太平。據令全提。明投暗合。高低一顧。萬類齊彰。邪正洞然。不敢草次。是以千差萬別。公案諸訛。不出金剛圈栗蓬蓬。一時撮盡。若能吞一蓬透一圈。則百千萬億蓬圈。悉皆無礙無疑。俟容披晤。欸曲勘同。倘若符合無差。卽幸甚矣。如或未然。不敢從命。謹此奉聞。伏希見察。不宣。

緇門警訓卷第八終

緇門警訓卷第九

隋高祖文皇帝敕文

皇帝敬問光宅寺智顗禪師。朕於佛教敬信情重。往者周武之時。毀壞佛法。發心立願。必許護持。及受命於天。仍卽興復。仰憑神力。法輪重轉。十方眾生俱獲利益。比以有陳虐亂殘暴。東南百姓勞役不勝其苦。故命將出師。爲民除害。吳越之地。今敕廊清。道俗又安。深稱朕意。朕尊崇正法。救濟蒼生。欲令福田永存。津梁無極。師旣已離世網。修已化人。必希獎進僧行。固守禁戒。使見者欽服。聞卽生善。方副大道之心。是

爲出家之業。若身從道服心。染俗塵。非直含生之類。
無所歸依。抑恐妙法之門。更來謗讟。宜相勸勵。以同
朕心。春日漸暄。道體如宜也。開皇十年正月十六日。
內史令安平公臣李德林。宣內史侍郎武安子臣李
元操。奉內史舍人裴矩行。

晉王受菩薩戒疏

使持節上柱國太尉公揚州總管諸軍事揚州刺史
晉王弟子楊廣。稽首奉請十方三世諸佛。本師釋迦
如來。當降此土補處彌勒。一切尊經無量法寶。初心
以上金剛以降諸尊。大權摩訶薩埵。辟支緣覺獨脫。

明悟。二十七賢聖他心道眼。乃至三有最頂。十八梵王。六欲天子。帝釋天主。四天大王。天仙龍神。飛騰隱顯。任持世界。作大利益。守塔衛法。防身護命。護淨戒。無量善神。咸願一念之頃。承佛神力。俱會道場。證明弟子誓願。攝受弟子功德。竊以識暗萌興。卽如來性。無明俯墜。本有未彰。理數斯歸。物極則反。欲顯當果。必積於因。是調御世雄。備厯生死。草木爲籌。不可勝計。恆沙集起。固難思議。深染塵勞。方能厭離。法王啓運。本化菩薩。譬如日出。先照高山。隨逗根宜。權爲方便。如彼眾流。咸宗大海。弟子基承。積善生在皇家庭。

訓早趨貽教夙漸。福理攸鍾。妙機須悟。恥崎嶇於小徑。希優遊於大乘。笑止息於化城。誓舟航於彼岸。但開士萬行。戒善爲先。菩薩十受。專持最上。諭造宮室。必因基趾。徒架虛空。終不成立。弗揆庸懵。抑又聞之。孔老釋門。咸資鎔鑄。不有軌儀。孰將安仰。誠復釋迦能仁。本爲和尚。文殊師利。冥作闍黎。而必藉人師顯傳。聖授自近之。遠感而遂通。薩陀波崙。罄髓於無竭。善財童子。忘身於法界。經有明文。敢爲臆說。深信佛語。聿遵明導。天台智顗。禪師佛法龍象。童眞出家。戒珠圓淨。年將耳順。定水淵澄。因靜發慧。安無礙辯。先

物後已謙挹盛風。名稱普聞。眾所知識。弟子所以虔誠遙注。命檝遠延。每畏緣差。值諸畱難。亦既至止。心路豁然。及披雲霧。只銷煩惱。謹以今開皇十一年十一月二十三日。總管金城設干僧蔬飯。敬屈禪師授菩薩戒。戒名爲孝。亦名制止。方便智度。歸親奉極。以此勝福。奉資至尊。皇后作大莊嚴。同如來慈。普諸佛愛。等視四生。猶如一子。弟子卽日種羅睺業。生生世世還生佛家。如日月燈明之八王子。如大通智勝十六沙彌。眷屬因緣法成等侶。俱出有流。到無爲地。平均六度。恬和四等。眾生無盡。度脫不窮。結僧邇於始。

心終大悲以赴難。博遠如法界究竟若虛空。具足成就皆滿願海。楊廣和南。王峴戒師衣物五十八事親書龍魚飛白諸篆四十餘字。

婺州左溪山朗禪師召永嘉大師山居書

自到靈溪泰然心意。高低峰頂振錫常遊。石室岩龕拂乎宴坐。青松碧沼明月自生。風掃白雲縱目千里。名花香果蜂鳥啣將。猿嘯長吟遠近皆聽。鋤頭當枕。細草爲羶。世上崢嶸競爭人我。心地未達方乃如斯。倘有寸陰願垂相訪。

永嘉達書

自別以來經今數載。遙心眷想時復成勞。忽奉來書。

適然無慮。不委信後道體如何。法味資神。故應清樂也。麤得延時。欽詠德音。非言可述。承懷節操。獨處幽棲。泯跡人間。潛形山谷。親朋絕往。鳥獸時遊。竟夜綿綿。終朝寂寂。視聽都息。心累闐然。獨宿孤峰。端居樹下。息繁飡道。誠合如之。然而正道寂寥。雖有修而難會。邪徒喧擾。乃無習而易親。若非解契。玄宗行符真趣者。則未可幽居抱拙。自謂一生歟。應當博問先知。伏膺誠懇。執掌屈膝。整意端容。曉夜忘疲。始終虔仰。折挫身口。蠲矜怠慢。不顧形骸。專精至道者。可謂澄神方寸歟。夫欲採妙探玄。實非容易。決擇之次。如履

輕冰。必須側耳目而奉玄音。肅情塵而賞幽致。忘言
宴旨。濯累飡微。夕惕朝詢。不濫絲髮。如是則乃可潛
形山谷。寂累絕羣哉。其或心徑未通。矚物成壅。而欲
避喧求靜者。盡世未有其方。況乎鬱鬱長林。峩峩聳
峭。鳥獸鳴咽。松竹森稍。水石崢嶸。風枝蕭索。藤蘿縈
絆。雲霧氤氲。節物衰榮。晨昏眩晃。斯之種類。豈非喧
襍耶。故知見惑尙紆。觸途成滯耳。是以先須識道。後
乃居山。若未識道而先居山者。但見其山。必忘其道。
若未居山而先識道者。但見其道。必忘其山。忘山則
道性怡神。忘道則山形眩目。是以見道忘山者。人間

亦寂也。見山忘道者。山中乃喧也。必能了陰無我。無我誰住人間。若知陰入如空。空聚何殊山谷。如其三毒未祛。六塵尙擾。身心自相矛盾。何關入山之喧寂耶。且夫道性冲虛。萬物本非其累。眞慈平等。聲色何非道乎。特因見倒惑生。遂成輪轉耳。若能了境。非有觸目無非道場。知了本無。所以不緣而照。圓融法界。解惑何殊。以含靈而辨悲。卽想念而明智。智生則法應圓照。離境何以觀悲。悲智理合。通收乖生。何以能度。度盡生而悲大。照窮境以智圓。智圓則喧寂同觀。悲大則怨親普救。如是則何假長居山谷。隨處任緣。

哉。況乎法法虛融。心心寂滅。本自非有。誰強言無。何喧擾之可喧。何寂靜之可寂。若知物我冥一。彼此無非道場。復可徇喧襍於人間。散寂寞於山谷。是以釋動求靜者。憎枷愛杻也。離怨求親者。厭檻欣籠也。若能慕寂於喧。市鄽無非宴坐。微違納順。怨債由來善友矣。如是則劫奪毀辱。何曾非我本師。叫喚喧煩。無非寂滅。故知妙道無形。萬像不乖其致。眞如寂滅。眾響靡異其源。迷之則見倒惑生。悟之則違順無地。聞寂非有緣會而能生。我疑非無緣散而能滅。滅旣非滅。以何滅滅。生旣非生。以何生生。生滅旣虛。實相常。

住矣。是以定水滔滔。何念塵而不洗。智燈了了。何惑霧而不祛。乖之則六趣循環。會之則三途迥出。如是則何不乘慧舟而遊法海。而欲駕折軸於山谷者哉。故知物類紘紘其性自一。靈源寂寂不照而知。實相天真靈智非造。人迷謂之失。人悟謂之得。得失在於人。何關動靜者乎。譬夫未解乘舟而欲怨其水曲者哉。若能妙識玄宗。虛心冥契。動靜常矩。語默恆規。寂爾有歸。恬然無間。如是則乃可逍遙山谷。放曠郊鄴。遊逸形儀。寂怕心腑。恬淡息於內。蕭散揚於外。其身兮若拘。其心兮若泰。現形容於寰宇。潛幽靈於法界。

如是則應機有感。適然無準矣。因信略此餘更何由。
若非志朋。安敢輕觸。宴寂之暇。時暫思量。予必誑言。
無當看竟。迴充紙燼耳。不宣。同友玄覺和尚。

天台圓法師懺悔文

我念自從無始劫。失圓明性。作塵勞。出生入死。受輪
迴。異狀殊形。遭苦楚。夙資少善。生人道。獲遇遺風。得
出家。披緇削髮。類沙門。毀戒破齋。多過患。壞生害物。
無慈念。啗肉食。臙養穢軀。眾人財食。恣侵瞞。三寶資
緣。多互用。邪命惡求。無厭足。耽淫嗜酒。愈荒迷。慢佛
輕僧。謗大乘。背義孤親。毀師長。文過飾非。揚己德。幸

裁樂禍掩他能。虛誑欺誣競利名。鬪構是非爭人我。
惡念邪思無暫息。輕浮掉散未嘗停。追攀人事愈精
專。持誦佛經唯困苦。外現威儀增諂詐。內懷我慢更
踈狂。懶墮熏修恣睡眠。慳嫉貪婪無愧恥。野田穢本
將何用。大海浮屍不久停。既無一善可資身。必墮三
塗嬰眾苦。仰願本師無量壽。觀音勢至聖賢僧。同軫
威光俯照臨。共賜冥加咸救拔。無始今身諸罪障。六
根三業眾愆尤。一念圓觀罪性空。等同法界咸清淨。
發願文

願我盡生無別念。阿彌陀佛獨相隨。心心常繫玉毫

光念念不移。金色相。我如再食眾生肉。飲酒行淫作重非。現身生陷大阿鼻。萬劫洋銅吞熱鐵。願我臨終無疾苦。預知時至不昏迷。善根慧念轉增明。業債冤魔咸寂滅。異香天樂盈空至。寶殿金臺應念來。親覩如來無量光。一切聖賢同接引。彈指已登安樂國。卽聞妙法悟無生。遊歷無邊佛土中。供養親承蒙授記。分身徧至河沙界。歷微塵劫度眾生。誓入娑婆五濁中。普化羣迷成正覺。眾生業盡虛空盡。我願終當不動移。乃至今身及未來。念念圓修無間斷。仍將三業修行善。迴施虛空法界中。四恩三有眾冤親。同脫苦

輪生淨土。

荆溪大師誦經普回向文

一句染神咸資彼岸。思惟修習永用舟航。隨喜見聞
恆爲主伴。若取若捨經耳成緣。或順或違終因斯脫
願解脫之日依報正報常宣妙經。一剎一塵無非利
物。唯願諸佛冥熏加被。一切菩薩密借威靈。在在未
說皆爲勸請。凡有說處親承供養。一句一偈增進菩
提。一色一香永無退轉。

芭蕉泉禪師示眾

雲水之人不暫休。問君著甚苦來由。異鄉彼此皆爲

客無事相干。且縮頭。行與住坐與臥。兩片唇皮只管播。是是非非誰箇無。也須檢點自家過。出家兒著便宜。袈裟不是等閑披。桑田不耕親不養。不修道業更何爲。閻老子不撻擺。據你所作因。還你所作果。涅槃堂裏叫阿爺。要行不得行。要坐不得坐。正與麼時。是你是我。

龍門佛眼禪師十可行十頌并序

華嚴以十法界總攝多門。示無盡之理。禪門有十玄談。以明唱道。洞山有十不歸。以表超證。山僧述十可行。以示後生。庶資助道。譬諸蓬生麻中。不扶而直。又

如染香之人亦有香氣。有少益者。書之於后。

宴坐

清虛之理。竟無身。一念歸根。萬法平。物我頓忘。全體露。箇中殊不記。功程。

入室

問道趨師。印自心。入門端的。訪知音。此生不踏曹溪路。到老將何越古今。

普請

拈柴擇菜。師先匠進業。修身見古人。若到諸方須審實。龍門此法是通津。

粥飯

三下板鳴生死斷。十聲佛唱古今通。開單展鉢親明取。不可麤心昧苦空。

掃地

田地生塵便掃除。房廊瀟灑共安居。裝香掃地無餘事。默耀韜光示智珠。

洗衣

臨流洗浣莫疎慵。入眾衣裳垢不中。上下鄰肩薰炙久。身心動念肯消鎔。

經行

石上林間鳥道平。齋餘無事略經行。歸來試問同心侶。今日如何作麼生。

誦經

夜靜更深自誦經。意中無惱睡魔惺。雖然暗室無人見。自有龍天側耳聽。

禮拜

禮佛爲除憍慢垢。由來身業獲清涼。玄沙有語堪歸敬。是汝非他事理長。

道話

相逢話道莫虛頭。大語高聲笑上流。言下若能窮本

末肯將無義結朋儔。

示禪人心要

近世多以問荅爲禪家家風。不明古人事。一向逐末不反。可怪可怪。昔人因迷而問。故問處求證入。得一言半句。將爲事究明。令徹去。不似如今人胡亂問。趁口荅。取笑達者。

誠問話

近代問話多招譏謗。蓋緣不知伸問致疑。咨請之意。後生相承。多用祝贊順時語。並非宗乘中建立。如古人問。若爲得出三界去。又問聲色如何透得。又問此

間宗乘和尚如何言論。並是出眾當場決擇。近時兄弟進十轉五轉沒巴鼻語。或奉在座官員或莊嚴修設檀信。俱不是衲僧家氣味。又抽身出眾便道數句。或時云某甲則不恁麼道。又云和尚何不道云云。夫問話者。激揚玄極也不在多進語。三兩轉而已。貴得生人信。不至流蕩取笑俗子也。

大隋神照真禪師上堂

師云。老僧不爲名利來此。須要得箇人。不可青山白雲中趁爾是非。將來之世捨一報身後草也無喫。多少金毛師子。問著便作驢鳴馬喊。諸人者似老僧行。

腳時。到於諸方多是一千。少是七百五百眾。或在其中。經冬過夏。未省時中空過。向瀉山會裏做飯七年。於洞山會中做柴頭三年。重處卽便先去。只是了得自己時中。干他人什麼事。如諸佛菩薩盡是勤苦。不計劫數。捨金輪王寶位。及頭目髓腦所愛之物。國城妻子不可算數。所以始得名爲佛。似諸闍黎還曾捨得箇什麼。作得箇什麼勤苦。便道我會出世間法。世間法尙不會。些些子境界現前。便自張眉努目消容不得。說什麼解脫法。長連牀上坐不搖十指。喫他信施了。合眼合口。便道我修行修道感果。如是合消得。

只是謾自己。如百丈和尚置於堂宇。只要辦事底人。諸闍梨還辦得箇什麼事。其中有不動身手。日消得萬兩黃金。若是消得者。豈可如此見解。不可從母腹中來如是邪。但會得世間法。是則名爲出世間法。世間法尙乃不會。豈況佛法。只如一大藏教。盡是金口所宣。如來祕密。汝口裏念將來。總成魔語。豈得了。爲什麼不了。若了時。達磨不從西來也。只如達磨未來此土時。還有佛法也無。又爭得道無。譬如人有一寶。墜在淤泥中。勤苦累劫。尋求不得。或有一人善知寶所。直從泥中指出此寶。以示失寶之人。失寶之人一

見便識是我本物。了無得失。達磨西來亦復如是。不可只是老僧是善知識邪。遍地眾生總是善知識。只是見覺未明。不可道伊無也。若言有時諸人肯禮蠢蠢之徒作佛麼。譬如明珠墮在泥中。未遇其人豈有出期。有此眾生比如無情。還同頑物。既在三衣之下。直須親近知識。早是幾生修來始得。如此不可卻入輪迴六趣去也。若是得自在底人。論箇什麼。鑊湯鑪炭。刀山劍樹。四生六道。於中如喫美食。若未得如是。便實受此報。一失人身。再求欲似如今者。萬中無一。莫未得謂得。未證謂證。未聞謂聞。自謾自誑。失卻光

陰虛延日月。展轉只是無明。檐重乍可爲俗隨所任。運遣過時日。卻乃無業。如今作沙門。每日有業。有什麼業。踏底是國王地。著底是檀信衣。喫底是檀信食。骨肉是父母之體。若也不了。將何酬荅。所以言有業。只如老僧。不可了底人。捨此一報身。隨業而行。誰言定得。除佛與佛。乃能知之。時有僧問。不假言句。如何得知。師云。假言句。尙乃不知。僧無語。禮拜。

上堂

夫沙門釋子。見有如無。始得向一切時中。與凡聖等。與解脫等。方有少許出處。若不如此。大難大難。珍重。

雲峰悅和尚室中舉古

舉古者道。鬚髮著袈裟。宜應行聖道。自餘閑禩事。俱爲生死因。師云。汝等諸人。橫擔拄杖。撥草瞻風。遶天下行腳。且道。還曾踏著田地也。無僧無對。師云。虛生浪死漢。

金陵保寧勇禪師示眾

身上之衣。不容易披鉢中之食。莫等閑喫。等閑喫。往往難銷水一滴。容易披。究竟出家何所爲。直心實行。能綱紀。一顆圓光無表裏。莫學尋常輕薄流。平生涉獵。誇唇嘴。恣貪瞋。沒慚愧。善惡昭然難彈避。三途六

道正茫茫。也好回頭自瞥地。

古德渴熱行

金烏震怒兮。爍爍如飛。火雲發炎兮。騰騰若炊。江湖
競熬煮草木。半黃萎。眞金銷爍兮。大石欲裂。猛虎喘
息兮。蛟龍唾垂。門有蓬華兮。屋無片瓦。寢無帳席兮。
哭有多兒。耘苗匪倦。辱水忘疲。顏容抹漆黑。背脊圻
龜皮。咨爾釋氏。宜以審之。不耕而食。不蠶而衣。屋有
畫堂虛室。浴有清流曲池。帳垂翡翠簾。展瑠璃。閑尋
泉石兮。恣行恣坐。靜對風月兮。自歌自怡。回頭一顧
人間事。飲水須知可度時。無更恨風伯。休顛瞋雨師。

覺範洪禪師送僧乞食序

曹溪六祖初以居士服至黃梅。夜舂以石墜腰。牛頭
眾乏糧。融乞於丹陽。自負米斛八斗。行八十里。朝去
暮歸。率以爲常。隆化惠滿所至。破柴制履。百丈涅槃
開田說義。墜腰石尙畱東山。破柴斧猶存鄴鎮。江陵
之西有負米莊。車輪之下有大義石。衲子每以爲游
觀。不可誣也。世遠道喪而妄庸寒乞之徒。入我法中
其識尙不足以匡欲。其可荷大法也。方疊花制鞵以
副絲絢。其可夜舂乎。纖羅翦袍以宜小袖。其可破柴
乎。升九仞之峻。僕夫汗血不肯出輿。其可負米乎。方

大書其門云。當寺今止挂搭。其肯開田說義乎。余嘗痛心撫膺而歎者也。屢因宏法致禍。卒爲廢人。方幸生還。逃遁山谷。而衲子猶以其嘗親事雲庵。故來相從。余畜之無義。拒之不可。卽閉關堅臥。有扣其門而言者曰。雲庵法施如智覺。愛眾如雪峰。出其門者。今皆不然。道未尊而欲人之貴己。名不耀而畏人挨己。下視禪者如百世之冤。諂事權貴如累劫之親。師皆笑蹈此污而去。庶幾雲庵爪牙矣。於是蹶然而起曰。然則無食柰何。曰。當從淨檀行乞。亦如來大師之遺則也。老人肯出。則庶使叢林知雲庵典刑尙存。余嘉

其言。因序古德事。以慰其意。當有賞音者耳。

爲僧不預於十科事。佛徒消於百載。高僧傳

譯經

變梵爲華。通凡入聖。法輪所轉。諸佛所師。

義解

尋文見義。得意忘言。三慧克全。二依常轉。

習禪

修至無念。善惡都亡。亡其所亡。常住安樂。

明律

嚴而少恩。正而急護。嬰守三業。同彼金湯。

護法

家有良吏。守藏何虞。法有明師。外禦其侮。

感通

逆於常理。感而遂通。化於世間。觀之難測。

遺身

難捨易捐。施中第一。以穢濁體。迴金剛身。

讀誦

十種法師。此爲高大。洙枸椽花。果時穰赤。

興福

爲己爲他。福生罪滅。有爲之善。其利博哉。

襍科

統攝諸科。同歸高尙。唱導之匠。光輝佛乘。

或庵體禪師上堂

衲僧行李。豈尋常。出匣吹毛。不隱藏。奪食驅耕。全正令。東西無復鬼分贓。

示眾

暗撒驪珠。成瓦礫。閑傾鴆毒。是醍醐。冤將恩報。滅胡種。舉眼無親真丈夫。

著腳孤危。草不生。勿棲泊處。等閑行。臨風闊卻。噓空口。斷送渾家入火坑。

絕學無爲暗號通。先天後地活虛空。縱橫漏泄祖師意。爭得渾家不點胸。

摺破孃生帖肉衫。袒肩赤膊不羞慚。胡來漢見非難易。大事教誰更荷擔。

生獐別是一般村。品藻先賢簿後昆。掉放孤峰爭合煞。棒頭有眼蓋乾坤。

清平世界罷干戈。無奈兒曹藉甚何。急水灘頭拋直釣。錦鱗不遇枉多羅。

男兒腳底透長安。得坐披衣肯自謾。三尺冷光輝夜月。一條秋水迸人寒。

瞎驢種草不消憑。舊閣重關唾手贏。湖海晏清還獨步。功歸寸刃血長鯨。

判身捨命討冤讎。熱血相噴肯便休。反倒大家無寸土。空雙手去占雲頭。

全提大用鳥投網。絕照忘機龜負圖。入此門來都不。是如何陞降老臊胡。

已躬日用露全真。選甚行雲與谷神。合掌低頭叉手處。麤言細語在當人。

離相離名無實法。非心非佛若爲猜。了知極則難分付。不覺和聲送出來。

支郎入作葛藤多。捏定咽喉不奈何。轉得身來添氣急。可憐鷄子過新羅。

小參

赤骨力窮擔片板。顛癡教癩豎雙眉。驀生做處難名狀。佛祖當頭聽指揮。

結座

一拳也是打爺來。未有輸贏莫放開。割捨拍盲窮性命。觜喙鼻塌見全材。

眞淨文禪師頌

鬚髮因驚雪滿刀。方知歲月不相饒。逃生脫死勤成

佛莫待明朝與後朝。

靈芝照律師頌

聽教參禪逐外尋。未嘗回首一沉吟。眼光欲落前程暗。始覺平生錯用心。

古德垂誠

地獄之中未是苦。袈裟之下苦無聞。死生大事還知否。莫向青山臥白雲。

勉看經

檀那經卷早宜看。施利雖虧我不安。奉勸僧尼勤讀誦。鐵窗莫待電光寒。

勉應緣

出家事業總荒唐。贏得身心蟻子忙。簿上轉經多積欠。眼前業障自身當。門徒施利魚鰓水。買得油鹽雪見湯。年去年來何了日。不知將底見閻王。

勉住持

深嗟末法實悲傷。佛法無人爲主張。未解讀文先坐講。不曾行腳便陞堂。將錢討院如狂狗。空腹高心似啞羊。奉勸後賢休繼此。免教地獄苦時長。

洞山和尚自誠

不求名利不求榮。只麼隨緣度此身。三寸氣消誰是

主百年身後謾虛名。衣裳破處重重補。糧食無時旋
旋營。一箇幻軀能幾日。爲他閑事長無明。

雪峰存禪師入閩

光陰倏忽暫須臾。浮世那能得久居。出嶺年登三十
二。入閩早已四旬餘。他非不用頻頻舉。已過當須漸
漸除。爲報滿朝朱紫道。閻王不怕佩金魚。

宏智禪師示眾

蒿里新墳盡少年。修行莫待鬢毛斑。死生事大宜須
覺。地獄時長豈等閑。道業未成何所賴。人身一失幾
時還。前程黑暗路頭險。十二時中自著奸。

省病僧

訪舊論懷實可傷。經年獨臥涅槃堂。門無過客窗無紙。爐有寒灰蓆有霜。病後始知身自苦。健時多爲別人忙。老僧自有安閑法。八苦交煎總不妨。

大慧和尚示徒

出家立志切須勤。也要時時近好人。蹭蹬莫隨愚伴侶。蹉跎又恐落風塵。無良小輩頻頻脫。得義高流數數親。若也依吾如是誠。佛家梁棟亦堪陳。

龐居士頌

但自無心於萬物。何妨萬物常圍繞。鍊牛不怕師子

吼。恰似木人見花鳥。木人本體自無情。花鳥逢人亦不驚。心境如如只遮是。何慮菩提道不成。

自保銘姑蘇無作譔

夫求名者不以德而求之。謂之惡名。求利者不以道而求之。謂之惡利。惡名爲智人之所嫌。惡利有來業之所畏。上德不德。老氏誠言。四邪五邪。釋門切忌。寧以實而失。不以得而僞。小人趨惡名之名。君子存大利之利。福劣財強。財必爲殃。德薄任大。任速成害。古人者只要心達。不要身達。他賢莫揜我賢。莫伐若如是。則知其命合其道。終一身而自保。

上竺佛光照法師示小師正吾

常住吳之北
禪號東屏

爲人難爲人師不易。難者何。曰天資。曰學問。曰識見。曰氣象。無天資無學問無識見無氣象。若是而能爲人者。未之有也。有天資而後有學問。有學問而後有識見。有識見而後有氣象。若是能爲人。未也是何也。天資不高學問不博。識見不明氣象不雅。猶之不能也。不高則庸不博則窒。不明則回不雅則野。高而智博而達明而正雅而文。四者備能爲人矣。而欲爲人師者。未之可也。曷爲不易。曰宗旨。曰教義。曰法相。不得乎宗旨。不通乎法相。不辨乎教義。猶之不可也。能

提宗旨矣。能析教義矣。能解法相矣。不有師承。不明境觀。而能與人爲師者。未之有也。師承正境觀明。而不超悟洞徹佛意者。猶之不能也。亦旣超悟洞徹矣。不能忘境觀絕知見離法愛。爲大導師者。未之有也。三者具矣。而不知進退得失者。猶之不可。故曰。爲人難。爲人師不易。

圭峰禪師示學徒委曲

一從別後相憶是常。未審朝暮用心在何境界。得背塵合覺否。外境內心覺了。不相關否。定慧輕安適悅否。修行若忘失菩提心。知之總是魔業否。數數覺察。

勤勤觀照。習氣若起。當處卽休。輒莫隨之。亦莫滅之。何以故。陽燄之水。不應趁故。不應滅故。不應趁故。免落凡夫縱情。不應滅故。免墮二乘調伏。圓宗頓教。畢竟如斯。但與本性相應。覺智自然無間。長時之事。難可具書。略標大分。自須努力。不多述也。

登廁規式

登廁之法律制委明。蓋欲潔嚴身器。親近

聖賢。洗淨洗手。各有軌度。倘未盡諳。則反污其手。禮誦燒香。合掌執捉。動輒得咎。可不慎歟。今將古規。稍加增削。然其細行。固難備舉。大抵種種動用之際。皆

有方便護人意根處。自當觸類而長之。書不云乎不
矜細行終累大德。況出家者流。幸冀高明勸諸後進。
○經云。若登廁不洗淨者。不得入大僧數。不得坐禪
牀。不得登寶殿。○須知淨桶內淨外觸。不可將淨桶
入水槽中。澆水須將杓盛水入桶中。免污一槽之水。
○不可安淨桶在水槽上。淋其桶底觸水下槽中。○
不得將觸處筦帚近水槽邊。恐不知者誤將洗盆。○
槽中之水須頻換新者。蓋水畱三宿只生細虫。夏月
則不至三宿。切莫停積死水。若無淨頭之處。仰宣力
者。結緣措置免傷物命。○初入廁時先須彈指三下。

以警在穢之鬼。亦不可痰吐入廁中。以傷在穢之鬼。此二項陰德具載藏經。茲不繁引。○初蹲身時先須傾少水在槽中。一則解舊糞臭氣。則新糞易下。不積槽中。○既在廁中。不可語言作聲。○文殊經云。大小便時。身口狀如木石。不得有聲。○廁中不可畫壁書字。每見尊宿老成。路逢字紙在地。卽收置淨處。或拋在水中。蓋尊重字畫。不忍狼藉。況書臭廁中。豈不折福。○若洗淨時。右手執淨桶。旋旋傾之。以左手盛水。將第四指著寶洗之七度。切不可就桶中掬水汚於桶內。○常去左手第四指爪甲。莫令藏垢。釋氏要覽

云。佛令比丘指甲止長一麥粒許。過則翦之。今有出家人愛護指爪。養長寸餘。以爲美觀。尙縱穢軀。應無淨行。○常見惜福人。用厠籌畢。就淨桶洗之。反汚桶內。或將手入桶掬水。洗籌亦不可。○洗淨須用冷水。則益人用熱湯。則生腸風等疾。○若洗手時。先用灰擦七度去穢。手背亦然。次用泥擦七度淨之。手背亦然。次用皂團。或皂角。或木屑。或二桑葉皆可。○溪堂襍錄云。元祐中有蜀僧智超法師。常誦華嚴經。已三十年。偶見一童子。風貌清爽。舉手高揖。超曰。何來。曰。五臺來。超曰。何遠至此。曰。有少事欲相導。故。超曰。願

聞曰吾師誦經固可嘉矣。但失在登廁洗淨時。觸水淋其手背。而未嘗用灰泥洗之。所用灰泥律制七度。今但二三。緣此觸尚存。禮佛誦經悉皆得罪。言訖不見。超慚而改過。識者或曰。此必文殊化現有警於超也。故知洗手必須依法。因果經云。觸手請經當獲廁中蟲報。後架手巾須多備三兩條。頻頻洗換。莫令垢染以污淨手。人眾處五日一洗。人少處十日一洗。○凡拭手時。須將手巾搏而拭之。庶得易乾。○入廁洗淨等。經中各有神呪。必須受持。經云。若不持誦此諸神呪者。縱用七恆河水洗至金剛際。亦不得身器。

清淨。受持此呪者。當一一默誦七遍。則獲一切清淨福德。諸惡鬼神悉皆拱手。

入廁 唵狼魯陀耶莎訶。

洗淨 唵賀曩密栗帝莎訶。

洗手 唵主迦羅野莎訶。

去穢 唵室利曳婆醯莎訶。

淨身 唵跋折羅惱迦吒莎訶。

大智律師入廁垂訓

摺疊衣裳整齊鞋履。省約用籌。點滴使水。屏息語言。安詳進止。當念此身滿中盛屎。臭不可聞。穢不可視。

行廁革囊誠爲可鄙。云何於身耽欲無恥。云何於食
樂著肥美。結習成因果報必是。一入泥犁窮劫不已。
苦樂在心昇沈由己。道豈遠哉。未之思爾。

緇門警訓卷第九終

緇門警訓卷第十

讚佛傳法偈

稽首千百億化身釋迦牟尼佛。三祇修鍊萬行功圓。
纖瑕去而法性凝清。片善具而報化微妙。爾後上生
兜率下降王宮。三十歲居道樹成佛。四十九年住世
教化說法三百五十度。宣演八萬四千門。
王臣外護於四海九州。師僧內傳於人間天上。利益
廣大傳法難思。故有偈云。

假使頂戴經塵劫

身爲牀坐遍三千

若不傳法度眾生

畢竟無能報恩者。

傳法有五 一受持 二看讀 三諷誦 四解說

五書寫 外護內護流傳卽佛法僧寶不斷也。

禪林妙記前序 京師西明寺釋玄則撰

一切諸佛皆有三身。一者法身。謂圓心所證。二者報身。謂萬善所感。三者化身。謂隨緣所現。今釋迦牟尼佛者。法身久證。報身久成。今之出現。蓋化身耳。謂於過去釋迦佛所發菩提心。願同其號。故今成佛亦號釋迦。三無數劫修菩薩行。一一劫中事無量佛。中間續遇錠光如來。以髮布泥金華奉上。尋蒙授記得無生忍。然一切佛將成佛時。必經百劫修相好業。其釋

迦發心在彌勒後。當以逢遇弗沙如來。七日翹仰新
新偈讚。遂超九劫在前成道。將欲成時。生兜率天。號
普明菩薩。盡彼天壽。下閻浮提。現乘白象入母右脇。
其母摩耶夢懷白象。梵仙占曰。若夢日月當生國王。
若夢白象必生聖子。母從此後調靜安泰。慈辯日異。
菩薩初生。大地震動。身紫金色。三十二相。八十種好。
圓光一尋。生已四方各行七步。爲降魔梵發誠實語。
天上天下唯我獨尊。抱入天祠。天像悉起。阿私陀仙
合掌嘆曰。相好明了。必爲法王。自恨當死。不得見佛。
斯則淨飯國王之太子也。字悉達多。祖號師子。頰父

名淨飯。母曰摩耶。代代爲輪王。姓瞿曇氏。復因能事
別姓釋迦。朗悟自然。藝術天備。雖居五欲。不受欲塵。
遊國四門。見老病死。及一沙門。還入宮中。深生厭離。
忽於夜半天。神扶警。遂騰寶馬。踰城出家。苦行六年。
知其非道。便依正觀。以取菩提。時有牧牛女人。煮乳
作糜。其沸高踊。牧牛驚異。以奉菩薩。菩薩食之。氣力
充實。入河洗浴。將登岸時。樹自低枝。引菩薩上。菩薩
從此受吉祥草。坐菩提樹。惡魔見已。生瞋惱心。云此
人者。欲空我界。卽率官屬十八億萬。持諸苦具來怖
菩薩。促令急起。受五欲樂。又遣妙意天女三人來惑。

菩薩爾時入勝意慈定。生憐愍心。魔軍自然墮落退散。三妙天女化爲癯鬼。降魔軍已。於二月八日。明相出時。而成正覺。旣成佛已。觀衆生根。知其樂小。未堪大法。卽趣波羅柰國。度憍陳如等五人。轉四諦法輪。此則三寶出現之始也。其後說法度人之數。大集菩薩之會。甚深無相之談。神通示現之力。經文具之矣。又於一時。昇忉利天。九旬安居。爲母說法。時優闐國王及波斯匿王。思慕佛德。刻檀畫氎。以寫佛形。於後佛從忉利天下。其所造像。皆起避席。佛摩其頂曰。汝於未來。善爲佛事。佛像之興。始於此矣。化緣將畢。時

徒厭怠。佛便告眾。卻後三月。吾當涅槃。復記後事。如經具說。然如來實身。常在不滅。故法華云。常在靈鷲山。及餘諸住處。今生滅者。是佛化身。爲欲吸引現同其類。所以受生。復欲令知有爲必遷。所以示滅。又眾生根熟。所以現生。眾生感盡。所以現滅。佛涅槃後。人天供養。起諸寶塔。又大迦葉。召千羅漢。結集法藏。阿難從鎖鬚入。誦出佛經。一無遺漏。如瓶寫水。置之異器。一百年外。有鐵輪王。字阿輸柯。亦名阿育。役御神鬼。於一日中。天上人間。造八萬四千舍利寶塔。其佛遺物。衣鉢杖等。及諸舍利。神變非一。逮漢明感夢金

軀日佩丈六之容。一如釋迦本狀。又吳主孫權燒椎舍利無所變壞。爰及浮江石像汎海瑞容。般若冥力觀音密驗。別記具之事多不錄。

讚弗沙佛偈

天上天下無如佛

十方世界亦無比

世間所有我盡見

一切無有如佛者

漢顯宗開佛化法本內傳

傳云。明帝永平十三年。上夢神人。金身丈六。項有日光。寤已問諸臣下。傳毅對詔。有佛出於天竺。乃遣使往求。備獲經像及僧二人。帝乃爲立佛寺畫壁。千乘

萬騎繞塔三帀。又於南宮清涼臺。及高陽門上。顯節陵所圖佛立像。并四十二章經。緘於蘭臺石室。廣如前集牟子所顯傳云。時有沙門迦攝摩騰竺法蘭。位行難測。志存開化。蔡愔使達請騰東行。不守區域。隨至雒陽。曉諭物情。崇明信本。帝問騰曰。法王出世。何以化不及此。荅曰。迦毘羅衛國者。三千大千世界一百億日月之中心也。三世諸佛皆在彼生。乃至天龍鬼神有願行者。皆生於彼。受佛正化。咸得悟道。餘處眾生無緣感佛。佛不往也。佛雖不往。光明及處。或五百年。或一千年。或二千年外。皆有聖人傳佛聲教。而

化導之廣說教義文廣故畧也。傳示永平十四年正月一日五岳諸山道士朝正之次。自相命曰。天子棄我道法。遠求胡教。今因朝集。可以表抗之。其表畧曰。五岳十八山觀太上三洞弟子褚善信等。六百九十人死罪上言。臣聞太上無形無名無極無上。虛無自然。大道出於造化之前。上古同遵。百王不易。今陛下道邁羲皇。德高堯舜。竊承陛下棄本追末。求教西域。所事乃是胡神。所說不參華夏。願陛下恕臣等罪。聽與試驗。臣等諸山道士多有徹視遠聽。博通經典。從元皇已來。太上羣錄。太虛符祝。無不綜練。達其涯極。

或策使鬼神吞霞飲氣。或入火不燒。或履水不溺。或白日昇天。或隱形不測。至於方術無所不能。願得與其比較。一則聖上意安。二則得辯真僞。三則大道有歸。四則不亂華俗。臣等若比對不如。任聽重決。如則有勝。乞除虛妄。敕遣尙書令宋庠引入長樂宮。以今月十五日可集白馬寺。道士等便置三壇。壇別開二十四門。南岳道士褚善信。華岳道士劉正念。恆岳道士桓文度。岱岳道士焦得心。嵩岳道士呂惠通。霍山天目五臺白鹿等十八山道士祁文信等。各齎靈寶真文太上玉訣三元符錄等五百九卷。置於西壇。茅

成子許成子黃子老子等二十七家子書二百三十
五卷。置於中壇。饌食奠祀百神。置於東壇。帝御行殿
在寺南門。佛舍利經像置於道西。十五日齋訖。道士
等以柴荻粘檀沈香爲炬。繞經泣曰。臣等上啟太極
大道元始天尊眾仙百靈。今胡神亂夏人主信邪。正
教失踪。玄風墜緒。臣等敢置經壇上。以火取驗。欲使
開示蒙心得辨真僞。便縱火焚經。經從火化。悉成煨
燼。道士等相顧失色。大生怖懼。將欲昇天。隱形者。無
力可能禁。效鬼神者。呼策不應。各懷慚惡。南岳道士
費叔才自感而死。太傅張衍語褚信曰。卿等所試無

驗卽是虛妄。宜就西來眞法。褚信曰。茅成子云。太上者靈寶天尊是也。造化之作。謂之太素。斯豈妄乎。衍曰。太素有貴德之名。無言教之稱。今子說有言教。卽爲妄也。信默然。時佛舍利光明五色。直上空中。旋環如蓋。徧覆大眾。映蔽日光。摩騰法師踊身高飛。坐臥空中。廣現神變。於時天雨寶華。在佛僧上。又聞天樂感動人情。大眾咸悅。歎未曾有。皆繞法蘭。聽說法要。并吐梵音。歎佛功德。亦令大眾稱揚三寶。認善惡業。皆有果報。六道三乘。諸相不一。又說出家功德。其福最高。初立佛寺。同梵福量。司空陽城侯劉峻與諸官

人士庶等千餘人出家。四岳諸山道士呂惠通等六百三十人出家。陰夫人王婕妤等與諸宮人婦女二百三十人出家。便立十所寺。七所城外安僧。三所城內安尼。自斯已後廣矣。傳有五卷畧不備載。有人疑此傳近出本。無角力之事。案吳書明費叔才感死。故傳爲實錄矣。

商太宰問孔子聖人

太宰嚭問孔子曰。夫子聖人歟。對曰。丘也博識強記。非聖人也。又問。三王聖人歟。對曰。三王善用智勇。聖非丘所知。又問。五帝聖人歟。對曰。五帝善用仁義。聖

非丘所知。又問。三皇聖人歟。對曰。三皇善用時政。聖
非丘所知。太宰大駭曰。然則孰爲聖人乎。夫子動容
有間曰。丘聞西方有聖者焉。不治而不亂。不言而自
信。不化而自行。蕩蕩乎人無能名焉。據斯以言。孔子
深知佛爲大聖也。時緣未昇。故默而識之。有機故舉。
然未得昌言其致矣。

鍾山鐵牛印禪師示童行法晦

唐則天延載元年五月十五日。始括天下僧尼。隸祠
部。玄宗天寶六年。制所度僧尼。令祠部給牒。肅宗至
德元年。祠部牒賜功臣賣始。以此論之。延載前。爲僧

依天竺法。有行業堪任受道者。惟師攝受。如唐宮使
會通謁鵲巢道林禪師曰。弟子不願爲官志慕出家。
願和尚攝受。道林曰。今時爲僧行多浮濫。通曰。本淨
非琢磨元明不隨照。道林曰。汝若了淨智妙圓體自
空寂。卽眞出家。何假外相。通曰。願垂攝受。誓遵師教。
道林乃與鬚落。後來行業旣濫。檢制興焉。自然之理。
所以黃面老子以法付之國王大臣。蓋以此也。今國
朝聖澤洪濡。特使穹其價者。政所以重教尊僧貴尚
其法也。明教嵩禪師曰。夫僧也者。其防身有戒。攝心
有定。辨明有慧。有威可敬。有儀可則。天人望而儼然。

近世多輕僧。固僧人自取。然披僧伽黎者。若數世願力之重。夙熏種智成熟。未易得也。如本朝王文正公旦。臨薨背時。悔當初錯了路頭。不作僧。乃囑令諸子。爲削其鬚髮。衣以僧家三衣。然後入棺。要第二世出頭來。使成僧。仍囑侍郎楊大年。主其治命。後楊以宰臣薨背。國家自有典故。雖不從所請。只以三衣鬚刀。置之棺中。楊亦自悔。竟參禪宗了悟自心。被旨詳定景德傳燈錄。流布西天。此土噫爲僧之難。有如此者。若是大丈夫漢。興決烈之志。屏浮濫之行。從腳跟下一刀兩段。向佛祖外一覷。便透身心俱了。亦不爲難。

亦不患護身符子不入手。所以道高山流水深深意。自有知音笑點頭。法晦致身寶公道場有年。其爲人謹愿朴厚。有決烈之志。無浮濫之行。今謀進納爲僧。敬投敬信英偉特達大賢。揮金助成其志。以此軸求警策。因縷縷示之。亦欲世間賢士大夫興重教尊僧之心。知前輩雖爲富貴所折困。末後亦有悔之者。歲在己未中秋住鍾山鐵牛。

撫州永安禪院新建法堂記無盡居士撰

臨川陳宗愈。於永安常老會中得大法喜。捐其家貲。爲建丈室作脩廊。方且鳩林以新法堂。而宗愈死。其

三子號訴於常曰。吾先子之未奉佛也。安且強。旣奉佛也。病且亡。佛之因果可信耶。其不可信耶。常曰。吾野叟也。不足以譬子。子第成父之志而卒吾堂。吾先師有得法上首。無盡居士。深入不二。辨才無礙。隨順根性。善演音法。堂成當爲子持書求誨。決子之疑。紹聖元年春。常遣明鑑至山陽。以書來言。會予方以諫官召還。未暇。明年鑑又至京。待報於智海禪刹。爾時居士默處一室。了明幻境。鐵輪旋頂。身心泰定。明鑑雨淚悲泣。殷勤三請。大悲居士。佛法外護。付與王臣。今此眾生。流浪苦海。貪怖死生。迷惑因果。惟願居士

作大醫王。施與法藥。居士曰。善哉善哉。汝乃能不遠千里。爲陳氏子。諮請如來。無上祕密甚深法要。諦聽吾說。持以告之。善男子。大空寂間。妄生四相。積氣爲風。積形爲地。積陽爲火。積陰爲水。建爲三才。散爲萬品。一切有情。水火相摩。形氣相結。以四小相具。四大界。因生須養。因養須財。因財須聚。因聚成貪。因貪成競。因競成瞋。因瞋成狠。因狠成愚。因愚成癡。此貪瞋癡。諸佛說爲三大阿僧祇劫。人於百年劫中。或十歲二十歲。或三十四十歲。或五六十歲。或七八十歲。各於壽量。自爲小劫。於此劫中。而欲超越。不可數劫。譬

如蚯蚓欲昇烟雲。無有是處。諸佛悲愍。開示檀波羅蜜。大方便門。勸汝捨財。汝財能捨。卽能捨愛。汝愛能捨。卽能捨身。汝身能捨。卽能捨意。汝意能捨。卽能捨法。汝能捨法。卽能捨心。汝心能捨。卽能契道。昔迦葉尊者行化。有貧媪以瓦破器中潘汁施之。尊者飲訖。踴身虛空。現十八變。貧媪瞻仰。心大歡喜。尊者謂曰。汝之所施。得福無量。若人若天。輪王帝釋。四果聖人。及佛菩提。汝意所願。無不獲者。媪曰。止。求生天。尊者曰。如汝所欲。過後七日命終。生忉利天。受勝妙樂。又闍賓國王在佛會聽法。出眾言曰。大聖出世千劫難。

逢。今欲發心造立精舍。願佛開許。佛云。隨爾所作。罽
賓持一枝竹。插於佛前。曰。建立精藍。竟。佛云。如是如
是。以是精藍。含容法界。以是供養。福越河沙。鑑來爲
吾持此二說。歸語檀越。善。自擇之。汝父所建堂室廊
廡。比一器。潘得福甚多。生天受樂。決定無疑。若比罽
賓國王。插一枝竹。乃能含容無量法界。汝欲進此聽
吾一偈。一竿修竹。建精藍。風捲蟪蛄。入海南。惡水潑
來。成第二。鈍根蹉過。問前三。於是明鑑踴躍。信受。歸
告其人。筆集緒言。刻以爲記。

宋文帝集朝宰論佛教

文帝卽宋高祖第三子也。聰睿英博雅稱。令達在位三十年。嘗以暇日從容。而顧問侍中何尙之。吏部羊立保曰。朕少來讀經不多。比日彌復無暇。三世因果未辨措懷。而復不敢立異者。正以卿輩時秀率所敬信也。范泰謝靈運常言。六經典文本在濟俗爲政。必求性靈真奧。豈得不以佛理爲指南耶。近見顏延之折達性論。宗炳難白黑論。明佛法深尤爲名理。並足開獎人意。若使率土之濱皆敦此化。則朕坐致太平矣。夫復何事。尙之對曰。悠悠之徒多不信法。以臣庸弊更荷褒拂。非所敢當之。至如前代羣英。則不負明

詔矣。中朝已遠。難復盡知。渡江以來。則王導。周顒。庾亮。王濛。謝尚。郗超。王坦之。王恭。王謐。郭文。舉謝敷。戴逵。許詢。及亡高祖兄弟。及王元琳。昆季。范汪。孫綽。張玄。殷覲等。或宰輔之冠。蓋或人倫之羽儀。或置情天人之際。或抗跡烟霞之表。並稟志歸依。措心歸信。其間比對。則蘭獲開潛。深遁崇邃。皆亞迹黃中。或不測之人也。慧遠法師嘗云。釋氏之化。無所不可。適道固自教源。濟俗亦爲要務。竊尋此說。有契理要。若使家家奉戒。則罪息刑清。陛下所謂坐致太平。誠如聖旨。羊玄保進曰。此談蓋天人之際。豈臣所宜預。竊謂秦楚

論強兵之事。孫吳盡吞併之術。將無取於此也。帝曰。此非戰國之具。良如卿言。尙之對曰。夫禮隱逸則戰士怠。貴仁德則兵氣衰。若以孫吳爲志。苟在吞噬。亦無取堯舜之道。豈惟釋教而已哉。帝曰。釋門有卿。亦有孔門之有季路。所謂惡言不入於耳也。自是文帝致意佛經。及見嚴觀諸僧。輒論道義。屢延殿會。躬御地筵。同僧列飯。時有沙門竺道生者。秀出羣品。英義獨拔。帝重之。嘗述生頓悟義。僧等皆設臣難。帝曰。若使逝者可興。豈爲諸卿所屈。時顏延之著離識論。帝命嚴法師辨其同異。往返終日。笑曰。卿等今日無愧。

支許之談也。

後漢書郊祀志

志曰。佛者漢言覺也。將以覺悟羣生也。統其教以修善。慈心爲主。不殺生類。專務清淨。精進者爲沙門。漢言息心。鬚髮去家。絕情洗慾。而歸於無爲也。又以人死精神不滅。隨復受形。所行善惡。後生皆有報應。所貴行善以練其精神。練而不已。以至無生。而得爲佛也。身長一丈六尺。黃金色。項中佩日月光。變化無常。無所不入。故能化通萬物。而大濟羣生也。有經書數千卷。以虛無爲宗。包羅精粗。無所不統。善爲宏闊勝。

大之言。所求在一體之內。所明在視聽之表。歸依立微深遠。難得而測。故王公大人。觀生死報應之際。無不據然自失也。魏書云。其佛經大抵言生生之類。皆因行業而起。有過去當今未來三世也。其修道階次等級非一。皆緣淺以及深。籍微以爲著。率在於積仁順。蠲嗜慾。習虛靜而成通照也。

杭州淨慈寺守一法真禪師掃地回向文

以此掃地功德。回向法界眾生。色塵清淨。塵清淨故。眼根清淨。根清淨故。眼識清淨。聲香味觸法亦復如是。又願一世界清淨。乃至盡法界虛空界皆悉清淨。

同諸如來光嚴住持。圓覺伽藍清淨覺地。永斷習氣。淨穢二邊。凡聖垢染一塵不立。如是願清淨智亦復清淨。

隨州大洪山靈峰寺十方禪院記

元祐二年九月。詔隨州大洪山靈峰寺革律爲禪。紹聖元年。外臺始請移洛陽少林寺長老報恩爲住持。崇寧改元正月。使來求十方禪院記。乃書曰。大洪山在隨州西南。盤基百餘里。峰頂俯視漢東諸國。林巒丘嶺猶平川也。以耆舊所聞攷之。洪或曰胡。或曰湖。未詳所謂。今以地理考之。四山之間昔爲大湖。神龍

所居洪波洋溢莫測涯涘。其後二龍鬪擲開層崖。湖水南落。故今負山之鄉謂之落湖管。此大洪所以得名也。唐元和中。洪州開元寺僧善信。卽山之慈忍大師也。師從馬祖密傳心要。北遊五臺山禮文殊師利。瞻覩殊勝。自慶菩薩有緣。發願爲眾僧炊爨三年。寺僧卻之。流涕嗟感。有老父曰。子緣不在此往矣。行焉。逢隨卽止。遇湖卽住。師卽南邁。以寶曆二年秋七月。抵隨州。遠望高峰。問鄉人曰。何山也。鄉人曰。大湖山也。師默契前語。尋山轉麓。至於湖側。屬歲亢旱。鄉人張武陵具羊豕。將用之以祈於湖龍。師見而悲之。謂

武陵曰。雨暘不時。本因人心黑業所感。害命濟命。重增乃罪。可且勿殺。少須三日。吾爲爾祈。武陵亦異人也。聞師之言。敬信之。師卽披榛捫石。得山北之巖穴。泊然宴坐。運誠冥禱。雷雨大作。霽後數日。武陵迹而求之。師方在定。珠絲羃面。號耳挫體。久之方覺。武陵卽施此山爲師興建精舍。以二子給侍左右。學徒依嚮。遂成法席。大和元年五月二十九日。師密語龍神曰。吾前以身代牲。輟汝血食。今捨身餉汝。汝可享吾肉。卽引利刀截左膝。復截右膝。門人奔馳。其慈忍膝不克斷。白液流出。儼然入滅。張氏二子立觀而化。山

南東道奏上其狀。唐文宗嘉之。賜所居額爲幽濟禪院。晉天福中改爲奇峰寺。本朝元豐元年又改爲靈峰寺。皆以禱祈獲應也。自師滅至今三百餘年。而漢廣汝汾之間。十數州之民。尊嚴奉事如赴約束。金帛粒米相尾於道。貨強法弱。僧範乃革。前此山峰高峻。堂殿樓閣。依山製形。後前不倫。向背靡序。恩老至止。熟閱形勝。闢途南入。以正賓主。鑿崖壘澗。鏟巖補砌。嵯峨萬仞。化爲平頂。三門堂殿。翼舒繩直。通廊大廡。疏戶四達。淨侶雲集。藹爲叢林。峨眉之寶燈瑞相。清涼之金橋圓光。他方詭觀異境。同現方其廢故。而興

新也。律之徒懷土而嘔嘔。會予謫爲郡守。舍禪律而訂之曰。律以甲乙禪以十方。而所謂甲乙者。甲從何來。乙從何立。而必曰。我慈忍之子孫也。今取人於十方。則忍之後絕矣。乙在子孫。甲在慈忍。乙在慈忍。甲在馬祖。乙在馬祖。甲在南嶽。乙在南岳。甲在曹溪。推而上之。甲乙乃在乎菩提達磨。西天四七。所謂甲乙者。果安在哉。又而所謂十方者。十從何生。方從何起。世間之法。以一生二。一二爲三。二三爲六。三三爲九。九者究也。復歸爲一。一九爲十。十義乃成。不應突然無一有十。而所謂方者。上爲方耶。下爲方耶。東爲方

耶。西爲方耶。南爲方耶。北爲方耶。以上爲方則諸天
所居。非而境界。以下爲方則風輪所持。非而居止。以
東爲方則毘提訶人面如半月。以北爲方則鬱單越
人壽命久長。以西爲方則瞿耶尼洲滄波浩渺。以南
爲方則閻浮提洲象馬殊國。然則甲乙無定。十方無
依。競律競禪。奚是奚非。律之徒曰。世尊嘗居給孤獨
園竹林精舍。必知太守言。世尊非耶。予曰。汝豈不聞
以大圓覺爲我伽藍。身心安居平等性智。此非我說。
乃是佛說。於是律之徒默然而去。禪者曰。方外之士
一瓶一鉢。涉世無求。如鳥飛空。遇枝則休。如龜游海。

值木則浮。來如聚。梗去如滅。漚不識使君甲乙之乎。
十方之乎。予曰。善哉。佛子。不住內。不住外。不住中間。
不住四維。上下虛空。應無所住而住持。是真十方住
持矣。尙何言哉。尙何言哉。時崇寧元年正月上元日
記。

唐修雅法師聽誦法華經歌

山色沉沉。松烟冪冪。空林之下。盤陀之石。石上有僧。
結跏橫膝。誦白蓮經。從旦至夕。左之右之。虎跡狼跡。
十片五片。異花狼籍。偶然相見。未深相識。知是古之
人。今之人。是曇彥。是曇翼。我聞此經。有深旨。覺帝稱。

之眞妙義。合目冥心。子細聽。醍醐滴入焦腸裡。佛之意。今祖之髓。我之心。今經之旨。可憐彈指及舉手。不達目前。今正是大矣哉。甚奇特。空生要使羣生得光輝。一萬八千土。土土皆作黃金色。四生六道一光中。狂夫猶自問彌勒。我亦當年學空寂。一得無心便休息。今日親聞誦此經。始覺驢乘匪端的。我亦當年不出戶。不欲紅塵沾步武。今日親聞誦此經。始覺行行皆寶所。我亦當年愛吟咏。將謂冥搜亂禪定。今日親聞誦此經。何妨筆硯資眞性。我亦當年狎兒戲。將謂光陰半虛棄。今日親聞誦此經。始覺聚沙非小事。我

昔曾遊山與水。將謂它山非故里。今日親聞誦此經。
始覺山河無寸地。我昔心猿未調伏。常將金鎖虛拘
束。今日親聞誦此經。始覺無物爲拳拳。師誦此經經
一字。字字爛嚼醍醐味。醍醐之味珍且美。不在脣不
在齒。只在勞生方寸裏。師誦此經經一句。句句白牛
親動步。白牛之步疾如風。不在西不在東。只在浮生
日用中。日用不知一何苦。酒之腸飯之腑。長者揚聲
喚不迴。何異聾何異瞽。世人之耳非不聰。耳聰特向
經中聾。世人之目非不明。目明特向經中盲。合聰不
聰。合明不明。轆轤上下浪死虛生。世人縱識師之音。

誰人能識師之心。世人縱識師之形。誰人能識師之名。師名醫王行佛令。來與眾生治心病。能使迷者醒。狂者定。垢者淨。邪者正。凡者聖。如是則非但天恭敬人恭敬。亦合龍讚詠。鬼讚詠。佛讚詠。豈得背覺合塵之徒。不稽首而歸命。

梁皇捨道事佛詔

梁高祖武皇帝年三十四登位。在政四十九年。雖億兆務殷而卷不釋手。內經外典罔不措懷。皆爲訓解數千餘卷。而儉約自節。羅綺不緣。寢處虛閑。晝夜無怠。致有布被莞蓆草屨葛巾。初臨大寶。卽備斯事。日

唯一食永絕辛羶。自有帝王罕能及此。舊事老子宗
尙符圖。窮討根源有同妄作。帝乃躬運神筆下詔。捨
道文曰。維天監三年四月八日。梁國皇帝蘭陵蕭衍
稽首和南。十方諸佛。十方尊法。十方聖僧。伏見經云。
發菩提心者。卽是佛心。其餘諸善不得爲喻。能使眾
生出三界之苦門。入無爲之勝路。故如來漏盡智凝
成覺。至道通機。德圓取聖。發慧炬以照迷。鏡法流以
澄垢。啟瑞跡於天中。爍靈儀於像外。度羣迷於慾海。
引含識於涅槃。登常樂之高山。出愛河之深際。言乖
四句語。絕百非。應迹娑婆。示生淨飯。王宮誕相。步三

界而爲尊。道樹成光。普大千而流照。但以機心淺薄。好生厭怠。自期二月當至雙林。宗乃湛說圓常。且復潛輝鶴樹。闍王滅罪。婆藪除殃。若不逢值大聖法王。誰能救接。在迹雖隱。其道無虧。弟子經遲迷荒。耽事老子。歷葉相承。染此邪法。習因善發。棄迷知返。今捨舊鑿歸憑正覺。願使未來世中童男出家。廣弘經教。化度含識。同共成佛。寧在正法之中。長淪惡道。不樂依老子教。暫得生天。涉大乘心。離二乘念。正願諸佛證明。菩薩攝受。弟子蕭衍和南。

緇門警訓卷第十終

刻緇門警訓功德人名

佛弟子楊淨超助洋拾圓

珠湖永興庵比丘定泉助錢拾六千文

經募

信士虞蔚然浦大全室楊氏女轉姑陳公生室鄒氏於陳氏陸上善等共助錢貳拾六千六百六十文

三寶弟子靈音爲道心增進病苦蠲除助肆拾圓

武林沈上善請日藏之餘肆拾圓

普公手

信女許門聶氏爲孫承恩仗

佛恩靈超生福地助拾八圓

庚寅

緇門警訓功德人名

光緒十八年秋七月

江北刻經處識

佛弟子楊淨超。憶出世福田。以供養三寶爲第一。
諸供養中。如經所云。以法供養爲第一。今見清公。
老和尚新刻緇門警訓之書。一閱之下。津津有味。
思我祖良言。宜廣流通。不使湮沒。卽報祖恩。發心。
印送壹千二百五十部。不異昔日世尊住世時也。
以茲功德。懺悔弟子楊淨超。屢生罪垢。消除歷劫。
無明。惟願福德昌隆。道緣俱足。早生淨土。快覩。
彌陀世尊。親近清淨海眾。一切聖賢。廣化有情。同。
登覺岸。是爲至禱。

印送緇門警訓壹千二百五十部。每部二百二十

四文

共合錢式百捌拾千文

又助刻緇門警訓洋拾圓

時在

光緒十八年佛歡喜日

板存揚州藏經院

